



太平御覽卷一百十七

偏霸部一

蜀劉備

劉禪

劉備

蜀志曰先主姓劉諱備字元德涿州郡人漢景帝子中山靖

王勝之後也勝子貞元狩六年封涿縣陸城亭侯坐酎金

失侯因家焉

典畧云備本臨邑侯枝屬

先主祖雄父弘世仕州郡雄舉

孝廉官至東郡苑令先主少孤與母販履織席為業舍東

南角籬上有桑樹上高五尺餘遙望重重如小車蓋往來

者皆怪此樹非凡或謂當出貴人

漢晉春秋曰孫人李定云此家必出貴人也

先主少時與宗中諸兒於樹下戲言吾必當乘此羽葆蓋

車叔父子敬曰汝勿妄語滅吾門也年十五母使行學同宗劉德然遼西公孫瓚俱事故九江太守同郡盧植德然父元起常資給先主與德然等元起妻曰各自一家何能常爾耶起曰吾宗中有此兒非常人也瓚深與先主相友瓚年長先主以兄事之先主不甚樂讀書喜狗馬音樂美衣服身長七尺五寸垂髯下膝顧自異耳少語言善下人喜怒不形於色好交結豪俠年少爭附之中山大商張世平蘇雙等貲累千金販馬周旋於涿郡見而異之乃多與之金財先主由是得用台徒衆靈帝末黃巾起州郡各舉義兵先主率其屬從校尉鄒靖討賊有功除安喜尉大將軍何進遣都尉母邱毅詣丹陽募兵先主與俱行至下邳

遇賊力戰有功除爲下密丞復去官後爲高唐尉遷爲令爲賊所破往奔公孫瓚表爲別部司馬使監青州刺史田楷以拒冀州牧袁紹數有戰功試守平原令後領平原相郡民劉平素輕先主耻爲之下使客刺之客不忍刺語之而去其得人心如此袁紹攻公孫瓚先主與田楷東屯齊曹公征徐州徐州牧陶謙遣使告急於楷楷與先主俱救之時先主有兵千餘人謙以丹陽兵四千人益先主遂去楷歸謙謙表先主爲豫州刺史屯小沛謙病謂別駕糜竺曰非劉備不能安此州謙死竺帥州人迎先主先主未敢當下邳陳登謂先主曰今漢室陵遲海內傾覆立功立事在於今日彼州殷富戶口百萬欲屈使君撫臨州事北海相孔融

謂先主曰今日之事百姓與能天與不取悔不可追先主遂領徐州袁術來攻先主先主拒之於盱眙淮陰曹公表先主爲鎮東將軍封宜城亭侯是歲建安元年也先主與術相持經月呂布乘虛襲下邳下邳守將曹豹反間迎布布虜先主妻子先主求和於布布還其妻子先主還小沛復合兵得萬餘人布惡之自出攻先主先主敗走歸曹公曹公厚遇之以爲豫州牧曹公助先主圍布於下邳生擒布先主復得妻子從曹公還許表先主爲左將軍禮之愈重出則同輿坐則同席袁術欲經徐州北就袁紹曹公遣先主督朱靈路招要擊術未至術病死曹公從容謂先主曰天下英雄唯使君與操耳本初之徒不足數也先主方

食失匕箸先主據下邳乃殺徐州刺史車胄留關羽守下邳自還小沛曹公東征先主敗績曹公盡收其衆虜先主妻子并擒關羽以歸先主走青州青州刺史袁譚先主故茂才也將步騎迎先主先主隨譚到平原馳使白紹紹遣將道路奉迎身去鄴三百里與先主相見關羽亡歸先主曹公遣曹仁將騎擊先主先主還紹軍陰欲離紹乃說紹南連荊州收劉表紹遣先主將本兵復至汝南遣糜竺孫乾與劉表相聞表白郊迎以上賓待之先主在荊州數年嘗於表坐起至廁見髀裏肉生慨然流涕還坐表怪問備曰吾常身不離鞍髀肉皆消今不復騎髀裏肉生日月若馳老將至矣而功業不建是以悲耳一日徐庶謂先主曰

諸葛孔明臥龍也將軍豈不欲覓乎先主曰可與俱來庶曰
此人可就見不可屈致也宜枉駕顧之由是先主遂詣亮
廬凡三往乃見之因屏人曰漢室傾頽奸臣竊命孤不度
德量力欲信大義於天下而智術短淺遂用猖獗然志猶
未已君爲計將安出亮曰自董卓以來豪傑並起跨州連
郡者不可勝計曹操比於袁紹則名微而衆寡然操遂能
克紹以弱爲強者非唯天時抑亦人事今操已擁百萬之
衆挾天子而令諸侯此誠不可與爭鋒也孫權據有江東
已歷三代國險而民附賢能爲之用此可以爲援而不可
圖也荆州北據漢沔利盡南海東連吳會西通巴蜀此用
武之國也而其主不能守殆天所以資將軍也益州險塞

沃野千里天府之土高祖因之以成帝業劉璋闇弱張魯
在北民殷國富而不知存恤智能之士思得明君將軍既
帝室之胄信義著於四海摠攬英雄思賢如渴若跨有荆
益保其巖阻西和諸戎南撫夷越外結孫權內修政事天
下有變則命一上將將荆州之軍以向宛洛將軍身率益
州之衆出於秦川百姓孰不箪食壺漿以迎將軍者乎誠
如是則伯業可成漢室可興矣先主曰善於是與亮情好日
密關羽張飛等不說先主解之曰孤之有孔明如魚之有
水也願諸君勿復言十二年曹公北征烏丸先生說表襲
許表不能用及曹公南征會表死子琮代立遣使請降先
主屯樊城遂將其衆去過襄陽諸葛亮說先主攻琮荆州

可有先主曰劉荊州臨亡託我以孤背信自濟死何面目見劉荊州乎吾不忍也琮左右及荊州人多歸先主比到當陽衆且十萬輜重數千兩日行十餘里或謂先主曰宜速行保江陵今雖擁大衆被甲者少若曹公兵至何以拒之先主曰夫濟大事者以人爲本今人歸吾吾何忍弃去是時曹公又以江陵有軍實恐先主據之乃釋輜重輕軍到襄陽聞先主已過曹公將精騎五千急追之一日一夜行三百餘里及於當陽之長坂先主弃妻子與諸葛亮張飛趙雲等數十騎走遣諸葛亮自結於孫權權遣周瑜等助之與曹公戰於赤壁大破之焚其舟楫羣下推先主爲荊州牧治公安益州牧劉璋內懷恐懼遣法正迎先主先

主留諸葛亮關羽等據荊州將步卒數萬人入益州璋推先主行大司馬領司隸校尉先主亦推璋持鎮西大將軍領益州牧璋勅關戍諸將文書勿復關通先主先主大怒進圍成都數十日璋出降蜀中殷盛豐樂先主置酒大饗士卒蜀城中金銀分與將士還其穀帛先主復領益州牧羣下尊先主爲漢中王還治成都魏文帝稱尊號或傳聞漢帝見害先主乃發喪制服追謚曰孝愍皇帝是後建立禮儀上尊號卽皇帝位於成都章武元年夏四月大赦改年永安三年先主病篤託孤于丞相亮夏四月先王殂于永安宮時年六十三五月梓宮自永安還成都謚曰昭烈皇帝秋八月葬惠陵

華陽國志曰漢末大亂雄傑並起若董卓呂布二袁韓馬張陽劉表之徒兼州董郡衆動萬計叱咤之間皆自謂漢祖可踵桓文易邁而魏武神武肆畧戡屠盪盡于時先主名微衆鮮而能龍飛鳳舉假翼荆楚番飛梁益建元肩漢與之鼎峙非英才命世孰克如是

劉禪

蜀志曰後主諱禪字公嗣先主子也建安二十四年先主爲漢中王立爲王太子卽尊號爲皇太子先主殂于永安宮後主襲位于成都時年十七是歲魏黃初四年也景耀六年夏魏大興徙衆命征西將軍鄧艾數道並攻用光祿大夫譙周策奉書于艾後主與禪自縛詣壘門艾解縛焚

櫬延請相見因承制拜後主爲驃騎將軍諸圍守悉被後主勅然後降下艾使後主止其故宮身往造焉後主乃舉家東遷在位凡四十年旣至洛陽冊命爲安樂縣公食邑萬戶賜絹萬疋奴婢百人後司馬文王與後主宴爲之作樂故蜀妓旁人皆爲感愴而後主喜笑自若王謂賈充曰人之無情乃至於是乎雖使諸葛亮在亦不能輔之久全况姜維乎充曰不如是殿下何由并之他日王問禪曰頗思蜀否禪曰此間樂不思蜀也蜀故秘書令郤正聞之求見語禪曰若王復問可言先人墳墓遠在隴蜀乃心西悲無日不思因閉其目會王復問禪以此答王曰何乃似郤正之語耶禪驚曰實如尊命左右皆大笑後薨於洛陽

魏畧曰始備在小沛不意曹公卒至迫遽弃家屬奔荊州
初奔禪時年數歲區竄隨人西入漢中爲人所賣及建安
十六年關中破亂扶風人劉括避亂入漢中買得禪問知
其良家子遂養爲子與娶婦生一子始禪與父相失時識
其父字元德比舍人有姓簡者及備得益州而簡爲將軍
備遣簡到漢中舍都邸禪乃詣簡相驗訊事皆符驗簡喜
以語張魯乃沐浴送詣益州備乃立爲太子始備以諸葛
亮爲太子太傅及禪卽位以亮爲丞相委以諸事謂亮曰
政由葛氏祭則寡人亮亦以禪未閑於政遂總內外

太平御覽卷一百十七

太平御覽卷一百十八

偏霸部二

吳孫堅

孫策

孫權

孫亮

孫休

孫皓

孫堅

吳志曰堅字文臺吳郡富春人蓋孫武之後也少爲縣吏
府召募爲校尉會稽妖賊許昌起於句章堅以郡司馬募
召精勇得千餘人與州郡合討破之刺史臧旻列上功狀
詔書除堅鹽漬丞又徙下邳丞中平元年黃巾賊帥張角
起於魏郡漢遣車駕將軍皇甫嵩中郎將朱雋將兵討擊
之雋表請堅爲佐軍司馬堅又募精兵合千許人與雋併

力奮擊所向無前拜堅別部司馬中平三年遣司空張溫西討邊章韓遂溫表請堅與參軍事屯長安溫以詔書召董卓卓良久乃詣應對不順堅數卓三罪勸溫斬之溫不忍發舉軍還拜堅議郎時長沙賊區星自稱將軍以堅爲長沙太守克破星等漢朝錄前後功封堅烏程侯靈帝崩董卓專擅朝政諸州郡並舉義兵討卓堅亦舉兵比至南陽衆數萬人南陽太守張咨晏然自若堅率咨於軍門斬之郡中震慄無求不獲前到魯陽與袁術相見術表堅行破虜將軍領豫州刺史遂治兵於魯陽城進軍討卓卓憚堅猛壯乃遣將軍李傕等求和親堅曰卓逆天無道蕩覆王室今不夷汝三族懸示四海則吾死不瞑目豈與汝和親耶復進

軍大谷距雒九十里卓尋徙都西八關焚雒邑堅至洛修諸陵平塞卓所發掘訖引軍住魯陽初平三年術使堅征荊州擊劉表表遣黃祖逆於樊鄧之間堅破之追渡漢水遂圍襄陽單馬行峴山爲祖軍士所射殺追謚武烈皇帝兄子賁帥將士衆還就術術復表賁爲豫州刺史堅四子策權翊匡

孫策

吳志曰策字伯符堅初興義兵策將母徙居舒與周瑜相友江淮間人咸向之堅薨還葬曲阿已乃渡江居江都策舅吳景時爲丹陽太守策乃載母徙曲阿與平元年從袁術術甚奇之以堅部曲還策太傅馬日磾持節安集關東以

禮辟策表拜懷義校尉術嘗嘆曰使術有子如孫郎死復何恨先是劉繇爲揚州刺史揚州舊治壽春壽春術已據之繇乃渡江治曲阿時吳景尚在丹陽策從兄賁又爲丹陽都尉繇至皆迫逐之景賁退舍溧陽繇遣樊能等屯江津張英屯當利以拒術術以景爲督軍中郎將與賁共將兵擊英等連年不克策乃說術乞助景等平定江東術表策爲折衝校尉行殄寇將軍兵纔千餘騎數十匹賓客願從者數百人比至歷陽衆五六千策又徙母阜陵渡江轉鬪所向皆破莫敢當其鋒而軍令整肅百姓懷之策爲人美姿顏好笑語性闊達聽受善於用人是以上民樂爲致死劉繇奔軍遁逃諸郡守皆捐城奔走吳人嚴白虎等衆

各萬餘人處處屯聚策引兵渡浙江據會稽乃攻破虎等盡更置長吏策自領會稽太守彭城張昭廣陵張紘秦松等爲謀主時袁術僭號策以書責而絕之曹公表策爲討逆將軍封爲吳侯後術死長史楊弘大將張勳等將其衆欲就策廬江太守劉勳要擊悉虜之策輕軍晨夜襲拔廬江勳衆盡降勳與數百人自歸曹公是時袁紹方強而策并江東曹公乃以弟女配策小弟匡又爲子彰取賁女又命揚州刺史嚴象舉權茂才建安五年曹公與袁紹相拒於官渡策陰謀襲許迎漢帝密治兵未發會爲故吳郡太守許貢客所刺傷瘡甚請張昭等謂曰中國方亂以吳越之衆三江之固足觀成敗公等善相吾弟呼權佩以印綬

至夜卒時年二十六追謚曰長沙桓王

孫權

吳志曰孫權字仲謀兄策既定諸郡時權年十五以爲陽羨長郡察孝廉舉茂才行奉義校尉漢以策遠修貢職遣使者劉琬加錫命琬語人曰吾觀孫氏兄弟雖各才秀明達然皆祿祚不終唯仲弟孝廉形貌奇偉體骨不恒有大貴之表年又最壽策薨以事授權權哭未及息策長史張昭謂權曰孝廉此寧哭時耶扶令上馬使出巡軍曹公表權爲討虜將軍領會稽太守屯吳建安八年權西伐黃祖破其舟軍劉備表權行車騎將軍領徐州牧十六年權徙治秣陵明年賊石頭改秣陵爲建業二十一年冬曹公攻

濡須權令都尉徐詳詣曹公報使修好誓結婚姻二十三年十月權將如吳親乘馬射虎馬爲虎所傷權投以雙戟虎却廢常從張世擊以戈獲之二十四年關羽圍曹仁於襄陽權內憚羽外欲以爲己功飛牋于曹公乞討關羽閏月權征羽遂定荊州曹公表權爲驃騎將軍持節領荊州牧封南昌侯權自公安都鄂改名武昌魏文帝踐祚加權九錫封爲吳王初權外託事魏而誠心不款魏乃遣侍中辛毗尚書桓階往與盟誓并徵任子權辭讓不受遂改元爲黃武元年臨江拒守權使太中大夫鄭泉聘劉備于白帝始復通好猶與魏文帝相往來至後年乃絕七年二月公卿百司皆勸正尊號夏四月夏口武昌並言黃龍鳳凰

見丙申祭南郊卽皇帝位是日大赦改元黃龍元年追尊
父破虜將軍堅爲武烈皇帝母吳氏爲武烈皇后兄討逆
將軍策爲長沙桓王六月與蜀爲盟九月遷都建業嘉禾
四年魏使以馬求易珠璣翡翠玳瑁權曰此皆孤所不用
而一可以得馬聽其交易赤烏七年步騭朱然各上
疏云自蜀還者咸言蜀欲背盟與魏交通宜爲之備權曰
吾待蜀不薄無所負之人言若不可信朕爲諸君破券保
之蜀竟無謀如權所籌太元元年權祭南郊還寢疾二年
四月薨時年七十一謚曰大皇帝葬蔣陵

吳志評曰孫權屈身忍辱任才尚計有句踐之奇英人之
傑矣故能自擅江表成鼎峙之業然性多嫌忌果於殺戮
暨臻末年彌以滋甚至於讒說殄行亂嗣廢斃豈所謂始
厥孫謀以燕翼子者哉其後葉陵遲遂致覆國未必不由
此也

吳志曰權自陸口遂征合肥合肥未下撤軍還兵皆就路
權與凌統甘寧等在津北爲魏將張遼所襲統等以死捍
權權乘駿馬越津渠得去
獻帝春秋曰張遼問吳降人向有紫髯將軍長上短下便
馬善射是誰降人答曰是孫會稽耶張遼及樂進相遇言
不早知之急追卽獲舉軍嘆恨

吳歷曰曹公出濡須權數挑戰公堅守不出權乃自乘船
從濡須口入公見舟船器仗軍伍整肅喟然嘆曰生子當

如孫仲謀若劉景昇兒子豚犬耳權爲牋與曹公說春水
方生公宜速去別紙言足下不死孤不得安曹公語諸將
曰孫權不欺孤乃撤軍還

江表傳曰堅爲下邳丞時權生方頤大口目有精光堅異
之以爲有貴象及堅亡策起事江東權常隨從性度弘朗
仁而多斷好養俠士始知名侔於父兄矣每參問計謀策
甚奇之自以爲不及也每請會賓客顧權曰此諸君之將
軍也

孫亮

吳志曰孫亮字子明權少子權春秋高而亮最少故允留
意姊全公主嘗譖太子和子母心不自安因倚權意欲豫

自結數稱述全尚女勸權爲亮納爲妃赤烏十三年和廢
權遂立亮爲太子以全氏爲妃權薨太子卽尊位大赦改
元建興元年冬十月太傅諸葛恪率軍遏巢湖城東興十
二月魏使將軍諸葛誕等步騎七萬圍東興恪以大兵赴
敵大破魏軍太平元年以從弟偏將軍林丑爲侍中武衛將

軍領中外諸軍事二年四月亮臨正殿大赦始親政事又
科兵子弟十八已下十五已上得三千餘人選大將子弟
年少有勇力者爲之將帥亮曰吾立此軍欲與之俱長日
於苑中習焉三年亮以緜專恣與太常全尚將軍劉丞謀
誅緜九月緜以兵取尚遣弟恩攻殺丞於蒼龍門外召大
臣會宮門黜亮爲會稽王時年十六

吳歷曰亮出西苑食生梅使黃門至中藏取蜜漬梅蜜中有鼠矢召問藏吏吏叩頭亮問吏曰黃門從汝求蜜耶吏曰向求實不敢與黃門不服侍中刁元張邠啓黃門藏吏辭語不同請付獄推盡亮曰此易知耳令破鼠矢矢裏燥亮大笑謂元邠曰若久在蜜中中外當俱濕今裏燥必黃門所爲黃門首服左右莫不驚悚

孫休

吳志曰孫休字子烈權第六子也年十三從中書郎謝慈郎中盛冲受學太元二年正月封琅琊王居虎林四月權薨休弟亮承統諸葛恪秉政不欲諸王在濱江兵馬之處徙休於丹陽郡太守李衡數以事侵休休上書求徙他郡

詔徙會稽居數歲夢乘龍上天顧不見尾覺而異之孫亮廢孫綝使宗正孫楷與中書郎董朝迎休休初聞問意疑楷朝具述所以奉迎本意留一曰二夜遂發行至曲阿有老公千休叩頭曰事久變生天下喁喁願陛下速行休善之是日進及布塞亭武衛將軍孫恩行丞相事率百寮以乘輿法駕迎於永昌亭綝以兵千人迎於半野拜於道側休下車答拜即日御正殿大赦改元永安元年冬綝一門五侯皆典禁兵權傾人主休聞綝逆謀陰與張布圖計十二月戊辰臘百寮朝賀公卿升殿詔令武士縛綝即日伏誅五年以衛將軍濮陽興爲丞相休以丞相興及左將軍張布有舊恩委之以事布典官省與關軍國休銳意於典籍

欲畢覽百家之言又好射雉春夏之間常晨出夜還唯此時舍書休欲與博士祭酒韋曜博士盛冲講論道藝曜冲素皆切直布恐入侍發其陰失令已不得專國因妄飾說以拒遏之休答曰孤之涉學羣書畧徧所見不少也其明君暗主奸臣賊子古今賢愚成敗之事無不覽也今曜等入但欲與講論書耳不爲從曜等始更受學也縱復如此亦何所損君特當以曜等恐道臣下奸變之事以此不欲令入耳如此之事孤已自備之不須曜等然後乃解也此都無所損君意特有所忌故耳布得詔陳謝重自序述又言懼妨政事休答曰書籍之事患人不好好之無傷也此無所爲非而君以爲不宜是以孤有所及耳正務學業其

流各異不相妨也不圖君今日在事更行此於孤也良所不取布拜表叩頭休答曰聊相開悟耳何至叩頭乎如君之忠誠遠近所知往者所以相感今日之巍巍也詩云靡不有初鮮克有終終之實難君其終之初休爲王時布爲左右將督素見信愛及至踐祚厚加寵待專擅國勢多行無禮自嫌瑕短懼曜冲言之故尤患忌休雖解此旨心不能悅更恐其疑懼竟如布意廢其講業不復使冲等入七年七月休薨時年三十謚曰景皇帝

江表傳曰休寢疾口不能言乃手書呼丞相濮陽興入令子雲音灣出拜之休把興臂指軍以托之也

襄陽記曰李衡爲丹陽太守時休在郡治衡素以法繩之

妻習氏每諫衡不從會休立衡懼謂妻曰不用卿言以至
於此遂欲奔魏妻曰瑯琊王素好善慕名方欲自顯於天
下終不以私嫌殺君明矣可白囚詣獄如此乃當逆見優
饒非但直活而已衡從之果得無患又加威遠將軍授以
棨戟

吳志曰休詔曰丹陽太守李衡以往事之嫌自拘有司夫
射鈞斬祛在君爲君遣衡還郡勿令自疑

孫皓

吳志曰孫皓字元宗權孫和之子也一名彭祖字皓宗孫
休立封皓爲烏程侯遣就國西湖民景養相皓當大貴皓
陰喜而不敢泄休薨是時蜀初亡而交趾攜叛國內震懼

貪得長君左典軍 禹或昔爲烏程令與皓相善稱皓才識
明斷是長沙桓王之儔也又加之好學奉遵法度屢言之
於丞相濮陽興左將軍張布與布說休妃太后朱欲以皓
爲嗣朱曰我寡婦人安知社稷之慮苟吳國無隕宗廟有
賴可矣於是遂迎立皓時年二十三改元大赦皓旣得志
寵暴驕盈多忌諱好酒色大小失望與布竊悔之或以譖
皓十一月誅興布天紀三年冬晉命鎮東將軍司馬佃安
東將軍王渾揚州刺史周浚太尉賈充爲大都督量宜處
要盡軍勢之中初皓每宴會羣臣無不咸令沉醉置黃門
郎十人特不與酒侍立終日爲司過之吏宴罷之后各奏
其闕失罔有不舉大者卽加威刑小者輒以爲罪后宮千

數而采擇未已又激水入宮宮人有不合意者輒殺流之
或剝人之面或鑿人之目岑昏險諛貴幸致位九列好興
功役衆所患苦是以上下離心莫爲皓盡力蓋積惡已極
不復堪命故也晉軍所至則上崩瓦解而王濬順流將至
司馬卬王渾皆臨近境皓用光祿勳薛瑩中書令胡冲等
計分遣使奉書於濬濬最先到於是受皓之降解縛焚櫬
延請相見卬以皓致印綬於己遣使送皓舉家西遷以太
康元年五月丁亥集于京邑四月詔賜號爲歸命侯進給
衣服車乘田三十頃歲給穀五千斛錢五十萬絹五百疋
絲五百斤皓太子瑾拜中郎五年皓死于洛陽吳錄曰皓
二月死時年四十一
葬河南縣地

世說曰晉武帝問孫皓曰聞南方人好作爾汝歌頗能不
時皓飲酒因舉觴勸帝而言曰昔與汝國隣今爲汝作臣
上汝一杯酒令汝壽萬春帝悔之

吳志曰皓之淫刑所濫殞斃流黜者蓋不可勝數是以羣
下人人惴恐虐用其民窮淫極侈宜其要首分離以謝百
姓旣蒙不死之詔復加歸命之寵豈非曠蕩之恩過厚之
澤也哉

太平御覽卷一百十八

太平御覽卷一百十九

偏霸部三

前趙劉元海

劉曜

劉元海

劉淵

劉聰

晉書載記敘曰劉元海以惠帝永興元年據離石稱後漢九年石勒據襄國稱趙張氏先據河西是歲白石勒後三十六年也重華自稱涼王後一年冉閔自據鄴稱魏後一年符健據長安稱秦慕容氏先據遼東稱燕是歲自符健後一年也雋始僭號後三十一年後燕慕容垂據鄴後二一年西燕慕容冲據阿房是歲也乞伏國仁據枹罕稱秦後

一年慕容永據上黨是歲也呂光據姑臧稱涼後十二年慕容德據滑臺稱南燕是歲也禿髮烏孤據廉川稱南涼段業據張掖稱北涼後三年李元盛據燉煌稱西涼後一年沮渠蒙遜殺段業自稱後涼四年譙縱據蜀稱成都王後二年赫連勃勃據朔方稱大夏後二年馮跋殺離班據和龍稱北燕提封天下十喪其八莫不龍旌帝服建社開祔華夷咸暨人物斯在或篡通都之鄉或擁數州之地雄圖內卷師旅外并窮兵凶於勝負盡人命於鋒鏑其爲戰國者一百三十六載抑元海爲之禍首云

劉淵

崔鴻十六國春秋前趙錄曰劉淵字元海新興匈奴人先

夏后氏之苗裔曰淳維世居北狄千有餘歲至冒頓襲破東胡西走月氏北服丁零內侵燕代控弦四十萬漢祖患之使劉敬奉公主以妻之約爲兄弟故子孫遂冒姓爲劉氏建武初入居西河美稷後漢中平單于羌渠使子於扶羅將兵助漢討平黃巾會羌渠爲國人所殺於扶羅以其衆留漢自立爲單于屬董卓之亂寇掠太原河東屯於河內於扶羅死弟呼廚泉立以於扶羅子豹爲左賢王卽元海之父也入朝魏武因留之分其衆爲五部以左賢王豹爲左部帥其餘部帥皆以劉氏爲之太康中改置都尉雖分屬五部皆家于晉陽汾澗之濱豹妻呼延氏魏嘉平中祈子於龍門有一大白魚頂有一角軒鬚躍鱗而至祭所久之

乃去巫覡皆異之曰此嘉祥也其夜夢所見魚變爲人左手把一物大如雞子光景非常授呼延氏曰此是日精服之生貴子寤以告豹豹曰吉徵也自是十五月而生淵淵生左手有文曰淵海遂以爲名幼而好學不舍晝夜常謂同門生朱紀范隆等曰吾每觀書傳常鄙隨陸之無武絳灌之無文一物之不知固君子耻之也二生遇高皇不能建封侯之業兩公屬太宗不能開庠序之美惜哉於是文學武事並皆工絕援臂善射膂力過人身八尺四寸鬚長三尺餘當心有赤毫毛三根長三尺六寸太原王渾虛襟友之命子濟拜焉咸熙中爲任子在洛陽晉文王深待之時東萊王彌等皆憑結渾又屢言之晉武帝帝召見與言

大悅之后謂王濟曰劉元海容貌風儀機談鑒智雖由余曰礪無以加也會父豹卒帝以淵代爲左部帥轉寧朔將軍監五部軍事大安中惠帝失政諸王迭相殘廢州郡奸豪所在蜂起從祖北部都尉左賢王劉宣等議曰今司馬氏骨肉相殘興復此時矣左賢王淵姿器絕人幹宇超世天不恢崇單于終不虛生此人也於是共推淵爲大單于淵曰當爲崇岡峻阜何能爲培塿乎夫帝王豈有常哉大禹生於西戎文王生於東夷顧惟德所授耳今見衆十餘萬皆一當晉十鼓行摧亂晉猶拉枯耳上可成漢高之業下不失爲魏武何呼邪韓足道哉宣等稱善元熙元年遷於左國城晉人東附者數萬宣等上尊號淵曰今

晉氏猶在四方未定可仰遵高祖法且稱漢王權停皇帝之號待宇宙混一當更議之十月爲壇南郊僭漢王位改晉永興元年爲元熙元年大赦天下追尊劉禪爲孝懷皇帝立高祖以下三宗五祖之神主而祭之置百官以劉宣爲丞相拜授各有差四部之東萊王彌起兵青徐遣使來降拜鎮東大將軍青州刺史東萊郡公四月汲桑叛自稱趙王選置州郡十一月石勒及胡部等帥衆來降永鳳元年七月鳳凰集于蒲子丞相劉宣等六十四人上尊號十月僭卽皇帝位于南郊大赦改元以衛軍和爲大將軍撫軍聰爲車騎大將軍建武曜爲龍驤大將軍河瑞元年遷都平陽汾水得玉璽大赦改元二年以大司馬梁王和爲皇太子八月淵寢疾以劉洋爲太傅延年爲大宰司徒聰爲大司馬大單于並錄尚書事置單于臺于平陽西薨于光極殿太子和卽位聰自西明門攻斬和于西室九月葬淵于永光陵謚曰光文皇帝廟號高祖

劉聰

崔鴻十六國春秋前趙錄曰劉聰字元明一名載淵第四子母張夫人在孕夢日入懷寤而告淵淵曰吉徵也自是十五月而生聰夜有日光之異左耳有一白毫長二尺餘幼而聰悟究通經史百家之言孫吳兵法靡不誦之猿臂善射彎弓三百斤膂力驍捷冠絕一時永嘉四年僭卽帝位于光極前殿大赦改元光興元年以衛尉呼延宴爲使

持節前鋒大都督配禁兵二萬七千自宜陽入洛川命東
萊王彌及鎮軍石勒進軍會之晏比及河南王師前
後十二敗晉師長驅圍洛陽陷之縱兵大掠幽晉帝于端
門殺晉太子及百官已下二十餘人於洛水北築爲京觀
遷帝及太后侍中庾珉等于平陽大赦改元嘉平元年二
月晉帝進號儀同三司會稽郡公聰引帝入譙謂曰卿爲
豫章王時朕曾與王武子相造武子示朕於卿卿言聞其
名久矣以卿所作樂府歌文示朕謂朕曰聞君善爲辭賦
試爲看之朕時與武子俱爲盛德頌卿稱善久之又引朕
射于皇堂朕得十一籌卿與武子俱得九籌卿贈朕柘弓
銀硯頗憶否帝曰臣安敢忘之但恨爾曰不早識龍顏耳

聰曰卿家骨肉相殘何其甚也帝曰此殆非人事皇天之
意也大漢將應乾受歷故爲陛下自相驅除耳且臣家若
能奉武皇之業九族敦睦陛下何由得之三年春正月宴
於光極前殿通晉帝行酒庾珉王雋等起而大哭聰惡之
三月丁未懷帝崩于平陽於是誅珉等三月立貴嬪劉氏
爲皇后四月愍帝卽位於長安車騎曜等攻長安河東地
震雨于平陽建元元年正月黑霧四塞着人如墨五日而
止辛酉庚時日落地三日相承出於西方東行平陽地震
崇明觀陷爲池水赤如血赤氣至天有赤龍奮迅而去流
星起于牽牛入紫微龍形透迤其光照地落于平陽北十
里視之則肉臭聞于平陽長三十步廣二十七步肉旁常

有哭聲晝夜不止聽甚惡之癸未劉后產一蛇一虎各害人而走尋之不得頃之見在隕肉之旁己丑劉氏卒乃失此肉哭聲亦止十一月以晉王粲爲國相大單于總百揆十二月宣光陵石人皆行數步宮中鬼哭麟嘉元年武庫陷入地一丈五尺聰自去冬至是遂不復受朝賀軍國之事一決於粲立市於后庭與宮人宴戲或三日不醒秋七月河東大蝗唯不食粟豆司隸靳準率部民收而埋之哭聲聞於十餘里後乃鑽土飛出復食黍豆大司馬曜攻陷長安外城九月犬與豕交于宮門有豕著進賢冠昇聰御坐犬冠武冠帶綬與豕並昇俄而鬪死殿上宿衛莫有見其入者長安飢甚死者過半麴允爲粥以供帝膳帝泣曰

今窘厄如此外無救援勢不自支乃使侍中宋敞奉牋降曜敞隨使者至帝肉袒牽羊輿櫬銜璧出降東門曜受璧焚櫬遷愍帝及司徒梁汾驃騎麴允等諸臣百餘人至于平陽聰臨光極殿帝稽顙前麴允伏地大哭扶不能起聰大怒允自殺以帝爲光祿大夫懷安侯以大司馬曜假黃鉞大都督陝西諸軍事太宰秦王三年正月東平王約卒十一月聰校獵士林以晉帝行車騎大將軍戎服執戟前導行三驅之禮觀者皆指帝曰此故長安天子聚而觀之故老亦有悲泣者十二月大饗于光極前殿聰欲觀晉臣之意使帝行酒洗爵裏衣又使帝執盃多有悲泣或有失聲者尚書郎辛賓起而抱帝大哭引出斬之戊戌愍帝崩于

平陽三年聽所居螽斯則百堂 灾 焚 會稽王康已下
二十一人一子焚焉而卒自此鬼哭宮中至于九月日夜聲
不絕四月尚書令王監崔懿之等極諫聰大怒收監等斬
之秋七月鬼哭于光極殿聰晝見東平王約甚惡之徵秦
王曜爲丞相錄尚書事固辭仍以丞相領雍州牧斬準爲
大司空領司隸校尉癸亥薨于建始殿甲子粲卽位大赦
改元漢昌葬宣光陵謚曰武皇帝廟號烈宗八月以丞相
曜爲相國大都督司空斬準爲大將軍領尚書事粲荒耽
酒色遊宴后庭軍國之事一決於準準遂勒兵入宮執粲
數而殺之追謚靈帝劉氏無少長男子盡刑於市發掘二
陵焚燒宗廟鬼大哭聲聞百里準自號漢大王置百官遣

使稱藩于晉相國曜自長安赴難

前趙錄曰永嘉元年十二月大將軍東平王約卒一指猶
煖遂不殯殮至甲戌乃蘇言見淵於不周山經五日遂復
從至崑崙山三日而復反於不周見諸王公卿將相死者
悉在大有人民宮室壯麗號曰蒙珠離國淵謂約曰東北
遮須夷國無主久待汝父爲之汝后二年當來後國中大
亂相殺害吾家死亡畧盡俱可永明輩數十人在耳汝但
還後年當來見汝不遲不久約拜辭而歸道過一國曰猗
尼渠余國引約入宮與皮囊一枚曰爲吾遺漢皇帝約辭
而歸謂約曰劉郎後年來必見過當以女相妻約歸置皮
囊於机上俄而蘇謂左右曰机上取囊來左右取得開有

一方白玉題文曰猗尼余渠國天王敬信遮須夷國天王
歲在攝提當相見馳使奏呈聰曰若當如此吾不懼死也
及聰以戊寅歲薨與比玉并葬馬

劉曜

崔鴻十六國春秋前趙錄曰劉曜字永明淵之族子少孤
見養於淵幼而聰慧性拓落高亮與衆不羣鐵厚一寸射
而洞之身長九尺三寸手垂過膝生而眉白目有赤光鬚
不過百餘根皆長三尺光初元年十月太保呼延晏等自
平陽來奔上尊號於曜僭卽皇帝位十二月斬準左右軍
騎喬泰王騰等殺準奉六璽來降二年夏四月徙都長安
立子熙爲皇太子六月繕宗廟社稷南北郊于長安令曰

蓋王者之興必禘始祖我皇家之先出自夏后居于北夷
世跨燕朔光文以漢有天下歲久恩德結于庶民故立漢
祖宗之廟以懷民望昭武因循遂未峻革今欲除宗廟改
國號御以大單于爲太祖其議以聞於是太保呼延晏等
議曰今宜承晉母子傳號以光文本封盧奴中之屬城陸
下勲功茂於平洛終於中山中山分野屬大梁趙也宜革
稱大趙遵以水行曜從之於是以冒頓配天淵配上帝三
年五月西明門內大樹風吹折經一宿樹撥撥變爲人形
髮長一尺鬚眉三寸皆黃白色有斂手之狀亦有兩脚着
履之形唯無目鼻每夜有聲十日而生柯條遂爲大樹枝
葉甚茂四年將於霸陵西南營壽陵侍中喬豫和苞上疏

諫曰伏聞勅旨將營建壽陵將周圍四十里下深二十五丈以銅爲棺槨黃金飾之臣聞堯葬穀林市不改肆顓頊葬高陽下不及泉聖王之於終也如是秦始皇下銅三泉周輪七里身亡之後毀不旋踵閻王之於終也如此從喪亂以來漢帝諸陵咸見踐辱唯霸陵獨全此雖太宗之達至然抑亦釋之之功興亡奢儉炯然於前唯陛下覽之矧大悅終南山崩所得白玉一尺有字曰皇亾皇亾敗趙昌以爲已瑞羣臣咸賀中書監劉均曰山崩石壞國傾民亂皇亾皇亾敗趙昌者此言皇室將爲趙所敗趙因之而昌大趙都於秦雍而勒跨全趙趙昌之應當在石勒不在我也矧憮然改容五年矧后羊氏卒故晉惠后也洛陽之陷

納之六年正月天裂廣一丈餘長五十丈十一年七月石虎率衆四萬人寇擾河東進攻蒲坂矧盡中外精銳自潼關北濟虎懼引師而還矧追而敗之枕尸二百餘里虎奔朝歌遂攻石生於金墉分遣諸將攻討汲郡河內十二月勒自帥衆拒之陣於洛西矧性少酗酒末年尤甚將戰飲數斗常乘赤馬無故蹋頓乃乘小馬比出復飲斗餘至西陽門搗陣就平勒將石堪因而乘之師遂大潰矧昏醉奔退而馬陷石渠墜於冰上爲堪所執勒將還襄國喻矧使與太子毗書令速降矧但勅毗與諸臣匡維社稷勿以吾易意建平末爲勒所殺十二年正月太子毗大司馬南陽王膺等議欲西保秦州遂相率奔上邽石虎乘勝追戰枕尸

千里上邽潰虎執毗及王公已下三千餘人皆殺之自劉淵建號西河至是二十有六載

晉書載記曰曜在位十年而敗始元海以懷帝永嘉四年僭立至曜三世凡二十有七載以成帝咸和四年滅

太平御覽卷一百十九

太平御覽卷一百二十

偏霸部四

後趙石勒

石弘

石虎

石閔

石勒

崔鴻十六國春秋後趙錄曰石勒字世龍上黨武鄉羯人父周易朱勒生時赤光滿室白氣自天屬于庭中長而壯健有胆力雄武好騎射幼而力耕每聞鞞鐸之聲或在前後懼以告其母母曰作勞耳鳴非不祥也會并州刺史司馬騰執諸胡山東賣充軍實將詣冀州兩胡一柳勒亦在中東至平原賣與桂平人師權爲奴每夜於野嘗聞鼓角之聲諸奴亦聞歸以白權權奇而免之隣於馬牧率汲桑

往來勒以能相馬自託於桑而傭於武安臨水爲遊軍所
囚會有羣鹿旁過軍人競逐之勒乃獲免俄而見一老父
謂勒曰向羣鹿者我也君應爲中州主故相救耳勒拜而
受命遂招集王陽夔安等十八騎復東如赤龍諸苑中乘
苑馬遠掠繒寶以賂汲桑永興元年關東所在盜起二年
陽平人公師蕃等自稱將軍起兵趙魏衆至數萬勒與汲
桑率牧人乘苑馬數百騎以赴之桑始命勒以石爲姓以
勒爲名永嘉元年勒歸劉淵拜爲輔漢將軍平晉王淵薨
聰襲位劉曜王彌圍洛陽勒帥精騎二萬會之王彌旣平
洛陽將先誅勒勒請彌燕子已營手斬彌而并其衆將軍
郭默獲沙門竺浮圖澄以其有道術進之於勒試之有效

甚尊重之前趙嘉平二年張賓說勒曰邯鄲襄國趙之舊
都依山憑險形勢之固可擇此二邑而都之然後命將四出
授以奇畧王業可圖石勒於是進據襄國聰授勒都督幽
冀并營四州諸軍事冀州牧進封本郡上黨公邑萬戶三
年勒以征虜將軍石虎爲魏郡太守鎮鄴三臺篡奪之萌
兆於此矣前趙麟嘉元年劉琨遣姚澹帥衆來討勒與戰
澹軍大敗琨長史李弘以并州來降七月劉聰疾甚以勒
爲大將軍錄尚書事受遺詔輔政勒固辭乃止劉曜稱尊
號將授勒太宰大將軍加九錫增封十郡并前二十郡出
入警蹕如曹公輔漢故事曜聞平樂之言停太宰之授勒
大怒曰趙王趙帝孤自取之名號大小豈爾所呼耶征虜

將軍虎與左右長史張敬張賓等上疏曰大司馬雖位冠
九台非伯者之號請改稱大將軍大單于領冀州牧趙王
依魏主在鄴故事以二十四郡戶二十九萬爲趙國十一月勒卽
位改光初二年爲道王元年始建社稷立宗廟主書司典
胡人出內重其禁法不得侮易衣冠華族號胡爲國人二
年令曰國人不聽報婢及在喪婚娶至於燒葬令如本俗
八月始置軒懸之樂八佾之舞作金根大輅黃屋左纛天
子禮樂於斯備矣三年黎陽民陳武妻產三男一女上書
自陳令曰昔周之興也四乳八子今武妻一乳四子可謂
慶過姬祥美加曩日其賜乳婦一人穀百石雜繪十四疋
庶以肅迎嘉祥冬十月勒親與鄉老齒坐懽飲語及平生

勒曰李陽壯士也孤方任之何以不來父老歸語令速來
漚麻之忿是布衣之恨孤方崇信于天下寧讎匹夫乎
令曰武鄉吾之豐沛也其復之三世十一月李陽至勒與
酣譁引陽臂笑視之曰卿雖老臂中猶有力頗復與人鬪
否孤往日厭卿老拳卿亦飽孤毒手因賜里第一區拜爲
都尉陽與勒隣居歲常爭漚麻池迭相歐擊四年二月拜
子弘爲世子勒雅好文學雖在軍旅之中常令儒生讀春
秋史漢諸傳而聽之聞酈食其勸立六國後大驚曰此法
當失何以得成天下至留侯諫乃曰賴有此侯耳其天資
英達如此八年八月修三臺十月以世子衛將軍弘鎮鄴
太和十年劉曜圍洛陽襄國大震勒統步騎四萬赴金墉

濟自大碣先是流澌風猛軍至冰泮清和濟畢流澌大至
勒以爲神靈之助命曰靈昌津戰于西陽門曜軍大潰石
堪執曜送之二年曜子熙等去長安奔于上邽車騎虎尅
上邽遣主簿趙封奉傳國玉璽送之秦隴悉平建平元年
二月車騎石虎等上尊號勒不許固請勒以趙天王行皇
帝事大赦八月羣臣又固請以名位不正宜卽尊號九月
僭卽皇帝位大赦改年正月勒南郊有白氣自壇屬天勒
大悅四月勒如鄴議營新宮廷尉續咸諫曰臣聞唐虞之
治采椽茅茨土階三尺美彰于詩書漢文惜百金不營露
臺稱之於千古迨夏商之瓊臺瑤室楚秦章華阿房資財
內竭華夷外叛勒詔曰且勅停作以申吾直臣之氣九月

以太尉中山王虎爲大司馬程遐開府儀同是月大霖雨
中山西北暴水漂流巨木萬餘根集于堂陽勒大悅謂公
卿曰此非爲災天意欲吾營鄴都耳於是營之勒以成周
漢晉舊京欲有移都之意乃命洛陽爲南都置行臺治書
侍御史于洛陽三年正月大饗于建德殿酒酣勒謂徐光
曰朕方自古開基何等主也光對曰陛下神武籌畧邁于
高皇雄藝卓犖超絕魏武自丕以來無可比也其軒轅之
亞乎勒笑曰人豈不自知卿言亦已太過朕若逢高皇當
北面而事之然猶與韓彭競鞭而爭先耳倘遇光武當並
驅于中原未知鹿死誰手大丈夫行事當礪礪落落如日
月皎然終不能如曹孟德司馬仲達父子欺他孤兒寡婦

狐媚以取天下也朕在二劉之間耳軒轅豈所擬乎羣臣皆稱萬歲四年雍州刺史石生上言西鄉行死蛇與鼠鬪於安定府間二日蛇死臨涇馬生角長安城中鷄鳴音皆曰基慈安定廳事前後聞誦書聲求之不得七日乃止隕石于肥鄉六月勒寢疾召中山王虎太子弘中常侍嚴震等侍疾禁中七月薨于西閣偽謚明皇帝號高祖

石弘

崔鴻十六國春秋後趙錄曰石弘字大雅勒第二子母程

夫人右光祿遐之妹建平元年立爲太子虛矜愛士好爲文詠其所親昵莫非儒素勒謂徐光曰大雅悖悖殊不似將家子光曰漢祖以馬上得天下孝文以元默治之聖人之後必世勝殘天之道也勒大悅程遐言於勒曰中山快怏不可以輔少主宜早除之以便大計勒不從勒薨虎執政臨軒召子冀州刺史邃帥兵入禁宿衛文武無不奔散弘大懼策拜中山王虎爲丞相以十三郡封爲魏王又加九錫虎僞讓後乃受之延熙元年七月改頓邱爲魏國分魏郡立黎陽十月弘資璽綬親詣魏公喻禪意虎曰弘昏昧愚暗處喪無禮不可以君臨萬國奉承宗廟便當廢之云何禪讓十一月廢弘爲海陽王弘就車容色自若幽弘

及太后南陽王恢于崇訓宮尋殺之時年二十二

石虎

崔鴻十六國春秋後趙錄曰石虎字季龍勒之從子勒父朱幼而子之故或謂之勒弟晉永興中與勒相失嘉平元年劉琨送勒母王及虎于葛陂時年十七性殘忍好馳獵誼遊無紀度尤善彈數彈人軍中每患之勒白王曰此兒凶暴無使軍人殺之聲名可惜宜自除也王曰快牛犢子小時多能破車爲復小忍勿怯之至十八檢攝恭謹嚴重愛士弓馬迅捷勇冠當時勒深嘉焉拜征虜將軍性酷虐無道軍中勇幹策畧與已侔者輒因事害之至於降城陷壘坑斬士女鮮有遺類勒屢加責誨而行意自若然御衆

嚴而不煩莫敢犯者指授攻討所向無前故勒寵信彌隆仗以專征之任旣廢殺弘稱居攝趙天王建武元年正月大赦改元虎志荒內遊外耽營繕使太子邃省可尚書奏事選守牧祀郊廟惟征伐刑斷乃親覽之二月南遊臨江而還江東大震是日觀省臺城賜匠有差九月遷都鄴宮三年徙洛陽鐘簾九龍翁仲等于鄴是歲太武殿東西宮皆就太武殿基二丈八尺下穿伏室置衛士五百人於其中東西七十五步南北六十五步皆漆瓦金鏘銀楹金柱珠簾玉壁窮極伎巧起靈風臺九殿於顯陽後選召百官州郡民女以充之后庭服綺縠玩珍奇者萬餘人內置女官十八等教宮人星占及馬步射置女太史于靈臺仰觀

災祥以考外太史之虛實禁郡國不得私學星讖左校令
成公段造庭燎于崇杠之末高十餘丈上盤置燎下盤置
人人絙繳上下虎試而悅之三年太保夔安等文武五百
九十人上皇帝尊號安等方入而庭燎油灌下盤死者七
人虎大怒腰斬成公段于閭闔門卽天王位南郊大赦親
王貶爲郡公藩王爲縣侯太子邃總百揆其後荒酒淫色
驕恣無道或盤于遊畋懸管而入或夜百騎宿于宮臣家
淫其妻妾裝飾宮人美淑者斬首洗血置于盤上傳首視
之又納諸比邱尼有姿色者與其交褻而殺之合牛羊肉
煮而食之亦賜左右所以識其味也虎荒耽內遊威刑失
度邃以事爲可呈呈之虎怒曰小事何足呈也時有所不

聞復怒曰何以不呈誚責杖捶月至再三邃甚愠私謂中
庶子李顏等曰官家難稱吾欲行冒頓之事卿從我乎顏
等伏不敢對事發幽邃于東宮殺之及妃張氏并男女二
十六人盡賜死合一棺埋之誅其宮臣友黨二百餘人立
河間公宣爲太子建武六年追尊號考樂平敬公爲太宗
孝皇帝八年六月上黨孟門上有神人之像坐于山上三
日而去虎遣使以太牢祀之九年十二月武鄉送雄虎變
爲雌乳一狼子曰噬虎腦而殺之后三日狼子亦死佛圖
澄聞之流涕十年虎起河橋於靈昌津採石爲中濟石無
大小輒隨流用工五百餘萬不成虎如靈昌津沉壁告誠
壁浮于渚水波上騰津所殿觀莫不傾壞壓死者百餘人

虎恚甚斬工匠而還十一年發雍梁十六萬人城長安未央宮又發司豫荆兗二十六萬人成洛陽宮十三年二月虎親耕籍田于桑梓苑十四年三月虎夢龍飛西南自天落地旦而問澄公公曰禍將至矣陛下宜父慈子和深以慎之四月秦公韜起宣光殿于太尉府梁長九丈太子宣視而惡之斬匠截梁而去韜怒增之十丈宣聞之恚甚謂楊杯牟成等曰韜凶豎悖逆敢違我如是汝等能殺之者吾入宮盡以韜之國邑封汝等韜既死主上必親臨喪因行大事無不濟矣杯等許諾八月殺韜宣奏之虎哀絕久之乃蘇召太子宣鎖繫于郊北火焚殺之議立太子於東堂虎曰吾欲以純灰三斗洗吾腹穢惡故生凶子兒年

二十便欲殺父今世方十歲比其二十吾已老矣齊公世爲皇太子立昭儀劉氏爲皇后十一月享羣臣於太武殿前佛圖澄殿上褰衣而行吟曰棘子成林將壞人衣虎發石而視之有棘子生焉冉閔小字棘奴也十二月辛巳雷大霖兩虎問佛圖澄澄曰其爲我乎至戊子而澄卒大寧元年正月虎僭卽皇帝位于南郊大赦改年二月有沙門從雍州來稱見佛圖澄西入關虎掘之無尸唯有一石虎惡之曰石者朕也葬我而去吾將死矣因而寢疾四月薨於金華殿晉書曰季龍始咸康元年僭立至此太和六年凡在位十五年子世卽位尊劉后爲太后彭城王遵先鎮關右至是勒兵而還戎卒九萬次于蕩陰石閔爲前鋒都督太后令授遵丞相加九錫增

封十郡己丑至安陽亭庚申曜兵入自鳳陽門升太武前殿盡哀退如東閣羣臣敦勸卽位大赦封世爲譙王邑萬戶廢太后劉氏爲昭儀尋皆殺之世立凡三十三日尊其母鄭氏爲皇太后立妃張氏爲皇后大司馬儀陽王鑒爲太傅沛王冲爲太保石閔爲都督中外諸軍事錄尚書事甲午太武殿災諸門觀閣蕩然其服御燒者太半光焰照天月餘乃滅己未雨血周徧鄴城六月葬虎顯原陵僞謚武皇帝廟號太祖十一月石閔劫司空李農及右衛王基密謀共廢遵閔使將軍蘇彥周成帥甲士三十八人執遵于南臺如意觀遵時方與婦人彈碁問周成等曰反者誰也成曰義陽王鑒當立遵曰我尚如是汝等立鑒後能

幾時遂殺之于琨華殿誅鄭太后張皇后遵字大祇虎第九子凡在位者百八十三日鑒卽位大赦以石閔爲將軍封武德王李農爲大司馬鑒使中書令李松殿中將軍張才等夜誅閔農等于琨華殿不克禁中擾亂鑒僞不知夜斬松等于西中華門龍驤將軍孫伏都劉銖等結羯士三千人伏于胡天亦欲誅閔等時鑒在中臺伏都帥三十餘人將升臺挾鑒以攻之鑒見而問其故伏都曰閔農等反已在東掖門臣嚴帥衛士謹先啓知鑒曰卿好陳力勿憂無報也伏都等攻閔不尅閔農攻斬伏都等自鳳陽門至琨華橫尸相枕諸胡羯無少長皆斬之死者二十餘萬人于時高鼻多須至有濫死者青龍初元年正月石閔欲滅

二石之號議曰孔子曰死姓而王七月者七十有三國繼
趙李讖書炳然且德星鎮衛宜改號大衛易姓李氏又夫
赦改元閏月廢鑿殺之誅虎孫三十八人盡殪石氏鑿在
位一百三日鑿字大朗虎第三子也

晉書曰季龍十三子五人爲冉閔所殺八人自相殘害讖
言滅石者尋閔徙封蘭陵公季龍惡之改蘭陵爲武興郡
至是終爲閔所殺石勒以成帝咸和三年僭立二主四子
凡二十三年以穆帝永和五年滅

石閔

崔鴻十六國春秋后趙錄曰石閔字永曾虎之養孫也父
瞻字弘武本姓冉名良魏郡內黃人也其先漢黎陽騎都

耆累世牙門勒破陳午於河內獲瞻時年十二長而勇悍
便弓馬臨陣不顧勒奇之曰此兒壯健可嘉命虎子之歷
位左積射將軍封西華侯閔幼而果銳虎撫之如孫及長
身長八尺善謀勇力絕人虎卽位封爲修武侯歷位北中
郎將虎之敗於昌黎閔軍獨全由此功名大顯永興元年
閔月司徒申鍾司空郎闔等四十八人上尊號於閔僭皇
帝位于南郊大赦改元號稱大魏復姓冉氏追尊祖隆元
皇帝考瞻烈祖高皇帝母王氏爲皇后妻董氏爲皇后
子智爲皇太子以司馬李農爲太宰諸子皆封爲縣公新
興王祗聞石鑿之死稱尊號於襄國改年永寧石祗遣相
國汝陰王石琨帥衆十萬伐鄴六月進據邯鄲閔盡衆拒

之琨軍大敗二年三月閔攻襄國百餘日祇懼乃去皇帝
之號改稱趙王遣太尉張舉乞師于慕容雋中軍張春請
救於姚弋仲三月祇相國汝陰王琨自冀州救祇弋仲復
遣子襄帥騎三萬八千雋遣將軍悅綰帥甲士三萬勁卒
十三萬四方攻之祇衝其後閔師大敗閔與千餘騎奔還
鄴祇使劉顯帥衆十萬追奔伐鄴閔盡衆出戰大敗之追
奔至於陽平顯懼密使請降求殺石祇爲効四月劉顯殺
祇及其丞相樂安王炳太保張舉等遣拜顯上大將軍大
單于單州牧祇炳皆虎之庶子也七月劉顯稱尊號襄國
三年二月劉顯帥衆伐常山太守蘇彥告難閔帥騎八千救
彥敗顯于常山追奔及于襄國顯大將軍曹伏駒開門爲

應遂入襄國誅顯及其公卿已下百餘人焚襄國宮室遷
其民于鄴三月慕容雋已剋幽薊畧地至于冀州閔帥騎
擊之與慕容恪遇於魏昌城恪方陣而前閔衆寡不敵所
乘赤馬曰朱龍日行千里潰圍出東奔二十餘里馬無故
而死遂爲恪所擒送之于薊雋立閔而問之曰汝奴僕下
才何敢妄稱天子閔曰天下大亂爾曹夷狄人面獸心尚
欲篡逆我一時英雄何爲不可作帝王耶雋怒鞭之三百
遣慕容評帥衆圍鄴五月送閔于龍城告鹿皝廟而殺之
鄴中飢人相食虎時宮人被食畧盡冉智尚幼蔣幹遣詹
事劉猗奏表降晉八月長水校尉馬願龍驤將軍田香開
門降評蔣幹懸縋而下奔于倉垣評送閔后董氏太子智

太平御覽卷一百二十一
太尉申鍾及諸王公卿于薊初慕容雋斬閔于遼陁山
左右七里草木悉枯蝗蟲大起自五月不雨至于十二月
雋遣使者祀之謚曰武悼天王其日大雨雹是歲太和八
年也

太平御覽卷一百二十一

慕容皝

太平御覽卷一百二十一

慕容皝

多冠步搖冠意甚好之遂斂髮襲冠諸部因呼之爲步搖其後音訛遂爲慕容焉祖木延左賢王從母邱儉征高麗有功加號大都督父涉歸以全柳城之勲進拜單于遷邑遼東於是漸變胡風自云慕二儀之德繼三光之容遂以慕容爲姓庖身長八尺有大度晉安北將軍張華一見奇之謂曰君後必爲命世之器匡難濟時者也涉卒弟耐立將謀殺庖庖亡潛於遼東徐郁家太康五年國人殺耐迎庖立之太康十年又遷于徒河之青山元康四年定都大棘城所謂紫蒙之邑也永嘉六年王浚承制以庖爲散騎常侍冠軍將軍前鋒大都督大單于皆讓不受擢舉賢才官方授任魯國孔纂宿德清望請爲賓友平原劉讚儒學

該通引爲東牟祭酒其世子皝率國胄受業焉大興四年晉遣謁者拜庖使持節督幽平東夷諸軍事車騎將軍平州牧封遼東郡公丹書鐵券承制海東咸和元年加侍中位特進八年夏五月薨于文德殿年六十五葬于青山晉遣使者贈車騎大將軍開府儀同三司謚襄公皝爲燕王謚武宣王舊稱尊追尊武宣帝廟號高祖 晉書曰庖在位四十九年

慕容皝

崔鴻十六國春秋前燕錄曰慕容皝字元真庖第二子小字萬年長七尺八寸雄毅善權畧博學多材藝晉建武元年振武將軍永昌初拜左賢王太寧末拜平北將軍朝鮮公咸和八年六月卽遼東公位行平州刺史督攝部內九

年八月晉遣謁者拜皝鎮軍大將軍平州刺史大單于遼東公承制一如虜故事二十一年七月立子雋爲世子四年以左司馬封奕爲長史九月奕等以皝任重位輕宜稱燕王於是上議十月僭卽燕王位于文德殿大赦境內改備羣司以封奕爲相國追尊先公爲武宣王先妣爲王后起文昌殿出入警蹕立夫人段氏爲王后世子雋爲太子是歲棘城黑石谷有大石自立而行八年七月晉使鴻臚郭忱持節拜皝侍中大都督河北諸軍事大將軍燕王其餘官皆如故封諸功臣百餘人九月遷都龍城宮闕十二年四月黑龍一白龍一見于龍山皝率羣寮觀之去龍二百步祭以太牢二龍交首嬉翔解角而去皝大悅赦境內號新

宮曰和龍立龍翔佛寺于山皝雅好文籍親造太上章以代急就又著典誠十五篇並以教胄子十四年皝親臨東庠考試學生其通經秀異者擢充近侍十月饗羣僚于承乾殿右長史宋諺性貪賜布百疋令自負而歸以愧其心十五年八月皝因見白兔馳射之馬倒被傷輦而還宮引太子雋囑以後事謂曰今中原未平方須經建委賢任哲此其時也恪智勇兼濟力堪任重汝其委之以成吾志九月薨于承乾殿年五十二冬十月葬龍山謚文明王雋稱尊追尊曰文明皇帝廟號太祖陵曰龍平

晉書曰皝嘗田于西鄙將濟河見一老父服朱衣乘白馬舉手麾皝曰此非獵所王其還也祕之不言遂濟河連日

大獲後見白虎馳射之馬倒被傷乃說所見輦而還宮引
雋囑以後事以永和四年死在位十五年

慕容雋

崔鴻十六國春秋前燕錄曰慕容雋字宣英皝第二子小
字賀賴跋十三月而生有神光之異身長八尺一寸善屬
文雅長辭賦至於器物車室豈露讚以爲勸戒皝之八
年晉遣使者拜皝燕王以雋爲安北將軍東夷校尉十一
年晉拜使持節鎮東將軍皝薨卽燕王位赦其境內元年正月依春
秋列國故事稱元年五月間趙亂乃嚴兵將爲進取
之計七月晉使謁者陳沈拜雋侍中河北諸軍事幽冀并
平四州牧大將軍燕王承制封拜一如庖皝故事元璽元

年正月司南車成雋大悅告于皝廟四月遣輔國恪相國
奕討冉閔戰于魏昌廉臺閔師大敗擒送之閔大將軍蔣
幹輔閔子智固守鄴城遣輔弼評等帥騎一萬以討之鄴
北郡縣悉降輔國奕等一百一十人勸稱尊號令曰非常
之事匪寡德所宜聞也八月尅鄴輔弼評等送閔后董氏
太子智太尉申鍾并乘輿服物及六璽送于中山傳國璽
蔣幹先以送晉雋欲神其事業言歷運在己乃詐云
得之賜閔妻號奉璽君封冉智爲海濱侯以輔弼評爲司
州刺史鎮鄴十月輔國恪等五百五人奉皇帝璽十一月
僭卽皇帝位于正陽前殿大赦改年時晉遣使詣雋雋謂
之曰還白汝天子我承人乏爲中國所推己爲帝矣庚午

書曰追崇祖考古人之令典尊武宣王爲高祖武宣皇帝
文明王爲太祖文明皇帝二年正月立后可足渾氏爲皇
后光壽元年正月復立中山王暉爲皇太子赦其境內改
年曰光壽初虜有駿馬曰赭白有奇相逸力石虎之伐棘
城皝將出避難欲乘之馬悲鳴蹄齧人莫能近皝曰此馬
見異先朝孤嘗仗之濟難今不欲出者蓋先君之旨也乃
止虎尋奔退皝益奇之至是年四十九歲而駿逸不虧雋
比之鮑氏驄命鑄銅以圖其像親爲銘讚鐫勒其旁置之
薊城東掖門是月像成而馬死十一月自薊遷鄴十二月
入鄴宮大赦繕宮殿復銅雀臺以吳王垂爲東夷校尉平
州刺史鎮遼東二年三月常山寺大樹自拔根出得壁二

十七圭七十三光色精奇有異常玉雋以爲岳神之命遣
尚書郎段勤以大牢祀之五月遼西獲黑兔三年三月雋
夜夢石虎齧其鬢寤而惡之命發其墓剖棺出屍踏而罵
之曰死胡安敢夢生天子遣御史中尉楊紇數其殘酷之
罪鞭而投之漳水十二月雋寢疾謂大司馬恪曰吾患悒
頓恐不濟修短命也復何所恨但二寇未除景茂冲幼慮
其未堪家國多難吾欲遠追宋宣以社稷屬汝恪曰太子
雖幼天縱聰聖必能勝殘致暴不可以亂正統雋怒曰兄
弟之間豈虛飾乎恪曰陛下若以臣堪荷天下之任者寧
不能輔少主也雋曰若汝行周公之事吾復何憂四年正
月雋薨于應福前殿年五十三僞謚景昭皇帝廟號烈祖

葬龍陵雋雅好文籍性嚴重未曾以慢服臨朝雖閒居宴處亦無懈怠之色
晉書曰雋在位十一年自初卽位至于末年講論不倦覽政之暇唯與侍臣錯綜義理凡所著述四十餘篇也

慕容暉

崔鴻十六國春秋前燕錄曰慕容暉字景茂雋之第三子元璽三年封中山王尋立爲皇太子光壽四年僭卽帝位大赦改元建熙元年以大原王恪爲太宰錄尚書行周公事專百揆上庸王評爲太傅贊朝政司空陽鶩爲太保吳王垂爲河南大都督十州諸軍事苑川牧鎮梁國四年正月暉南郊十月太尉奕迎神主子和龍初暉委政太宰恪

專受經于博士王勸助教尚鋒秘書郎杜詮並以明經講論左右至是通諸經祀孔子于東堂以勸爲國子祭酒鋒國子博士詮散騎侍郎其執經侍講皆有拜授八年太宰恪卒九年十二月有神降于鄴自稱湘女有聲與人相接數日而去十年四月立貴妃可朱渾氏爲皇后六月晉大司馬桓温率衆五萬來伐遂至枋頭吳王垂大敗之斬獲三萬餘級温奔還淮南垂旣敗温威德彌振太傅評大不平之太后遂與評謀殺垂十二月垂出奔秦十一年六月秦輔國將軍王猛鎮南將軍楊安率衆六萬來伐以太傅評下邳王厲等帥精兵三十萬拒秦師于潞州州郡盜賊大起鄴中恠異非常十月評及猛戰于潞州評師敗績單

騎遁還猛乘勝追奔長驅至鄴十一月苻堅帥衆會猛夾
攻拔鄴城外亂散騎侍郎徐蔚等率扶餘高句麗及上黨
質民子弟五百人夜開城北門引納秦師暉與太傅評左衛
將軍孟高等數十騎出奔昌黎堅遣將軍郭慶帥騎五千
追之及暉于高陽秦將巨武執暉將縛之暉曰汝何小人
而敢縛天子武曰我梁山巨武受詔縛賊何謂天子耶執
暉送鄴堅問其奔狀暉曰狐死首邱欲歸死于先人陵墓
耳堅哀而釋之令還宮率文武出降堅入鄴宮昇正陽殿
徙暉及王公已下並諸鮮卑四萬餘戶于長安封暉新興
郡侯邑五千戶尋拜尚書堅征臺城爲平南將軍別部都
督淮南之敗隨堅還長安旣而吳王垂攻苻丕于鄴中山

王冲起兵關中暉謀殺堅事發爲堅所誅年三十五德僭
稱尊號僞謚幽皇帝太康元年歲次丙申中車駕大駕重
晉書曰始鹿以武帝太康六年稱公至暉四世暉在位十
一年以海西公太和五年滅鹿孰凡八十五年

前秦苻洪

崔鴻十六國春秋前秦錄曰苻洪字廣世畧陽臨渭氏人
其先有扈氏之苗裔子孫強盛世爲氏酋其後家池生蒲
長五丈節如竹形時咸異之謂之蒲家因以爲氏焉父懷
歸爲部落小帥母姜氏寢產洪先是隴右大雨霖百姓苦
之謠曰雨若不止洪水必起故名之曰洪年十二父卒代
爲部帥好學多權畧嘗騎射屬劉氏之亂乃散千金招延

俊傑戎晉襁負奔之推爲盟主劉聰遣使拜平遠將軍不受自稱護氏校尉秦州刺史畧陽公羣氏推爲首劉曜以洪爲氏王及曜敗于洛陽洪率部人西保隴山石虎將軍攻上邽洪詣虎降虎跣出迎之拜冠軍將軍監六夷諸軍事涇陽伯趙建平四年石生起兵于關中洪遂西結張駿自稱晉北平將軍雍州刺史石虎旣滅生洪率戶二萬下隴東如馮翊虎拜洪護氏校尉進爵爲侯徙秦雍州民羌十餘萬戶于關東遷洪龍驤將軍流民都督處于枋頭從征段遼有功進封平西郡公佛圖澄觀苻氏有王氣虎陰欲殺之洪稱疾不朝太寧元年進位侍中車騎大將軍開府儀同三司雍州刺史進封本國畧陽郡公時姚弋仲亦圖

據關中恐洪先之遣子襄率五萬來伐洪洪迎擊敗之於是安定梁楞等並率關西民望說洪曰今胡運將終中原喪亂明公神武自天繼蹤周漢宜稱尊號以副四海之望洪以讖文有草付應王又孫堅之生背有艸付字遂改姓苻氏自稱大將軍大單于三秦王初趙將軍麻秋西鎮枹音符罕聞冉閔之亂率衆歸鄴洪使子龍驤雄逆擊獲之以秋爲軍師將軍秋說洪西都長安旣而秋因宴鳩洪將併其衆世子健收而殺之洪將死謂健曰關中周漢舊都形勝之國吾亡之後便可鼓行而西言終而薨年六十六

苻健

崔鴻十六國春秋前秦錄曰健字建業洪第三子母姜氏

夢感大羆而孕生之夜洪夢族曹氏王指健謂之曰是兒
興家門可以吾名字之於是名羆字世建後避石虎外祖
張羆之名故改焉晉永和六年自稱征西大將軍開府都
督關西諸軍事雍州刺史於是盡衆西行至盟津起浮橋
以濟濟訖焚橋三輔堡壁悉降十一月入都長安左長史
賈元碩等依諸葛亮劉備故事表健爲秦王元碩等爲上
尊號健僞讓再三乃從之皇始元年正月僭卽天王位于
南郊大赦改晉永和七年爲皇始元年追尊父洪爲太祖
武惠皇帝繕宗廟社稷於長安立妻強氏爲天王皇后子
萇爲皇太子靚爲平原公生爲淮南公弟雄丞相爲東
海公其餘封授各有差是年野蠶成繭野禾被原百姓採

野繭而收野粟而食關西家給人足三年正月丞相雄等
固請宜依漢晉兼皇王之美不可過自謙沖同趙之初號
健從之僭卽皇帝位于太極殿大赦諸公進爵爲王立五
等之封以次進之三年正月下書曰其自公卿已下歲舉
賢良方正孝廉清才多畧博學秀才異行各一人或獻書
規諫或面陳朕過其悉以聞勿拘貴賤四年丞相東海王
雄卒贈相國進封魏王謚敬武王雄字元才洪之季子也
建武中拜龍驤將軍雄頭大足短故軍中稱爲大頭龍驤
健甚重之曰兄才吾之姬且五年四月立淮南王生爲皇
太子六月健寢疾引太師魚遵丞相雷弱兒太傅毛貴司
空王隨等囑以後事受遺輔政乙酉薨于太極前殿年四

十九葬原陵偽謚明皇帝廟號世宗永興初追尊曰景明
皇帝廟號高祖

苻生

崔鴻十六國春秋前秦錄曰苻生字長生健第三子幼而
寵暴昏酒無賴祖洪甚惡之無一目七歲洪戲之問侍者
曰吾聞瞎兒一淚信乎侍者曰然生怒引佩刀自刺出血
曰此亦一淚耶洪大驚鞭之生曰性耐刀槩不堪鞭捶洪
曰汝爲爾不己吾將以汝爲奴生曰可不如石勒也及長
力舉千鈞走及奔馬皇始五年僭卽皇帝位大赦改年羣
臣奏先帝晏駕甫爾不宜改號生怒不從窮推議主壽光
元年七月殺右僕射段純以太子門大夫趙韶爲僕射太

子舍人趙誨爲中護軍著作佐郎董榮爲尚書並以佞倖
進也九月中書監胡文中書令王魚言于生曰比頻有客
星孛于大角熒惑入于東井大角爲帝坐東井秦之分野
不出三年國有大喪大臣戮死願陛下遠追周文修德以
禳之生曰皇后與朕對臨天下亦足以塞大喪之變於是
殺皇后梁氏誅太傅錄尚書毛貴車騎尚書令梁楞左僕
射梁安后安之女孫又誅丞相雷弱兒諸羌悉叛弱兒南
安羌酋也生雖在諒闇遊飲荒淫殺戮無道彎弓露刃以
見朝臣錘鉗鋸鑿備置左右未幾后妃公卿已下至于僕
隸誅五百餘人二年正月嬖臣右僕射董榮言于生曰日
蝕之災宜以貴臣應之生曰惟有大司馬國之懿戚不可

其在王司空生從之誅司空王隨壬戌饗羣臣于太極前
殿飲酒樂奏生歌以和之命尚書令辛牢典勸既而怒曰
何不強酒猶有坐者引弓矢射牢殺之於是百僚大懼無
不引滿昏醉汚服失冠蓬頭僵仆生以爲樂三年四月姚
襄遣姚蘭等帥衆二萬七千進據黃洛生遣兵苻黃眉東海
王堅建節將軍鄧羌等步騎萬五千以討之羌僞不勝引
騎而退襄追之至於三原羌迴騎拒襄大戰獲襄襄有駿
馬日行千里是戰也馬倒而擒之眉等振旅而歸初長安
誣曰東海大魚化爲龍男便爲王女爲公問在何所洛門東
東海苻堅封也時爲龍驤將軍第在洛門之東生荒暴日
滋殘虐彌甚羣臣朔望漏盡請見生曰日知盡乎須待宴訖

或日暮而不出百僚饑弊或至申酉之間方出臨朝酒怒
色厲惟行殺戮或連月昏醉弗堪省覽或使宮人與男子
裸交於殿前引羣臣臨而觀之或生剝牛羊驢馬活爛雞
鴨三五十爲羣放之殿中或生剝死囚面皮令其歌舞觀
以爲樂宗室舊勳親戚忠良殺害畧盡朝士奔走草野皆
曰從虎口出左右得度一日如過十年至於截脛刳胎拉
脇鋸頭殺者動有千數生夜對侍婢曰阿法兄弟亦不可
信明當除之是夜清河王苻法夢神告曰旦將禍集汝門惟
先覺可以免寤而心悸會侍婢來告乃與特進梁平
老強汪等帥壯士數百人潛入雲龍門東海王堅與呂婆
樓帥麾下三百餘人鼓噪繼進宿衛將士皆捨杖歸堅生

猶昏寢不寤堅衆既至生驚問左右曰此輩何等人引生
置別室廢爲越王俄而殺之時年二十三僞謚厲王封子
廋爲越侯

太平御覽卷一百二十一

太平御覽卷一百二十二

偏霸部六

前秦苻堅苻丕

苻登

崔鴻十六國春秋前秦錄曰苻堅字永固健弟雄之子趙
建武中母苟氏祈子於西門豹祠歸而夜夢與神交遂孕
十二月而生堅有神光之異自天燭庭背有赤文隱起成
字曰艸音付臣又土王咸陽堅祕而莫之傳也姿貌魁傑
臂垂過膝目有紫光祖洪奇而愛之名堅頭因而謂健曰
此兒頭大鎮重身長任大足短安下非常相趙石光祿大
夫司隸校尉高平徐統有知人之鑒遇堅於路異之執其

手曰苻郎此官之御街小兒敢戲於此不畏司隸縛耶堅曰司隸縛罪人不縛小兒戲也統顧左右曰此兒有霸王之相後復遇之統下車謂曰苻郎當大貴但僕不及見如何堅曰若如公言不敢忘德八歲請就師學洪曰尚小未可吾年十三方欲求師時人猶以爲速成健之入關也次于曲沃夢天神遣使者朱衣赤冠命拜堅爲龍驤將軍旦而爲壇於曲沃健泣謂堅曰先王昔受此號汝父次爲之今若也若汝復爲神明所授可不勉之性至孝有器度博學多才藝年十一便有經畧大志堅旣殺苻生永興元年六月去皇帝之號僭稱大秦天王卽位太極殿誅董龍等二十餘人改壽光三年爲永興元年追尊父爲文桓皇帝世子

宏爲皇太子兄清河王法爲丞相東海公永安公苻侯爲太尉諸王皆貶爵爲公苻柳爲尚書令封弟融爲陽平公雙爲河南公子丕爲長樂公暉爲平原公熙爲廣平公李威爲左僕射梁平老爲右僕射席寶爲丞相長史王猛爲中書令侍郎權翼爲黃門郎諸公卿爲生所誅者悉復本官十月丞相東海公法以疑忌賜死苟太后之意也堅性友愛與法訣於東堂慟哭嘔血二年四月堅如雍祀五時音止六月如河東祀后土八月自臨晉登龍門顧謂羣臣曰美哉山河之固權翼對曰吳起有言在德不在險深願陛下追蹤唐虞懷遠以德山河之固不足恃也堅大悅至韓原觀晉魏顥鬼結草抗秦軍之處賦詩而歸甘露元年正月

起明堂禪南北郊六月甘露降乃大赦改年八月堅下書曰咸陽內史猛言彰出納所在著績有卧龍之才宜入贊百揆綵綸王言可徵拜侍中中書令領京兆尹中丞鄧羌性鯁直與猛協規齊志於是百僚肅整豪右屏氣風化大行堅嘆曰吾今始知天下之有法也以猛爲吏部尚書遷太子詹事十一月以猛爲司隸侍中領選如故猛上疏曰伏見陽平公融明德懿親光祿西河任羣忠貞淑慎處士朱彤博識聰辨並宜左右彌綸暉贊九棘愚臣庸鄙請避賢路堅曰機務俟才允屬明哲朝野所望豈容致辭所舉融等尋別銓授於是融爲侍中中書監右僕射任羣爲光祿大夫領太子家令朱彤爲中書侍郎領太子庶子三

年九月鳳凰集于東闕大赦其境內初將爲赦與左僕射猛右僕射融密議於露堂悉屏左右堅自爲赦文猛融進紙筆有一大蒼蠅入自牖間鳴聲甚大集于筆端驅而復來堅惡之久而乃去俄而長安街巷市里民相告曰官今大赦有司以聞堅驚謂融猛曰事何從而泄於是勅外推窮之咸言有一小人衣黑大呼於市曰官今大赦須臾不見堅嘆曰其向蒼蠅乎聲狀非常吾固惡之四年七月黃龍見於成紀梁山崩五年白虎見天水六年遣鴻臚拜張天錫爲大將軍涼州牧西平公建元元年正月雍州秀才段鏗對策上第拜吏部郎中孝廉通經者十餘人皆拜令長五年六月晉大司馬桓溫伐燕次于枋_{音枋}頭燕師屢敗

遣散騎侍郎藥嵩來乞師請賂秦以武牢以西之地八月遣將軍荀池洛州刺史鄧羌帥步騎二萬救燕溫敗歸是月京兆尹王攸上書獻十畧一曰君道宜明二曰臣尚忠敬三曰子貴孝養四曰民生在勤五曰教無偏黨六曰養民在惠七曰延聘耆賢八曰懲惡顯善九曰伐叛柔服十曰易簡宏大堅納之以攸爲諫議大夫十一月燕車騎吳王垂來奔桓溫既走慕容暉音暉悔割河洛之地以賂秦乃曰行人失辭分灾救患理之常也堅大怒六年令輔國王猛帥鎮南楊安虎牙將軍張蚝音蚝建節鄧羌等步騎六萬討平燕冀八月猛攻尅壺關暉遣太傅上庸王評等帥四十萬屯於潞州猛覘丑艷反覘候也知評賣水鬻薪不撫將士大笑

謂楊安等曰慕容評真奴才雖億兆之衆尚不足爲慮況數十萬乎今破之必矣甲戌陳於渭原猛誓衆曰王景畧受國厚恩任兼內外今與諸君深入賊地宜各勉進不可退也受爵明君之朝慶觴父母之室不亦美乎衆皆勇奮破釜棄糧大呼競進猛望燕師之衆惡之謂鄧羌曰今日之事非將軍莫可以捷也成敗之機在斯一舉將軍其勉之羌曰若以司隸見與者公無以爲憂猛曰此非吾所及也必以安定太守萬戶侯相處羌不悅而退俄而兵交猛召羌寢而不應猛乃馳就許之於是大飲與張蚝徐成等跨馬運矛馳入出入數四旁若無人音愆又居旗斬將燕師敗績進師圍鄴猛之未

至鄴也劫盜公行及猛之至遠近帖然十一月堅自帥
精銳十萬攻七日而至於安陽故宅引諸耆老語及祖
父舊事泫然流涕猛潛如安陽迎堅堅謂之曰昔亞夫
不出軍迎漢文將軍何以臨敵而背衆乎猛曰臣每覽亞
夫之事常謂前却人主以此而爲名將竊未多之臣奉陛
下神策擊垂亡之虜若摧枯拉音朽何足憂也戊寅尅鄴
慕容暉出奔將軍郭慶執暉於高陽送之辛巳堅入鄴宮
大赦閱其圖籍郡百五十七縣一千五百七十九戶二百
四十五萬八千九百六十九以王猛爲都督諸軍事車騎
大將軍開府儀同冀州牧鎮鄴封清河郡侯以僞太宰恪
太傅評之第盡賜之加美妾五人上女妓十人中女妓三

十人猛辭堅曰昔魏絳和戎猶有金石絲竹之賞山甫翼
周實受四牡之錫卿功超二子任過管葛安得辭也其敬
受之無逆朕命以鄧羌爲散騎常侍安定太守真定郡侯
邑三千戶賞潞州之功七月七日堅如洛陽下書曰士死
知己猶來格模故喬公一言魏祖追慟趙司隸高平徐統
往在鄴都識朕於童稚每思其殷勤之言弗敢忘也可召
其孫子詣行在所八年五月以高平徐攀爲瑯琊太守攀
統之少子以舊恩拔之也六月冀州牧猛入爲丞相中書
監司隸校尉猛固辭丞相改授司徒又固辭不拜乃停司
徒之授九年四月天鼓鳴葦出於箕尾長十餘丈或名崑
尤旗經太微掃東井自夏及秋冬不滅太史令張猛言於

堅曰尾燕之分野而掃東井東井秦之分災深禍大十年
之後燕滅秦之象二十年之後燕當爲代所滅慕容暉父
子兄弟亡虜也而布列朝廷貴盛莫二宜除渠師以寧皇
秦若且誅鮮卑不夕滅客華者臣請就妖言之戮堅不納
更以暉爲尚書垂爲京兆尹冲爲平陽太守十年三月侍
中太尉李威卒威字伯龍漢陽人苟太后姑子少與苻雄
結刎頸之交苻生屢欲誅堅賴威免之堅深德之事威如
父誅苻生及法皆威與太后潛決大謀遂有辟陽之寵雅
重王猛勸堅以國事任之堅嘗謂猛曰李公知卿猶鮑叔
之於夷吾罕虎之於子產猛兄事之夏四月堅下書曰巴
夷嶮逆寇亂益州招引吳軍爲唇齒之勢特進鎮軍將軍

護羌校尉鄧羌可帥甲士五萬星夜赴討五月蜀人張育

楊光等起兵二萬以應巴獠音老晉威遠將軍桓石

二萬人據墊音店江張育自號蜀王稱藩于晉八月鄧羌敗

晉師于涪音浮西擊張育楊光屯於綿竹皆斬之益州平羌

勒銘于岷山而還十二月羌至自成都堅引見東堂謂之

曰將軍之先仲華遇漢世祖於前將軍復逢朕於後何鄧

氏之多幸羌曰臣常謂光武之遇仲華非獨仲華之遭光

武堅笑曰將軍蓋以自況非直將軍之幸亦朕之遇賢十

一年正月以安車蒲輪徵隱士樂陵王忞爲國子祭酒堅

雅好文學英儒畢集純博之精莫如忞也終于太子少傅

五月猛寢疾堅親祈南北郊宗廟社稷分遣侍臣禱河岳

諸神無不周備以猛少瘳赦殊死七月堅臨省疾問以後
事猛曰晉僻陋吳越乃正朔相承臣歿之後願不以晉爲
圖鮮卑羌虜我之仇讐終爲大患宜漸除之以便社稷言
終而卒時年五十一堅哭之慟謂太子宏曰天不欲使吾
平一六合何奪吾景畧之速也贈侍中丞相餘如故謚武
侯朝野巷哭三日十二年正月癸巳高陸民穿井得龜大
三尺六寸背有八卦文命太卜池養之食之以粟四月堅
下書曰涼州刺史張天錫雖稱藩受位而臣道未純可遣
步兵校尉姚萇等自石城津伐天錫天錫率勁勇五萬來
拒戰于赤岸涼師大潰天錫率騎數千奔還姑藏致牋請
降于萇甲午大軍至姑藏天錫乘素車白馬面縛輿觀降

于軍門萇釋縛焚襯送之長安諸郡縣悉降涼州平九月
以梁熙爲持節西中郎將涼州刺史鎮姑臧徙豪右七千
餘戶於關中封天錫重光縣之東寧鄉二百戶號歸義侯
拜比部尚書遷右僕射初萇之征也堅爲天錫立第
既至如歸十三年正月太史奏有星見於外國之分當
有聖人入輔中國得之者昌堅聞西域有鳩摩羅什襄陽
有釋道安並遣求之十七年正月不雨至于六月徹樂減
膳出宮女以迎和氣八月堅收起起居注及著作所錄而觀
之見苟太后李威之事慙怒乃焚其書著作郎董肅音
雖更書時事然十不留一十八年三月徙鄴銅駝銅馬飛
廉翁仲于長安十月堅引羣臣於太極殿議曰東南一隅

未賓王化今欲起天下兵討之計甚兵仗精卒九十七萬吾將先啟行薄伐南裔此行也朕與陽平公之任非諸將之事左右僕射權翼沙門道安陽平公融尚書石越等上書面諫前後數十堅不納十九年晉車騎桓沖率衆十萬寇襄陽遣其前將軍劉波攻沔北堅大怒遣其子征南鉅鹿公獻冠軍慕容垂佐衛毛當等將步卒五萬救襄陽堅下書曰吳人敢恃江山屢寇王境宜時進討以清宇內便可戒嚴速修戎備發州民則十丁遣一兵居門在灼然者爲崇文義從朕將登會稽復禹績伐國存君義同三王其以司馬昌明爲左僕射謝安爲吏部尚書桓沖爲侍郎勢還不遠可並爲起第八月戊午遣征南大將軍陽平公融騎從

張蚝撫軍大將軍高陽公苻方衛軍梁成平南慕容暉冠軍慕容垂步騎二十五萬爲前鋒甲子堅發長安戎軍六十餘萬騎二十七萬前後千里九月堅至項城涼州之兵始達咸陽蜀漢之軍順流而下幽冀之衆至于彭城東西萬里水陸齊進融等攻壽春晉遣都督謝石徐州刺史謝元豫州刺史桓伊水陸七萬敗堅于肥水堅爲流矢所中單騎遁還於淮北顧謂夫人張氏曰朕若用朝臣之言豈見今日之事卽當何面目復臨天下乎潛然流涕堅諸軍悉潰惟慕容垂一軍獨全比至洛陽百官威儀軍容粗備未及關而垂有二志說堅請巡撫燕代并求拜墓堅許之權翼固諫以爲不可堅不從堅至自淮南次于長安

東之行宮入告罪於太廟丁零翟斌反于河南長樂公苻丕遣慕容垂及苻飛龍討之垂南結丁零殺飛龍盡坑其衆垂引丁零烏丸之衆二十餘萬爲飛梯地道以攻鄴城慕容暉弟泓先爲北城長史聞垂攻鄴亡命奔關東收諸馬牧鮮卑衆至數千還屯華陰暉乃潛使諸弟及宗人起兵于外堅遣將軍强永率騎擊之爲泓所敗泓衆遂盛自稱大都督雍州牧濟北王推叔父垂爲丞相大司馬冀州牧吳王堅謂權翼曰吾不從卿言鮮卑至是關東之地吾不復與之爭若將 泓 何 翼 曰 慕容正可據山東爲亂不暇近逼今暉及宗族種類盡在京師鮮卑之衆布於畿甸實社稷之憂宜遣重將討之堅乃以廣平公苻熙

鎮蒲坂苻叡爲都督配兵五萬姚萇爲司馬討泓于華陽平陽太守慕容冲起兵河東有衆二萬進攻蒲阪堅命寶衝討之苻叡勇果輕敵戰于華陰叡敗績被殺堅大怒萇懼誅遂叛寶衝擊慕容冲于河東大破之冲奔于泓泓衆至十萬餘遣使謂堅曰秦師傾敗將興復大燕吳王已定關東可速資備大駕奉送家兄皇帝返鄴都與秦以虎牢爲界分王天下堅大怒召暉責之暉叩頭流血陳謝堅久之曰此自三豎之罪非卿之過復其位待之如初命暉以書招諭垂及泓冲使息兵還長安恕其反叛之罪而曠遣使謂泓曰今秦數已終當不復能久 吾 旣籠中之人必無還理勉建大業以興復爲務泓于是進向長安改年曰

燕興堅率步騎二萬討姚萇于北地姚萇率衆七萬來攻堅爲萇所敗聞慕容冲去長安二百餘里退師而歸使苻方戍驪山拜苻暉都督中外諸軍事配兵五萬拒冲暉師敗績堅又以尚書姜宇與苻琳率衆三萬擊冲于灞上爲冲所敗宇死之琳中流矢冲遂據阿房城進逼長安堅登城觀之歎曰此虜從何出也吾不用王景畧陽平公之言使白虜敢至于此長樂公苻丕在鄴糧竭馬又無草削松木而食之會丁零叛慕容垂引師去鄴始具西問知長安危逼乃遣從弟求救于謝元二十一年慕容冲僭稱尊號于阿房改年更始冲率衆登城堅身貫甲冑督戰拒之飛矢滿身流血被體時雖兵寇危逼馮翊諸堡壁猶有負糧

冒難而至者多爲賊所殺先是有謠言堅信之留太子宏守長安謂之曰脫如謠言天或導予出外今留汝兼總戎政勿與賊爭利吾當出隴收兵運糧以給汝自將張夫人及中山公詵率騎數百出如五將山六月太子宏尋將母妻宗室男女數千騎出奔冲入據長安堅至五將山姚萇遣將軍吳忠圍之堅衆奔散獨侍御十數人而已神色自若坐而待之召宰人進食俄而忠至執堅以歸新平縣幽之別室萇求國璽于堅曰萇次應符歷可以爲惠堅瞋目叱之曰小羌乃敢干逼天子豈以傳國璽授汝羌乎五胡次序無汝羌名違天不祥其能久乎璽已送晉不可得也萇又遣右僕射尹緯說堅求爲堯舜禪代之事堅曰姚萇

叛賊奈何擬之古人因問緯曰卿于朕朝作何官對曰尚書令史堅歎曰卿宰相才王景畧之流而朕不知卿亡也不亦宜乎八月縊于新平佛寺中時年四十八張夫人中山公詵等皆自殺三軍莫不哀慟哀欲匿殺之名乃謚爲莊烈天王長樂公稱號僞謚堅爲世祖宣昭皇帝初太子之奔也假道歸晉歷位輔國將軍桓元篡位以爲梁州刺史晉書曰堅在位二十七年

苻丕

崔鴻十六國春秋前秦錄曰苻丕字永敘堅之長庶子少而聰慧好學堅與之言將畧嘉之才幹亞于苻融爲將善收士卒時出鎮于鄴東夏安之堅敗歸長安爲慕容垂所

逼自鄴奔于仿頭堅之死也建元二十一年丕復入鄴城將收兵趙魏西赴長安會平州刺史苻冲帥幽并人衆擊慕容垂頻爲垂將帶方等所敗乃率衆三萬進屯壺關使招丕丕乃去鄴帥男女六萬進如潞州驃騎將軍張蚝并州刺史王騰迎之入據晉湯始知長安不守堅爲姚萇所殺乃與哀于晉陽僭卽皇帝位于晉陽南立堅行廟大赦改建元二十一年爲太平元年九月置百官是月安西呂光自西域還師二年正月慕容垂僭稱尊號二月慕容冲左將軍韓延殺冲立段隨爲燕王改年昌平正月丕以呂光爲車騎將軍梁州牧酒泉公是月姚萇僭稱尊號氏有啖青者謂諸將曰狄道長苻登雖王室屬疎而志畧雄明請其

立之以赴大駕于是推登爲持節使都督隴右雍河二州
牧率衆五萬東下隴右據南安郡使請命八月丕以登爲
征西大將軍關府儀同南安王持節雍州牧因其所稱而
授之九月丕下書曰鮮卑慕容永我之騎將首亂京畿禍
傾社稷其遣丞相王永帥禁衛虎旅夾而攻之十月與慕
容永戰于襄陵王師大敗丕懼帥騎數千南奔東垣晉揚
威將軍馮該自陝要擊斬之送丕首于江東苻登稱尊號
謚爲哀平皇帝

苻登

崔鴻十六國春秋前秦錄曰苻登字文高丕之族子父敞
太尉司馬登少勇有壯氣建元元年初拜殿中將遷羽林

監長安令坐事黜爲狄道長太平二年與姚萇戰于胡奴
坂大破之十一月丕子渤海王懿自吉城奔登乃具丕死
問于是爲丕發喪行服爲壇于隴東僭卽皇帝位改太平
二年爲太初元年十二月立堅神主于軍中引師而告堅
神主曰今收合義旅衆餘五萬星言電邁直造賊庭席上
報皇帝酷怨下雪人民大恥二年登次于瓦亭九月進據
胡空堡戎夏歸之者十有餘萬姚萇掘屍鞭撻無數裸剝衣
裳附之以棘坎土埋之三年登次朝那姚萇據武都相持
累戰互有勝負萇以登戰勝謂堅神將所助亦於軍中立堅
神主謂曰往年新平之禍非萇之罪陛下假臣龍驤曰朕
以龍驤建業卿其勉之明詔昭然言猶在耳豈假手苻登

而圖臣忘前征時言耶今爲陛下立神像可歸休于此勿
計臣過聽臣至誠四年正月登昇樓謂葛曰自古安有殺
君反立神像大呼曰殺君賊姚萇出來與汝決之何爲枉
害無辜萇憚而不應萇自立堅神像戰未有利軍每夜驚
乃斬像首送登六年三月登自雍攻長安七月登攻新平
姚萇救之登引退八年十二月姚萇薨九年登聞萇死喜
曰姚興小兒吾將折杖以笞之于是大赦盡衆而東四月
登從六陌趣廢橋興將軍緯據橋以待之登與緯大戰爲
緯所敗登單馬奔雍初登之東也留太子崇守胡空堡崇
聞登敗棄城出奔登至無歸乃奔平涼收集遺兵入馬毛
山七月興攻登于馬毛登遣子崇質于隴西鮮卑乞伏乾
歸結婚請援乾歸遣騎二萬救登登引軍出迎與興戰于
山南爲興所敗死之時年五十二子崇奔于湟中僭稱尊
號改年延初謚登爲高皇帝十月崇爲乾歸所逐奔于楊
定與崇帥衆二萬攻乾歸爲乾歸所敗崇定皆死之自苻
健皇始元年歲在辛亥晉永和七年是歲歲在甲午四十
四年晉太元十九年也

晉書曰登在位九年始健以穆帝永和七年僭立至登五
世凡四十有四年以孝武帝太元十九年滅

太平御覽卷一百二十二

太平御覽卷一百二十三

偏霸部七

後秦姚弋仲 姚襄 姚萇 姚興

姚泓 蜀李特 李流 李雄

李期 李壽 李勢

後秦姚弋仲

崔鴻十六國春秋後秦錄曰姚弋仲南安赤亭羌人也其先有虞氏之苗裔昔夏禹封舜少子于西戎世為羌長其後燒當雄于洮罕之間當七世孫填虞虞九世孫遷邗率種人內附漢朝嘉之假冠軍將軍西羌校尉歸順王處之于赤亭邗元孫柯迥為魏征西將軍綏戎校尉西羌都督迥

生弋仲少而聰猛英果雄毅永嘉之亂戎夏禡負隨之者
數萬自稱雍州刺史護羌校尉扶風公劉曜以弋仲爲平
西將軍石虎廢石宏自立弋仲稱疾不賀虎累召之乃赴
太寧元年拜侍中征西大將軍石祗尊號于襄國以仲爲
右丞相石祗爲劉顯所殺仲乃與燕連和有子四十二人
常誠諸子曰我死之後汝歸晉家竭盡臣節乃使使降晉
晉永和七年拜仲使持節六夷大都督督江北諸軍事儀
同三司大單于封高陵郡公八年薨時年七十三後仲屍
柩爲苻生所得生以王禮葬之于天水苻稱尊號追謚景
元皇帝廟號始祖陵曰高陵

姚襄

崔鴻十六國春秋後秦錄曰姚襄字景國弋仲第五子雄
武多才藝能明察善撫納士民愛敬之咸請爲嗣仲以襄
非長子不許石祗僭號以襄爲使持節驃騎將軍護烏丸
校尉晉遣使拜襄持節平北將軍并州刺史卽邱縣公弋
仲薨率戶六萬南至滎陽晉處襄于譙城遣五弟爲任單
騎渡淮見豫州刺史謝尚一面交欵便若平生揚州刺史
殷浩憚其威名遣謝萬討襄逆擊破之鼓行濟淮屯于盱
眙上音呼下音怡朝廷大震襄方輒引北自稱大將軍大單于據
許昌自許遂攻洛陽踰月不尅晉征西大將軍桓温自江
陵伐襄温至伊水襄徹圍拒之爲温所敗襄奔還洛陽率
數千騎奔於北山百姓隨襄者四千餘戶襄尋從北山將

卷一百二十三
圍關中進屯杏城遣輔國將軍姚蘭畧地郿城苻生遣苻
飛拒戰襄率衆西引與苻堅戰于三原爲堅所殺時年二
十七苻僭尊號追謚魏武王

姚萇

崔鴻十六國春秋後秦錄曰姚萇字景茂弋仲之第二十
四子少聰哲多權畧不脩行業兄襄爲苻堅所殺萇率諸
弟降于苻生苻堅以萇爲揚武將軍步兵校尉潞州之戰
累有殊功遷左衛將軍累授幽州刺史苻堅伐晉以萇爲
龍驤將軍督益梁二州諸軍事謂萇曰朕本以龍驤建業
龍驤之號未曾假人今特以相授山南之事一以委卿堅
左將軍竇衝進曰王者無戲言此不祥之徵也堅默然

白雀元年慕容泓起兵叛堅堅遣子叡訪之以萇爲司馬
旣而爲泓所敗叡死之萇遣叡軍姜協謝罪堅怒殺之萇
懼奔于渭北歸者五萬餘家咸推萇爲盟主自稱大將軍
大單于萬年秦王太赦改元稱制行事二年六月慕容沖
入長安司隸權翼尚書趙遷等數百人來奔萇聞苻堅在
五將山遣驍騎吳忠率騎圍之萇自故縣如新平吳忠執
堅送之萇將求禪代堅不許慕容沖遣車騎大將軍尚書
令高蓋來戰于新平大破之蓋率麾下數千人來降建初
元年僭卽皇帝位于長安太赦改年國號大秦改長安爲
常安追尊考弋仲爲景元皇帝妣曰德皇后子興爲皇太
子秋七月萇如安定二年徙秦州三萬戶于安定八月以

太子興鎮長安四年十月立社稷于長安六年大敗苻登于長安七年三月苻寢疾遣鎮東姚碩德守長安召太子興詣行在八年十月苻如長安至于新支堡疾篤輿疾而進十二月至長安召太尉姚弋僕射尹緯等受遺詔輔政苻曰吾氣力轉微將不能復臨天下卿等善相吾子謂興曰有毀此諸人者慎勿受之撫骨肉以仁接大臣以禮待物以信遇民以恩四者既備吾無恨矣庚子薨于永安宮年六十四謚武昭皇帝葬原陵廟號太祖

姚興

崔鴻十六國春秋後秦錄曰姚興字子畧苻之太子苻薨秘不發喪皇初元年乃發喪行服卽位于槐里大赦改元

七月如涇陽與苻登戰斬登徙陰密三萬戶於長安二年以叔父緒爲晉王征西將軍碩德爲隴西王弟崇爲齊公顯爲常山公三年以緒爲并冀二州牧鎮蒲坂四年二月遣齊公崇伐洛陽宏始元年九月大赦改元冬十月尅洛陽以東平公紹爲都督山東諸軍事豫州牧鎮洛陽四年五月遣大將軍隴西王碩德率步騎六萬伐呂隆於涼州先是吐蕃僭內沃切檀據西平沮渠蒙遜據張掖李暹據燉音屯煌各制方域共相侵伐碩德從金城濟河直趣廣武逕蒼松至隆城下隆遣弟輔國超龍驤邈等率衆拒碩德碩德大破之生擒邈僭檀蒙遜李暹等各修表奉獻九月隆奉表請降興答報嘉美以隆爲鎮西將軍涼州刺史建康

公十一月鳩摩羅什至長安七年正月興如逍遙園引諸沙門聽什說佛經九年以太子泓錄尚書事燕王慕容超遣使稱藩十年與魏通和貢馬千匹十一年蜀譙縱遣使稱藩十六年五月興寢疾於內太子泓以兵屯東華門侍疾于諮議堂尚書令廣平公弼如弼也潛謀為亂彙數千人持兵於第興疾損升前殿百官咸會征虜劉羌泣曰陛下寢疾數旬奈何忽有斯事興曰朕過庭無訓使諸子交憂最胡顏愧于四海興以弼文武兼才未忍致法免其尚書令以公就第興怒乃收弼囚之十八年十二月興疾甚遣收廣平公弼第中甲杖納之武庫於是弼黨率甲士攻端門殿中上將軍欽曼高一作鬼勒兵拒戰不得入遂燒端門興力

疾臨前殿賜弼死丁未薨於殿年五十三謚文桓皇帝廟號高祖墓曰偶陵

姚泓

崔鴻十六國春秋後秦錄曰姚泓字元子興之太子興薨卽位大赦改元為永和元年廬于諮議堂既葬乃親庶政晉相劉裕來伐遣冠軍檀道濟龍驤王鎮惡入自淮肥二年七月劉裕次于陝城泓次于灞上裕至潼關泓自灞上還軍次于石橋裕進據鄭城泓遣姚裕屯兵宮中將軍姚丕守渭橋泓軍于逍遙園丕為晉所敗泓自赴之因丕之敗遂相踐而退泓與河間公裕等數百騎出奔于石橋大將軍東平公讚聞泓之敗率諸軍赴難會泓于石橋晉人已固青門諸

軍不得入衆皆驚散泓與河間公裕等詣裕請降子彭城公佛念年十二謂泓曰陛下今雖降晉劉裕待人無禮終必不全願自裁決泓憮然不答念遂登宮墻自投而死平原公璞并州刺史尹昭以蒲坂降晉東平公讚率宗室子弟百餘人亦降于裕裕盡殺之九月裕至長安送泓于建康市而戮之時年三十建康百里之內草木焦死自姚萇白雀元年歲在甲申至于是歲在丙辰三十有三歲

蜀李特

崔鴻十六國春秋蜀錄曰李特字元休巴西宕渠人其先廩君之苗裔秦併天下以爲黔中郡薄賦歛之口歲出錢四十巴人謂賦爲賓藏宗切因爲之賓人焉及高祖爲漢王

召募賓人平定三秦旣而不願出關求還鄉里高祖以其功復同豐沛更名其地爲巴郡土有鹽鐵丹漆之利民用殷阜俗性剽勇又善歌舞高祖愛其舞詔樂府習之今巴渝舞是也其後繁昌分爲數十姓及魏武尅漢中特祖父虎將五百家歸魏魏武嘉之遷畧一云洛陽陽拜虎等爲將軍後徙關內亦萬餘家散居隴右諸郡及三輔弘農所在號爲巴氏虎子慕爲東羌獵將慕凡有五子輔特庠流驥特身長八尺雄武善騎射沉毅有大度元康中氐齊萬年反關西擾亂天水畧陽扶國始平諸郡皆被兵寇氏頻歲大流移就穀怕與入漢川者數萬家特至劔閣顧盼嶮阻曰劉禪有如此之地而面縛于人豈非庸才耶同移者閭

或音郁等咸歎異之初流民既至漢中上書求寄食巴蜀
廷從之由是散在梁益不可禁止元康九年詔徵益州
史趙音歛為大長秋以成都內史耿勝代廡廡遂謀叛潛
有劉氏割據之志勝率衆入州廡遣衆迎之戰于西門勝
敗走廡獲殺之廡自稱大將軍益州牧特弟李庠與兄弟
及妹夫李含任同等以四千騎歸廡廡以庠為威寇將軍
使斷北道庠素東羌之良將曉兵法部陣肅然廡惡其齊
整殺之復以特為督將特兄弟既怨廡引兵歸縣竹廡恐
朝廷討已遣長史音遠為太守李恣督萬餘人斷北道次綿竹之
石亭特密合得七千餘人夜襲遠軍遠軍大潰因放火燒
之死者十八九進攻成都廡聞兵至驚怕不知所為李恣

等夜斬關走文武盡散廡獨與妻子乘小船走至廣都為
其下人朱竺所殺先是梁州刺史羅尚聞廡叛上表稱廡
非雄才又蜀人不願為亂事終無成願欲征之惠帝遣尚
為平西將軍益州刺史率七千餘人入蜀特等聞尚來甚
懼使其弟驥于道奉迎并貢寶物尚甚悅冬十月六郡流
人推特行鎮北將軍承制封拜其弟流行鎮東將軍弟驥驍騎
將軍少子雄為前將軍以相統領進兵攻尚于成都頻為
特所敗乃阻長圍緣水作營自都安至犍為七百里與特
相拒大安二年都下推特為大將軍大赦改元為建初元
年益州從事任明說尚曰特既克逆侵暴百姓民人分散
衆在諸村堡驕怠無備是天亡之時也可告諸村密刻期

日內外擊之破之必矣尚從之遣大衆掩襲特營尚出逆戰到官桑特軍敗績死之雄稱成都王追謚景王及稱尊號追尊曰景皇帝廟號始祖

李流

崔鴻十六國春秋蜀錄曰李流字元通特第四弟也少好學便弓馬東羌校尉何攀稱流有資音奔育之勇舉為東羌校尉平趙廞于成都晉朝論功拜奮威將軍封武陽侯建初元年特遣見殺流自稱大將軍益州牧九月流疾篤謂諸將曰驍騎李驍也高明仁愛識量多奇固足以濟大事然前軍李雄也英武殆天所相可共受事於前軍以為成都王也遂薨年五十六諸將共立雄為主雄稱尊追謚流秦文

王子龍嗣

二十四季雄

崔鴻十六國春秋蜀錄曰李雄字仲雋特第三子母羅氏夢雙虹自門升天一虹中斷既而生蕩後羅氏汲水忽然如寐夢大蛇繞其身遂有孕十四月而生雄常言二子若有先亡在者必大貴蕩以李流世卒雄長八尺三寸美容貌相者相之曰此君將貴其相有四目如重雲鼻如龜龍口方如器耳如相望法為大貴位過三公不疑雄少有烈氣聞識者皆器重之特稱益州牧以雄鎮梓潼又拜前將軍流薨雄稱大將軍益州牧治郫音皮城以西山范長生岩居穴處求道養志雄欲迎立為君而臣之長生固辭曰推

步大元五行大會甲子祚鍾于李非吾節也建興元年十月雄卽成都王位於南郊大赦改元約法七章以叔父驥爲太傅兄虎威爲太保晏平元年三月范長生乘素輿詣成都雄迎于大門執版延坐長生請雄對坐卽拜丞相尊曰范賢長生勸雄稱尊號夏六月僭卽帝位大赦改年國號大武追尊父特爲景帝母羅氏爲皇太后十月加丞相范長生爲天地太師之號封西山侯玉衡五年正月立妻任氏爲皇后八年四月范長生卒以其子侍中賁爲丞相長生善天文有術數民奉之如神十四年立兄子班爲太子二十四年五月雄寢疾六月丁卯薨年六十一謚武皇帝廟號太宗十月葬安都陵太子班襲位

李期

崔鴻十六國春秋蜀錄曰李期字世運雄第四子聰慧好學弱冠能屬文雄薨班卽位雄子車騎將軍越自江陽奔喪以班非雄所生而嗣位心不平十月因班夜哭臨越殺班於殯宮班字世文雄兄蕩第四子雄妻任氏無子養班爲子越旣殺班于是矯太后令罪狀謚戾太子立期爲主甲子期僭卽皇帝位玉恒元年正月大赦改元立妻閻氏爲后三年四月大將軍漢王壽率步騎一萬自涪音浮向成都期不虞至預不設備至卽尅城屯兵宮門殺相國建寧王越尚書令景騫尚書田褒等廢期爲中都縣公幽之別宮期自殺年二十五謚曰幽公

崔鴻十六國春秋蜀錄曰李壽字武考特季弟驤之少子少尚禮容敏而好學雄奇其才以為足荷重任封為建寧王既而期立改封漢王領梁州刺史治涪城壽見期兄弟千餘人并有強兵懼不自全陰謀據成都稱藩於晉乃誓文武得數千人襲成都剋之縱兵擄掠數日乃定僭即皇帝位於南郊大赦改咸康四年為漢興元年追尊父驤為獻皇帝三年六月壽下書曰吳會遺燼久逋天誅今將大興百萬躬行天罰九月大閱軍士七萬餘人舟師沂江而上過成都鼓譟盈江壽登城觀之羣臣以國小眾寡吳會險遠圖之未易叩頭泣諫乃止兵人咸稱萬歲十月醮禮于太學舉明經者封好學侯四年以太子勢領大將軍錄尚書事六年分寧州興古永昌雲南朱提越雋音河陽六郡為漢州四月壽寢疾常見李期為祟八月薨年四十謚昭文皇帝廟號中宗葬安昌陵

李勢

崔鴻十六國春秋蜀錄曰李勢字子仁壽之長子身長七尺九寸腰帶十四圍善于俯仰時人異之壽既薨僭即帝位大赦改元太和元年正月尊母閻氏為皇太后妻李氏為皇后嘉寧二年晉遣安西將軍荊州刺史桓溫來伐勢大發軍禦之鎮東李位都逆往降溫達成都之十里陌勢眾自潰三月溫至城下縱火燒其大城門勢眾惶懼無復

固志勢乃夜開東門走九百里至晉壽然後送降文于温
勢尋輿觀面縛軍門温解縛焚纒送勢及叔父福載記云及弟福
等十餘人于建康晉封爲歸義侯升平五年卒常璩字道
將蜀成都人少好學著華陽國志十篇序開闢以來迄于
李勢皆有條理云宕渠古賁國今有賁城秦始皇時有長
人長五丈見宕渠秦史胡毋敬曰五百年其地必有異人
爲大人者及雄之稱尊號祖先出自宕渠有識者皆以爲
應之譙周云我死後三十年當有異人入蜀又著讖云廣
漢城北有大賊曰流曰特攻難得歲在元宮自相尅又惠
帝之世蜀童謡曰江橋頭闕下市成都北門十八子至是
而應焉李特以晉永和元年歲在辛酉起兵至勢嘉寧二
年晉永和三年歲在壬戌而降晉合四十七年

太平御覽卷一百二十三

太平御覽卷一百二十四

偏霸部八

前涼張軌

張寔

張茂

張駿

張重華

張祚

張元靖

張天錫

西涼李暠

古老切

李歆

北涼沮渠蒙遜

沮渠茂虔

前涼張軌

崔鴻十六國春秋前涼錄曰張軌字士彥安定烏氏人漢常山王耳十七世孫祖烈魏外黃令父溫太官令母隴西辛氏軌少好學明經與同郡皇甫士安友善拜太子舍人與京兆杜預以所注易遺之太康中為尚書郎太子洗馬

中庶子遷散騎常侍征西將軍司馬軌以晉室多難陰圖
保據河西追竇融故事筮之遇泰之觀軌喜曰霸者之兆
乃求爲涼州公卿亦舉軌拜涼州刺史課農桑拔賢才置
崇文祭酒徵九郡胄子五百人立學校以教之永興二年
拜安西將軍封樂鄉侯惠帝崩遣長史北宮純司馬纂
別駕陰監奉表京師是歲大城姑臧城本匈奴所築也
南北七里東西三里地有龍形故名卧龍城永嘉四年十
一月黃龍出于臨羌河發水昇天身長十餘丈五年帝遣
使拜車騎大將軍開府儀同三司策命未至而劉曜攻陷
長安遷晉帝于平陽建興元年晉愍帝卽位于長安遣使
者拜軌鎮西大將軍開府儀同三司加侍中封西平郡公
固讓不受二年進拜太尉涼州牧以軌年老多疾拜子寔
行撫軍副涼州刺史五月軌寢疾立子寔爲世子己丑薨
于正寢年六十葬建陵冊贈侍中太尉謚武穆張祚僭號
追尊武王廟號太宗

張寔

崔鴻十六國春秋前涼錄曰張寔字安遜軌之世子也學
尚明察敬賢愛士晉舉秀才除尚書郎永嘉元年固辭驍
騎將軍請還涼州帝許之改授議郎西中郎將建興元年
長史張璽等表寔嗣位十月帝遣使授西中郎將涼州刺
史西平公二年十一月帝將降劉曜進寔侍中司空涼州
牧三年始知劉曜逼遷天子平陽大臨三日五年南陽王

寶聞愍帝崩自稱晉王年號建康置百官遣使拜寔征西大將軍開府儀同三司增邑三千戶六年六月京兆人劉宏挾左道以眩惑百姓密與寔左右十餘人謀殺寔皆懷刀入內斬寔于外寢時年五十葬寧陵晉王寶冊贈寔大司馬涼州牧謚元公張祚僭號追尊曰明王廟號高祖

張茂

崔鴻十六國春秋前涼錄曰張茂字成遜寔之母弟虛靖好學不以勢利為心建興元年相國南陽王寶辟從事中郎又薦為給事黃門侍郎皆不就二年徵為侍中以父疾固辭四年拜秦州刺史加散騎常侍領雍州皆不受寔左

司馬陰元等以寔既被害子駿冲幼宜立長君乃推茂為大都督太尉涼州牧茂不從以平西將軍行都督涼州諸軍事護羌校尉涼州牧西平公大赦境內九月立寔子駿為世子三年劉曜遣鴻臚拜茂太師涼王四年茂寢疾執駿手泣曰吾先人以孝友見稱自漢以來世執忠順汝謹守忠節毋或失墮薨于正寢年四十八劉曜遣使贈太宰謚成烈王張祚僭號追尊曰成王廟號太宗

張駿

崔鴻十六國春秋前涼錄曰張駿字公庭寔之世子永嘉元年生幼而奇偉十歲能屬文茂之四年拜使持節大都督大將軍涼州牧西平公大赦境內劉曜遣使拜大將軍

涼州牧元年正月親耕籍田二月始承晉元帝崩問大臨
三日四年十二月劉曜爲勒所擒曜太子毗及劉胤等率
衆奔上邽六年二月石勒稱天王遣使拜駿征西大將軍
涼州牧加五錫之禮八年羣僚勸駿稱涼王置百官駿曰
此非人臣所言敢有此言罪在不赦又請立世子乃立重
華爲世子十二月鄯善王元禮獻女殊好號曰美人立賓
遐觀以處之十四年五月雨雪降霜駿避正殿素服命羣
寮極言得失十五年以右長史任處領國子祭酒立辟雍
明堂而行禮焉命西曹掾集閣內外事付索綬以著涼春
秋十一月以世子重華行涼州事十九年八月甲子建西踰玉
石縣九月改玉石縣爲金澤縣二十一年始置百官官號

皆擬天朝車服旌旗一如王者酒泉太守馬岌上言酒泉
南山卽崑崙之體周穆王見西王母樂而忘歸卽謂此山
有石室王母堂珠璣鏤飾煥若神宮禹貢崑崙在臨羌之
西卽此明矣宜立西王母祠以裨朝廷無疆之福駿從之
二十二年六月薨于正德前殿年四十晉遣策贈大司馬
謚忠成公七月葬大陵張祚僭號追尊文王廟號世祖

張重華

崔鴻十六國春秋前涼錄曰張重華字泰臨駿第二子寬
和懿重沉毅少言駿薨右長史任處上重華爲使持節大
都督太尉涼州牧護羌校尉西平公假涼王大赦境內三
年九月晉遣使者拜侍中大都督隴右諸軍事大將軍涼

州刺史領護羌校尉西平公重華以位號未稱怒不受詔
羣寮上重華爲丞相涼王雍秦涼三州牧五年重華譙羣
寮于閒豫庭論講經義顧問索綏曰孔子婦誰家女老聃
父字爲何四皓旣安太子住乎還山乎綏曰孔子婦姓并
官氏女聃父名乾字元杲胎則無耳一目不明孤單年七
十二無妻與隣人益壽氏老女野合懷胎十年乃生老
子四皓還否臣尚未悉重華曰卿不知乎四皓死于長安
長安有四皓冢爲不還山也七年十月重華寢疾臨春坊
遣左長史馬岌策拜子靈曜爲世子大赦境內十一月薨
于平章殿年二十七葬顯陵張祚僭號追謚桓王廟號世
祖

張祚

崔鴻十六國春秋前涼錄曰張祚字太伯駿之長庶子博
學雄武有政治之才駿之二十一年拜延興太守封寧侯
重華薨子靈曜嗣七年十一月右長史趙長等矯稱遺令
以祚爲使持節都督中外諸軍事撫軍大將軍輔政十二
月趙長等議以靈曜冲幼世難未夷宜立長君廢曜爲寧
涼侯立祚爲大將軍護羌校尉涼州牧涼公趙長等議僭卽王
位于謙光殿大赦改元爲和平元年立叱干氏爲皇后子
太和爲太子封弟天錫爲長寧侯重華少子元靖爲涼武
侯置百官二月尊祖父郊祀天地二年有神降于元武殿
自稱元冥與人交語祚日夜祈之神言與福利祚甚信之

征東張瓘遣兵傳檄廢祚還第復立靈曜八月祚收瓘弟
瓘及其子嵩等驍騎將軍宋混兄修素與祚有隙祚疑之
混西奔招合夷晉衆至萬餘人還向姑臧祚大懼遣陽秋
胡將靈曜于苑拉音獵其腰而殺之埋于沙坑九月宋混次
于武始大澤爲靈曜發哀閏月混至姑臧祚登神雀觀張
瓘張嵩殺祚守卒死者四百餘人斬西門關納混領軍趙
長開宮門以應瓘長馳入殿中大呼稱萬歲祚以長敗賊
下觀勞之長奮槊音朔刺祚中額祚奔入萬秋閣爲厨士徐
里所殺以庶人禮葬之天錫卽位備禮改葬于愍陵追謚
威王封子廷堅爲金澤侯曰景新字大石號之曰無名

張元靖

一作觀

崔鴻十六國春秋前涼錄曰張元靖字元安重華少子母
郭夫人和平二年宋混張瓘等上元靖爲大將軍涼州牧
護羌校尉西平公時年七歲張瓘至姑臧推元靖爲大將
軍涼王自爲使持節都督中外諸軍事尚書令涼州牧張
掖郡公四年五月東苑大冢上忽有地陷爲澤地燃廣柔
數丈執法御史杜逸言于瓘曰此皆變之大者可移之他
族瓘徵兵數萬集于姑臧謀討宋氏混與弟澄及左右壯
士楊和等四十餘騎奔入南城門申令諸營曰張瓘謀逆被
太后詔誅之俄而衆至二千瓘率衆出戰混擊敗之衆悉
去瓘自殺混入見元靖以混爲使持節中外都督諸軍驃
騎大將軍酒泉郡侯輔政五年六月大旱令諸事祈雨之

官皆詠雲漢詩儒林祭酒索綬曰雲漢陳周宣之美非早
之文昔神鼎之出漢虞邱不賀今辭與事違恐非致澤之
意也綬字士艾燉煌人父戢晉司徒綬家貧好學舉孝廉
爲記室祭酒母喪去官又舉秀才著涼春秋五十卷又作
六夷頒符命傳十餘篇以著述之功封平樂亭侯六年宋
混卒天錫以使持節都督諸軍轉政八月右將軍齊肅等
議以靖多難務殷須立長君勸天錫自立閏月天錫遣肅
等夜害元靖時年十四葬平陵謚冲王尚書令汝州刺史
張天錫字子遠襄陽人天錫字純嘏駿之少子母
崔鴻十六國春秋前涼錄曰張天錫字純嘏駿之少子母
曰劉美人元靖八年卽位十年于八月謁于太廟尊母劉氏

爲太后元年四月秦遣鴻臚回國拜天錫大將軍涼州牧
西平公三年姑臧北山楊樹生松葉西苑北鹿生角東苑
銅佛生毛延興地震陷裂水出天錫避正殿引咎責躬晉
遣使拜隴右關中諸軍大將軍涼州牧西平公八年郡國
火燃于泥中三十所苻堅復有兼并之規天錫大懼遣從
事中郎韓博奉表于晉又與桓温書剋其年大舉都會上
邽十年以世子懷爲使持節鎮西將軍高昌郡公次子大
豫爲世子豫母焦氏爲左夫人七月大水地震西平五十
日中地十動土樓崩天錫疾美人閻姬薛姬皆自殺二姬
因色並有殊寵天錫每謂之曰汝二人將何以報我我死
之後豈可更爲人妻皆曰尊若不諱妾請效死于前灑掃

于地下無他志十月天錫疾瘳天赦境內追悼二姬葬以
夫人禮十三年五月苻堅遣武衛將軍苟長等率眾來伐
天錫遣中衛將軍史景等拒戰赤岸爲秦所敗天錫納左
長史馬芮之言面縛降秦東徙長安拜歸義侯比部尙書
遷右僕射隨苻堅敗于淮南又晉爲員外散騎常侍復本
封薨贈鎮西將軍謚悼公張軌以晉永寧九年辛巳歲收
涼州至天錫敗亡之歲歲在丙申八主七十六年

西涼李暠

古老切

崔鴻十六國春秋西涼錄曰李暠字元盛隴西狄道人也
漢前將軍廣十六世孫廣子侍中敢之後李氏世爲西州
右姓祖父弁音前涼武衛將軍天水郡太守安世亭侯

昶字中堅幼有令名世子侍講年十八卒暠昶之遺腹子
少而好學沉敏有器度後涼龍飛二年建康太守段業自
稱涼州牧號神璽元年拜暠郊穀令二年燉煌索仙等以
暠溫毅有惠政推暠爲燉煌太守段業復暠鎮西將軍領
護西夷校尉庚子元年十一月晉昌太守唐瑤移檄六郡
推暠爲大將軍涼公領秦涼二州牧天赦改年追尊祖弁
涼景公父昶涼簡公以瑤爲征東將軍三年正月于南門
起靖恭堂以議朝政圖讚自古聖帝明王忠臣孝子烈士
貞女親爲序頌以作鑒戒五年正月立泮宮增高門學生
四百人四月燉煌有萬緣木而生作黃鳥之形世子譚卒
九月立第二子歆爲世子正月天赦改年爲建初九年三

月讌于曲水命羣寮賦詩高親爲之敘文寫諸葛亮訓厲以戒諸子十三年正月寢疾顧命長史宋繇曰吾終之後嗣子猶卿子也善相輔導二月薨于恭德殿年六十七葬建世陵謚武昭王廟號太祖初嵩爲羣雄所推定千里之地謂張氏之業不足成河西十郡歲月而平旣而偃檀入姑臧蒙遜基宇稍廣於是慨然著述志賦初河右不生楸槐張駿之世取秦隴植之皆死至是而酒泉宮西北有槐生焉乃作槐樹賦又作婦辛氏誅自餘賦數十篇

李歆字士業

崔鴻十六國春秋西涼錄曰李歆字士業

左長史宋繇等上爲大將軍涼公領涼州牧護羌校尉大

赦改年爲嘉興元年七月歆聞蒙遜南伐西秦中外戒嚴將攻張掖尹太后以爲不可宋繇亦諫歆怒不從遂率步騎三萬東伐次于都瀆蒙遜自浩亶來戰于懷城歆敗左右勸還歆曰吾違太后明誨遠取敗辱不殺此胡復何面目以見母也勒衆復戰敗于蓼泉爲遜所殺歆弟驍騎將軍翻擊虜將軍豫等西奔燉煌蒙遜遂入酒泉翻及燉煌太守恂與諸子等棄燉煌奔于北山郡人宋承張宏等以恂在郡有惠密信招恂恂率千騎入于燉煌宋承張宏等推恂爲涼州刺史遜率衆二萬攻恂宋承等開門出降恂自殺恂嵩之第六子也遜獲翻子寶徙于姑臧歲餘北奔伊吾後二十餘年至魏太平三年寶至伊吾率流人及

虜騎南襲燉煌據之遣使降魏魏以寶爲使持節侍中都督西垂諸軍事鎮西大將軍開府儀同三司領護戎校尉沙州牧燉煌公承制玉門以西寶寬雅有度量甚著威惠于西土在燉煌三年徙并州刺史薨謚宣公自高元年歲在庚子至歆爲蒙遜所滅二十一年山濤人宋承張公

北涼沮渠蒙遜

崔鴻十六國春秋北涼錄曰沮渠蒙遜臨松盧水胡人其先世爲匈奴左沮渠遂以官爲氏遜好學涉羣史雄烈有英畧後涼龍飛二年遜伯父羅仇翹弼從呂光征河南光前軍大敗皆爲光所殺宗部會葬者萬餘人遜哭謂衆曰昔漢祚中微吾之乃祖翼獎寶融保寧河右呂王耄荒虐

民無道豈可坐觀成敗不上繼先祖安民之志下使二父有恨黃泉衆咸稱萬歲遂立盟約一旬之間衆至萬餘與從兄男成推建康太守段業爲涼州牧建康公改龍飛二年爲神璽元年業以遜爲張掖太守男成爲輔國大將軍委以軍國之任永安元年三月遜以爲業所憚內不自安請爲安西太守四月業收男成賜死遜聞男成死泣告衆曰男成忠于段公枉見屠害諸軍能爲報仇乎成素有恩信衆皆憤泣而從之比至氏池衆踰一萬業遣右將軍田昂武衛將軍梁中庸等攻侯塢遜自氏池救之昂率騎五百歸遜軍遂大潰中庸來奔五月遜至張掖田昂兄子承愛斬關納遜業左右散走遜大呼曰鎮西何在軍人曰

在此業曰孤單飄一已爲貴門所推可見乞餘命投身嶺南庶得東還與妻子相見遂遂斬之六月右長史梁中庸等推遜爲大將軍涼州牧大赦改元永安四年秦遣鴻臚梁斐拜遜鎮西大將軍開府儀同三司沙州牧西海公九年二月兩月並出正始元年冬十月遷都姑臧十一月僭卽河西王位于謙光殿大赦改元置百官始如呂光爲三河王故事二年四月立子政德爲世子三年二月與西秦通和遼西巡遂循海至鹽池祀王母等寺中有元石圖命中書侍郎張穆爲賦銘于寺前十四年起遊林堂于內苑圖列古聖賢之像九月堂成遂譙羣臣談論經傳顧謂郎中劉炳曰仲尼何如人也炳曰聖人也遜曰聖人者不疑

滯于物而能與世推移畏于匡辱陳伐樹削跡聖人固若是乎炳不能對遜曰卿知其外不知其內昔魯人有浮海而失津者至于直州仲尼及七十二子遊于海中與魯人木杖令閉目乘之使歸告魯侯梁城以備寇魯人出海投杖水中乃龍也具以狀告魯侯不信俄而有羣鷲數萬銜土培城魯侯信之大城曲阜訖而齊寇至攻魯不尅而還此其所以稱聖也義和元年十二月魏遣太常李慎拜遜太傅涼州牧涼王加九錫之禮三年夏四月遜寢疾立子茂虔爲世子薨于路寢五月葬元陵謚武宣王廟號太祖

沮渠茂虔

崔鴻十六國春秋北涼錄曰沮渠茂虔遜第三子聰穎好學和雅有度義和三年立爲世子加中外都督大將軍錄尚書遜薨僭卽河西王位大赦改年爲永和元年立子封壇爲世子加撫軍大將軍錄尚書事三年正月西中郎將燉煌太守沮渠唐兒上言曰十五日有一老父見于郡城東門投書忽然不見其書一紙八字滿之文曰涼王三十年若七年虔訪于奉常張慎慎曰昔虢將亡神降于莘深願陛下尅念修政以副三十年之慶若盤于遊田荒于酒色臣恐七年將有大變虔不悅七年正月朝羣臣于謙光殿有狐在于東序門者不見其入左右以告命射之不獲二月端門崩初虔爲酒泉太守起浮屠于中街有石象在焉是日目流血五月太廟基陷六月當陽門崩魏常山王赤堅率衆至姑臧虔嬰城拒守九月面縛出降魏釋其縛徙虔及宗室士民十萬戶于平城拜虔征西大將軍王如故八年賜死謚哀王自遜永安元年歲在辛丑至是歲庚寅三十九載

晉書曰蒙遜以安帝隆興元年自稱州牧義熙八年僭立後八年而宋氏受禪以永嘉十年死時年六十六在位三十三年子茂虔立六年爲魏所滅

有大量人莫之知唯王猛異之曰此非常人言之苻堅舉賢良除美陽令民夷憚愛隣境肅清遷鷹揚將軍以功賜爵關內侯建元十九年以光爲使持節都督西討諸軍事率將軍姜飛彭晃杜進等率步騎七萬討西域十二月至龜茲龜茲王帛純捍命不降光軍其城南五里爲一營深溝高壘廣設疑兵爲木人被甲羅之壘上以爲持久之計二十年五月帛純乃傾國財寶請救于獐胡獐胡王遣弟唵龍侯將馘率騎二十餘萬救之胡便弓馬善矛槊鎧如連鑣射不可入又以革索爲冑策馬擲人多有中者衆甚憚之姑默宿尉頭等國及諸胡內外七十萬人光遷營相接陣爲勾鑣之法精騎爲遊軍彌逢其闕秋七月戰

于城西大敗之帛純逃奔王侯降者二十餘國進入其城城有三重廣輪與長安城等城中塔廟千數帛純宮室壯麗煥若神居胡人奢侈富于生養家有蒲萄酒至千斛經十年不敗士卒淪沒酒藏者相繼諸國貢款屬路立帛純弟震爲王以安之光撫寧西域威恩甚著秦以光爲使持節散騎常侍都督玉門巴西諸軍事安西將軍西域校尉進封順鄉侯二十一年正月大饗文武博議進止衆咸請還光從之三月引還以馳二萬餘頭致外國珍異千餘品駿馬萬餘匹而還九月光入姑臧自領涼州刺史護羌校尉太安元年苻丕以光爲車騎大將軍涼州牧領護西域大都督酒泉公光始聞苻堅爲姚萇所害奮袂哀怒三軍

編素大臨于城南傳檄諸州期孟冬大舉謚堅爲文昭皇帝十月大赦境內改建元爲太安十一月羣寮勸進光曰長蛇未殄方掃國難不宜進位元台十二月上光爲侍中中外都督隴右諸軍大將軍涼州牧酒泉公三年八月甘露降逍遙園白鷺翔于酒泉衆鷺成列而從之麟嘉元年正月麟見金澤縣百獸從之于是羣僚奉表請崇進名號二月僭卽王位于南郊大赦改元置官司丞郎以下猶攝州縣事二年九月太廟新成追尊父爲景昭王祖爲宣公曾祖爲恭公高祖爲敬公龍飛元年五龍見于浩亶羣臣咸賀勸光稱號六月僭卽天王位于南郊大赦改年備置群司立世子紹爲太子四年九月光寢疾十二月疾甚立

太子紹爲天王光自號太上皇帝以子纂爲太尉弘爲司徒詔曰吾疾病不濟吾終之後使纂統六軍弘管朝政汝恭已無爲委重二兄庶可以濟今外有強寇民心未寧汝兄弟輯睦貽厥萬世若內自相圖則禍不旋踵纂弘泣曰不敢有二心薨葬高陵謚武皇帝廟號太祖

呂纂

崔鴻十六國春秋後涼錄曰呂纂字永緒光之長庶子母趙淑媛少便弓馬不好書太安元年至于姑臧光臨薨執手戒之曰汝性麤武深爲吾憂開基旣難守成不易善輔永業勿聽讒言光薨紹秘不發喪纂排閣入哭盡哀而出紹懼以位讓之曰兄功高年長宜承大統纂曰臣雖長陞

下國家之適不可以私愛而亂大倫驍騎呂超謂紹曰纂
臨喪不哀步高視遠觀其舉止恐成大變宜早除之纂聞
超謀遂率壯士數百踰北城攻廣夏門入自青角門昇謙
光殿紹登紫閣自殺呂超出奔廣武纂遂僭天王大赦改
龍飛四年爲咸寧元年謚紹隱王纂遊田無度荒耽酒色
常與左右因醉馳獵于坑澗之間殿中侍御史王回扣馬
諫不納番和太守呂超擅伐鮮卑思盤思盤訖超于纂纂
召超入朝怒曰卿恃兄弟桓桓欲欺吾也要當殺卿然後
天下可定超頓首曰不敢纂引諸臣宴于內殿呂隆屢勸
纂酒已至昏醉乘步輓車將超等遊于內至瑁華堂閣車不得過纂親將寶川駱
騰倚劍于壁推車過因超取劍擊纂纂下車擒超刺纂洞胸奔于宣德堂將軍

魏益入斬纂首以狗隆旣篡位謚靈帝葬白石陵

呂隆

崔鴻十六國春秋後涼錄曰呂隆字永基光弟寶之子旣
殺纂遂僭卽王位大赦改咸寧三年爲神鼎元年二月追
尊父寶爲文皇帝超有佐命之勲拜爲侍中都督中外諸
軍事輔國大將軍錄尚書封安定公二年秦遣鴻臚恒敦
拜隆征北大將軍都督河西諸軍涼州牧建康公三年隆
以二涼之逼遣賈珍寶請迎于秦遣尚書左僕射齊難率
步騎四萬來迎隆率戶一萬隨難東遷旣至長安秦以隆
爲散騎常侍尚書公如故超爲安定太守其後坐與姚興
少子廣平公弼謀反誅呂光以乙酉歲據涼州至于是歲

太平御覽卷一百二十五
歲在癸卯凡一十九年

後燕慕容垂

崖鴻十六國春秋後燕錄曰慕容垂字道明皝第五子小字阿六敦母蘭淑儀垂少有器度長七尺七寸手垂過膝皝甚寵之常曰此兒濶達好奇終能破人家或能成人家故名霸字道業因墜馬傷前二齒因改名缺外以慕容缺爲名內實惡而改之尋以識記之文去夬以垂爲名及僞僭稱尊號封吳王建熙十年以車騎大將軍敗桓温于枋頭威名大震太傅上庸王評深忌之垂遂出奔秦苻堅聞垂至大悅郊迎執手禮之甚重王猛惡垂雄畧勸堅殺之堅不從以爲冠軍將軍封賓都侯歷京兆尹

苻堅敗于淮南垂軍獨全堅以千餘騎奔之世子寶言于垂曰國家傾亾皇綱廢弛當隆中興之業建少康之功宜恭承皇天之意因而取之垂曰彼悉心投命若何害之乃以兵屬堅垂至澠池言于堅曰王師不利北境之民或因此輕動臣請奉詔輯寧朔裔且龍鄴舊都陵廟所在乞過展拜以申罔極堅許之權翼諫曰垂爪牙名將今之韓白且世豪東夏志不爲人下頃以避禍歸誠非慕德而來恐冠軍之號不飽其志列地百里未滿其心且垂猶鷹也饑則附人飽便高颺遇風塵之會必有凌霄之志堅曰卿言是也但朕已許之匹夫猶重信況萬乘之主乎翼曰陛下重小信而輕忽社稷臣見其往不見其還關東之變垂其首

乎自涼馬臺結草筏而渡至安陽修箋于長樂公丕垂至館之于鄴西會苻暉告丁零翟斌聚衆四千謀逼洛陽丕于是配垂兵二千遣廣武將軍苻飛龍率氏騎一千爲垂之副丕戒飛龍曰垂爲三軍之統卿爲垂謀之主苻暉告急簡書相尋垂方圖飛龍停河內不進悉誅氏兵命左右殺飛龍濟河焚橋衆三萬至洛陽苻暉閉關門拒守不與交通翟斌率衆會垂勸稱尊號垂曰新興侯國之正統孤之君也若以諸軍之力得平關東當以大義諭秦奉迎反正誣上自尊非孤心也乃自稱大將軍燕王承制行事翟斌爲建義將軍封河南王弟德爲范陽王衆至二十萬濟白石門長驅攻鄴元年正月朝羣寮于清陽宮以暉在長

安依晉愍帝在平陽中宗稱王改年建武故事改秦建元爲燕元元年立太子寶爲燕王李攻拔鄴郭丕固守中城垂塹而圍之于魏郡肥鄉築新興以置輜重進師攻鄴開其西奔之路二年三月丕棄鄴奔并州以魯陽王和爲南中郎將鎮鄴十二月垂定都中山建興元年正月羣寮勸垂正尊號辛卯僭卽皇帝位于南郊大赦改元建興立子寶爲皇太子十年五月太子寶率衆八萬伐魏范陽王德爲之後繼魏聞寶將至徙于河西寶臨河不敢濟引師還次于參合俄而魏軍大至三軍奔潰寶與德等數千騎奔潰十一年三月垂大衆出參合太子寶出天門垂至參合見積骸如山設祭弔之死者父兄各皆號哭軍中哀慟垂

慙憤嘔血因而寢疾築燕昌城而還寶等至雲中聞垂疾
皆引歸及垂至于平城夏四月薨于上谷之徂陽年七十
二謚武成皇帝廟號世祖

晉書曰垂以太元二十一年死在位十三年墓曰宣平陵

慕容寶

崔鴻十六國春秋後燕錄曰慕容寶字道祐垂第四子元
璽四年生于信都少輕果無志操好人從已段后諫垂曰
太子資質雍容柔而不斷非濟世之雄遼西高陽陛下兒
之賢者宜擇一樹之垂不納謂曰汝謂我爲晉獻公平建
興十一年四月僭卽皇帝位大赦改元爲永康元年寶遣
將軍趙王麟逼段后曰常謂主上不能嗣守大統今竟能

不宜早自裁以全段氏后怒曰汝兄弟上逼殺母豈能保
守社稷吾豈惜死念國滅不久遂自殺八月立妃段氏爲
皇后濮陽公榮爲皇太子二年正月魏使修和寶不許二
月魏攻中山其夜尚書慕容皓謀殺寶立趙王麟寶與太
子榮等萬騎就清河王會于薊以開封公慕容詳守中山
五月詳遂僭稱尊號九月趙王麟率衆入中山殺詳麟復
僭尊號中山饑麟出據新市與魏師戰于義臺敗績南奔
魏入中山寶遣御史中丞兼鴻臚魯遂持節授司徒范陽
王德丞相冀州牧承制南夏封拜公侯牧守三年二月寶
發龍城以撫軍慕容騰爲前軍步騎三萬將南伐次于乙
連長上段速骨宋赤眉因民之憚遠役殺司空樂浪王宙
衆旣幸亂投伏奔走寶馳還龍城又與長樂王盛等南奔

尚書蘭汗殺速骨等十餘人奉太子榮承制大赦遣迎寶
還于薊寶欲北還盛等咸以汗忠欸虛實未明宜就范陽
王德寶從之乃自薊而南四月寶至鄴鄴中遺民固請留
之寶不從南至黎陽城西聞范陽王德稱制懼而退乃還
龍城次于廣都蘭汗又遣左將軍蘇超迎寶具申欸誠忠
節無差寶于是命發汗遣弟難率五百騎迎寶至龍城難
引寶入于外邸殺之年四十四殺太子榮及王公卿士百
餘人汗自稱大將軍大單于昌黎王年號青龍七月長樂
公盛襲誅汗盛卽僞位謚寶惠愍皇帝廟號烈宗

慕容盛

崔鴻十六國春秋後燕錄曰慕容盛字道運寶之庶長子

秦建元十年生於長安二十年苻堅誅慕容氏盛奔東歸
至垂問以西事畫地成圖垂笑謂之曰昔魏武撫明帝之
首遂乃侯之祖之愛孫有由來矣於是封長樂公建興六
年領北中郎鎮薊進爵爲王及寶爲蘭難所殺盛馳赴哀
盛潛結大衆謀討難及汗等斬之建平元年七月告成宗
廟大赦改青龍元年謙抑自卑不稱尊號以長樂王稱制諸
王貶爵爲公東陽公慕容根等九十八人上尊號盛不許
十月根等又請盛許之丙子僭卽皇帝位正月朝羣臣于
承乾殿大赦改建平元年爲長樂元年二年正月大赦盛
去皇帝之號稱庶民天王三年八月右將軍慕容國謀率
禁兵襲盛前將軍段幾等因衆心阻動潛於禁中鼓譟大

呼盛聞變率左右出戰衆皆披潰俄有一賊從閣中擊盛傷足遂取輦昇前殿召叔父河間公熙囑以後事熙未至而薨年二十九僞謚昭武皇帝廟號中宗晉書曰盛幼而驕賤流漂長則遭家多難夷險安危備嘗之矣懲竇闇而不斷遂峻極威刑纖芥之嫌莫不裁之于未萌防之於未兆于是上下震恐人不自安雖忠誠親戚亦皆離貳舊臣靡不夷滅安忍無親所以卒於不免是歲隆安五年也

慕容熙

崔鴻十六國春秋後燕錄曰慕容熙字道文一名長生垂之少子燕元二年生于常山建興八年封河間王永康初

隨竇奔龍城拜司隸校尉長樂元年遷僕射中外都督領昌黎尹盛薨僭卽皇帝位大赦改長樂三年爲光始元年二年正月熙引見州郡耆舊于東宮問以民所疾苦司隸部民劉瓚對問稱旨拜帶方太守是春大治宮室至四月立苻貴人爲昭儀五月築龍騰苑廣十里餘役徒二萬起景雲山于苑內又起逍遙宮甘露殿連房數百觀閣相交鑿天河渠引水入宮又爲苻昭儀鑿曲光海清涼池季夏暑熱士卒不得休息暍死者半四年二月昭儀苻氏卒立苻貴嬪爲皇后九月苻后遊畋熙從之北登白鹿山東過青嶺南臨滄海冬十一月乃還百姓苦之卒爲狼虎所害及凍死者五千餘人五年十月擬鄴之鳳陽作弘光門

累級三層建始元年正月大赦天下三月太史丞梁延年
夢月化爲五白龍夢中占之曰月臣也龍君也月化爲龍
當有臣爲君寤而告人曰國祚其將盡乎是月苻后起承
華殿高承光一倍負土於北門土與穀同價典軍杜靜載
棺 關上書諫大怒斬之后嘗季夏思凍魚鱸冬須生地
黃 下有司切責不得加以大辟四月苻后崩熙悲號躡
踊若喪考妣擁其尸而撫之曰體已就冷命遂斷矣于是
僵仆絕息久而乃蘇服斬縗食粥百寮于宮內設位哭臨
使有司按檢哭者有淚以爲忠孝無淚則加罪羣臣震懼
莫不含辛以爲淚高陽王如張氏熙之嫂也美姿容熙欲
以爲殉乃毀其襪韠中有弊璫遂賜死三女叩頭求哀熙

弗許營陵周輪數里下錮三泉內圖畫尚書八座之像熙
曰善爲之朕將隨后入此陵轎車高大毀北門而出中衛
將軍馮跋左衛將軍張興先皆坐事亡奔以熙政之虐也
與跋從兄萬泥等三十二人結盟推夕陽公慕容雲爲主
發尚方徒五千人分屯四門入宮授甲閉門拒守中黃門
趙洛生奔告熙熙曰此鼠盜耳朕還當誅之乃收髮貫甲
馳還赴難夜就城攻北門不尅遂入龍騰苑左右潰散熙
微服逃于林中爲人執送雲等殺之年三十二雲葬之徽
平陵謚曰昭文皇帝

晉書曰垂以孝武帝太元八年僭立至熙四世凡二十四
年以安帝義熙二年滅

慕容雲

崔鴻十六國春秋後燕錄曰慕容雲字子雨寶之養子祖
父高和句麗之支庶自云高陽氏之苗裔故以高爲氏寶
之爲太子雲以武藝給侍東宮永康初拜侍御郎以疾去
官及熙葬后馮跋詣之告以大謀雲懼跋等強之四月卽
天王位復姓高氏大赦改建始元年爲正始元年國仍號
大燕以馮跋爲侍中中外都督諸軍錄尚書事武邑公二年慕
容歸爲遼東公立燕之宗社三年冬十月雲臨東堂幸臣
離班桃仁懷劍執紙而入稱有所啓抽劍擊雲雲以几拒
班桃仁進而殺之立馮氏爲主跋卽位謚爲惠懿皇帝始
垂以丙戌之歲建號中山至馮跋之歲歲在己酉二十四

年

朝部十

太平御覽卷一百二十五

進而

太平御覽卷一百二十六

偏霸部十

南涼秃髮烏孤

西其以秃髮利鹿孤

山西至

秃髮儁檀

南燕慕容德

其地

慕容超

秃髮烏孤

崔鴻十六國春秋南涼錄曰秃髮烏孤河西鮮卑人也八世祖疋孤率其部自塞北遷于河西疋孤卒子壽闡立壽闡卒孫樹機能立壯果多謀畧太始中殺秦州刺史胡烈于萬斛堆敗涼州刺史蘇愉于金山又殺涼州刺史楊欣于丹嶺盡有涼州之地武帝為之肝食能死從弟務丸代立

九死孫推斤立斤死子思復鞬立部落轉盛遂據涼土鞬卒子烏孤襲位養民務農修結隣好呂光封烏孤廣武郡公益州牧左賢王太初元年正月改元自稱大將軍大單于西平王以弟鹿孤爲驃騎將軍儻爲車騎將軍二年改稱武威王三年正月徙治樂都八月孤因酒走馬馬倒傷脇笑曰幾使呂光父子大喜俄而患甚顧謂羣臣曰方難未靖宜立長君言終而薨在王位三年謚武王廟號烈祖

晉書曰秃髮烏孤其先與後魏同出八世祖正孤率

其部落自塞北遷于河西其地東至麥田牽屯西至顯羅南至澆河北接大漠正孤子壽闡之在孕母胡掖氏因寢而產于被中鮮卑謂被爲秃髮因而氏焉

秃髮利鹿孤

崔鴻十六國春秋南涼錄曰利鹿孤烏孤弟大初三年八月卽位大赦徙治西平建和元年正月大赦改年延耆老訪政二年羣臣固請卽尊號不許乃僭稱河西王三年三月寢疾令曰昔我諸兄弟傳位非子者蓋以泰伯三讓周道以興故也武王創踐寶歷垂諸樊之試終能克昌家業者其在車騎乎吾寢疾悒頓是將不濟內外多虞國機務廣其令車騎經惣百揆以成先王之志薨謚康王葬西平陵

秃髮儻檀

崔鴻十六國春秋南涼錄曰儻檀利鹿孤弟也少機警有

才畧建和三年襲位僭號涼王遷于樂都改為弘昌元年
秦遣使拜車騎將軍廣武公四年六月秦遣都督河右諸
軍事涼州刺史鎮姑臧七月讌羣臣于宣德堂仰視而歎
曰古人言作者不居居者不作信矣前昌松太守孟暉進
曰張文王築城苑繕宗廟構此軍為貽厥之資萬世之業
秦師濟河漙然瓦解此堂之建年垂百載十有二主唯信
順可以久安仁義可以永固願大王勉之檀曰非君無以
聞讜言也八月以鎮南大將軍文支鎮姑臧檀遷于樂都
雖受制于秦車服禮制一如王也十一月遷于姑臧嘉平
元年十一月僭即涼王位于南郊大赦改年嘉平置百官
立世子虎臺為太子二年正月以子明德歸為中郎將領

昌松太守歸雋爽聰悟僭檀甚寵之年始十三命為高昌
殿賦援筆即成影不移漏檀覽而善之擬之曹子建七年
僭檀議欲西征乙弗孟顛諫曰連年不收上下饑弊南逼
熾盤一作磬北迫蒙遜今遠征雖剋後患必深僭檀曰孤將
畧地卿無沮眾謂其太子武臺曰今不種多年內俱窘事
宜西行以拯此弊蒙遜近去不能卒來旦夕所慮唯在熾
盤然熾磬德微眾寡易以討禦吾不過一月自足周旋汝
謹守樂郡無使失墜僭檀乃率騎七千西襲乙弗大破之
獲牛馬羊四十餘萬熾盤乘虛來襲一旬而城潰安西樊
泥自西平奔告僭檀僭檀謂眾曰今樂都為熾盤所陷卿
等能與吾籍乙弗之資取契汗以贖妻子者是所望也遂

引師而西衆多逃返遣征北段苟追之苟亦不還于是將士皆散僞檀曰蒙遜熾盤昔皆委質于吾今而歸之不亦鄙乎四海之廣匹夫無容其身何其痛哉吾老矣寧見妻子而死遂歸熾盤六月至西平盤遣使郊迎以上賓之禮歲餘爲熾盤所鳩謚景王時年五十一武臺亦爲熾盤所害少子保周歸魏魏以爲張掖王自烏孤太初元年歲在丁酉至檀薨之歲甲寅十有八歲

晉書曰烏孤以安帝隆安九年僭立至僞檀三世凡十九年以安帝義熙十年滅

南燕慕容德

崔鴻十六國春秋南燕錄曰慕容德字元明皝之少子皝

每對諸宮人言婦人妊娠夢日入懷必生天子公孫夫人方姬夢日入臍中獨喜而不敢言晉咸康二年晝寢生德左右以告方寤而起皝曰此兒易生似鄭莊公長必有大德遂以德爲名年十二而皝薨哀毀過禮年十八長八尺二寸額上有日月兩角偃下重文元璽初封梁公建熙初進號安北將軍封范陽王入爲魏尹秦滅燕徙于長安秦伐涼德請征自效後爲張掖太守苻堅伐晉垂請德爲副堅敗德乃隨垂如鄴垂稱燕王復封范陽王建興元年爲司隸校尉八年拜司徒垂臨薨謂太子寶曰鄴是舊都宜委范陽王永康元年以德鎮鄴及寶失中山奔龍城以德爲承一相領冀州承制南夏德曰中山旣沒魏

必乘勝來攻鄴元年正月德率戶四萬三千車二萬七千
乘自鄴徙滑臺黎陽魏軍垂至三軍危懼欲堡據黎陽昏
日流澌冰合是夜濟訖水亦尋消德大悅改黎陽津爲天
橋津德入滑臺趙王麟等九十八人上言今中土傾陷龍
都蕭條趙魏遺黎鵠企皇澤伏願仰承俯順以安宗廟謹
上皇帝尊號德許之令曰今假順來議且依燕元故事統符
行帝制奏詔而已改永康三年爲元年大赦殊死已下置
百官封進有差寶自龍城南奔至黎陽城西數里伏于河
西遣中黃門趙思告北地王鍾曰去二月得丞相表卽
自南征段速骨作逆于乙連今失據來此呼丞相奉迎鍾
馳使白狀寶遣思之後見採樵者知德稱帝懼而北奔初

苻登旣滅登弟廣率所部二千來降拜冠軍處之乞活漸
至是復叛稱秦王德留撫軍魯陽王和守滑臺德率衆攻
廣斬之和長史李辨殺和以滑臺降魏德曰苻廣雖平撫
軍失撫進有強敵退無所托計將安出尚書潘聰曰滑臺
四通八達非帝王之居青齊沃壤號曰東秦地方二千里
戶餘十萬四塞之固可謂用武之國德猶預未決于是遣
牙門蘇撫問沙門朗公報曰山栖絕俗之士不應預聞朝
議但有待之累非有託無以立陛下今來卽朗之檀越敬
覽潘尚書之議可謂興邦撫又問以年世朗以周易筮之
曰燕衰庚戌撫曰幾何曰年則一紀世則及子撫曰何其

促乎朗曰卦兆然也豈關人哉撫祕不敢言德大悅三月德引師而南五月次薛城八月入廣固卽皇帝位于南郊大赦改元爲建平元年又曰漢宣憫吏民犯諱故改名今增一備字以爲復名庶開臣子避諱之路于是敘賞有差褒德任賢新舊感悅十月太極講筵就以公匡張剛爲材官將軍尚方令二年十月徐州刺史潘聰青州刺史鞠仲來朝讌于延賢堂酒酣德嘆謂群臣曰朕雖寡薄拱已南面在上不驕夕惕于位可稱自古何等主也仲曰陛下中興之聖后少康光武之儔也顧命左右賜仲帛千匹仲疑多陳讓德曰卿知調朕朕不知戲卿乎卿飾對非實故亦虛言相賞不賞謬加何足謝也韓範進曰臣聞天子無戲言忠臣無妄對今日之論可謂君臣俱失德大悅賜範絹五十匹三年三

月德如齊城登營邱望見晏嬰塚顧左右曰禮大夫不遠城葬平仲古之賢人達者而生居近市死葬近城豈有意乎青州秀才晏謨對曰孔子稱臣先人平仲賢矣豈不知高其梁豐其禮蓋政在家門故儉以矯世存居湫隘卒豈擇地而葬乎所以不遠門者猶冀悟平生意也德悅之三月以大牢祀漢城陽景王廟遂北登社首山東望鼎足因目牛山問謨以齊之山川賢哲故事謨歷對詳辨晝地成圖德深嘉之拜尚書郎五年二月夜地震在栖之雞皆驚攪飛散三月德疾動經旬幾于不振會前尚書右丞曹默自冀州來奔以白酒解之乃瘳以默爲御史中丞封永熙侯六年正月兄子超自秦還九月汝水竭十一月德疾篤

夢甦曰汝既無子何不早立超爲太子不爾惡人生心戊午引見羣臣于東陽殿議立超爲太子俄而地震百寮驚越德亦不安還宮疾甚呼段后公主及超申以後事執超手曰德若至曉更見公卿顧託以汝死無所恨舉目視公主欲有所言竟遂不能段后大言今日召董中書造詔立超聞曰頤之是父薨于顯安宮年七十爲十餘棺夜分出門潛瘞山谷莫知其屍所在虛葬于東陽陵謚獻武皇帝廟號世宗在位五年

慕容超

崔鴻十六國春秋南燕錄曰慕容超字祖明德兄北海王納之子秦滅燕以納爲廣武太守數歲去官與母公孫太

妃就弟德家于張掖德從苻堅南征留金刀辭母而去及垂起兵山東張掖太守苻昌誅納及德之諸子公孫太妃以耄不合刑納妻段氏以懷妊未決執于郡獄獄掾呼延平德之故吏也將公孫及段氏逃于羌中而生超焉公孫氏臨卒授超金刀曰聞汝伯已中興于鄴都吾朽病將沒相見理絕汝脫得東歸可以此刀還汝叔也後因呂隆歸秦秦徙涼州民于長安超因而東歸母謂超曰母子得全濟者呼延氏之力也惠而不報天不祐人平今雖死吾欲爲汝納其女以荅厚惠于是納之超至長安佯狂行乞由是往來無禁濟陰人宗正謙善卜相西至長安賣術于路超行而遇之因就謙相謙奇其姿貌超乃內斷于心不告

母妻辭母詣霸上乃與謙俱歸至諸關禁自稱張伏生二十日達梁父建平六年四月至廣固呈以金刀且宣祖母終之言德撫之號勸超身長八尺腰九圍姿器魁傑有類于德德愛之名之曰超封北海王拜侍中驃騎大將軍司隸校尉開府置佐十一年立爲太子己未僭卽皇帝位大赦改建平六年爲太上元年三年七月遣中書令韓範聘秦姚興許還超母妻八月秦使兼員外散騎常侍韋宗還聘贈以千金超復遣右僕射張華給事中宗正元聘秦送太樂伎一百二十人姚興大悅還超母妻十月華發長安宗正元先馳反命超悅遣征虜公孫五樓率騎二千迎于境上超親率六宮迎于馬耳關四年正月大赦尊父北

海穆王爲穆皇帝母段氏爲皇太后居長樂宮妻呼延氏爲皇后五年二月晉相劉裕率衆來伐三月晉師渡淮超聞晉軍之盛自率衆四萬拒戰大敗奔還廣固徙郭內民人保小城晉攻陷大城長圍列守超請爲藩臣以大峴爲界裕不許六年正月超登天門朝羣臣于城上殺馬以饗將士文武皆有遷授二月尚書悅壽開門納晉師超出奔爲晉師所執送建康市斬之時年二十六殺鮮卑王公已下三千餘人以男女萬餘口爲軍賞始建平元年歲在己亥僭號居齊至爲劉裕所滅歲在己酉凡十一年晉書曰超在位六年初德以安帝隆安四年僭立至超二世凡十一年以義熙六年滅

太平御覽卷一百二十六

太平御覽卷一百二十七

偏霸部十一

西秦乞伏國仁

乞伏熾盤

北燕馮跋

夏赫連勃勃

赫連定

西秦乞伏國仁

崔鴻十六國春秋西秦錄曰乞伏國仁隴西鮮卑人其先自漠北南出太陰山五世祖有拓鄰者晉太始初率戶五萬遷居高平川鄰卒子結權立遷于牽屯結權卒子利那

立利那卒弟祁湜立祁湜卒利那子述延立遷于苑川述延卒祁湜子傳太寒立石勒之滅劉曜也懼而遷于麥田無孤山太寒卒子司繁立秦皇始中遷于度堅山建元七年秦將王統來伐繁率騎三萬拒統于苑川統潛襲度堅山部民五萬餘落悉降于統司繁乃詣統歸降苻堅拜南單于留之長安後以爲鎮西將軍鎮勇士川甚有威惠之稱司繁卒國仁卽位聞堅征晉奔敗國仁收衆至十餘萬又聞堅爲姚萇所殺于是自稱大都督大將軍大單于領秦河二州牧改秦建元二十一年爲建義元年置武陽苑川等十一郡築勇士都城以都之三年苻登遣使拜仁大將軍苑川王四年六月薨僞謚曰烈王廟號烈祖

乞伏乾歸

崔鴻十六國春秋西秦錄曰乞伏乾歸國仁弟雄武有度畧仁薨羣寮以仁子公府幼稚乃立乾歸爲將軍大單于河南王大赦改四年爲太初元年立妻邊氏爲后以南川侯出連乞都爲丞相九月遷于金城二年正月苻登遣使拜爲大將軍金城王六年立子熾盤爲太子七年登遣使授左丞相河南王假黃鉞加九錫之禮十月氏王楊定步騎四萬來伐乾歸勒衆而進大敗定軍斬定及首級萬有七千于是盡有隴西之地十二月僭稱秦王大赦八年呂光來伐歸乃稱藩遣子勃勃爲質旣而悔之十三年秦征西大將軍姚碩德率衆來伐入自南安峽歸次于隴西以拒

碩德興潛師繼發乾歸聞興將至率輕騎數千候興俄與中軍相失爲興追騎所逼戰敗遁歸苑川乃率騎數百馳至允吾秃髮利鹿孤逆歸處之于晉興乾歸將叛謀泄懼爲利鹿孤所害謂其子熾盤曰姚興方盛吾將歸之今送汝兄弟及汝母爲質于是送熾盤兄弟于西平乾歸遂奔長安姚興大悅拜持節都督河南諸軍事河州刺史歸義侯十四年遣乾歸還鎮苑川盡以部民配之十八年正月乾歸至自長安十九年五月苑川地震裂十二月又朝長安二十年姚興慮乾歸終爲西州之患留拜主客尚書以其子熾盤爲西夷校尉行河州刺史二十一年熾盤以長安亂將始乃招結諸部築城于曠琅山以據之夏始元年乾歸隨姚興如平流熾盤攻枹罕剋之遂遣使來告乾歸乾歸奔還苑川遂如枹罕留熾盤鎮之歸將衆二萬遷于度堅山諸將勸稱王七月僭稱秦王大赦改年置百官公卿以下皆復本位四年五月歸畋于五谿山有梟集于其手歸惡之六月爲兄子公府所殺公府出奔盤遷于枹罕遣弟廣武將軍智遠追擒公府于曠琅山南輾裂之八月葬歸于枹罕元平陵僞謚武元王廟號高祖

乞伏熾盤

崔鴻十六國春秋西秦錄曰乞伏熾盤乾歸太子也歸薨自稱大將軍河南王改年爲永康元年以尚書令翟勅爲相國封拜各有差二年盤討吐谷渾別統屈達于渴渾川

太平御覽卷一百二十七
大破之俘獲男女二萬三千三年正月有五色雲起于南山盤大悅謂羣臣曰吾今年應有所定王業成矣於是繕甲整兵以待四方之隙五月間僞檀西征率步騎二萬襲樂都僞檀降遂并南涼兵強地廣十月僭卽秦王位置百官立妻吐蕃氏爲王后四年盤子元基自長安逃歸拜尚書左僕射建弘元年立第二子慕末爲太子領撫軍改年大赦九年盤寢疾顧命太子慕末薨于外寢六月葬武平陵謚文昭王廟號太祖

乞伏慕末

崔鴻十六國春秋西秦錄曰乞伏慕末字安石熾盤之太子幼而好學有文才建弘年立爲太子熾盤薨僭卽秦王位

大赦改年爲承弘元年二月立萬載爲太子三年九月部民多叛慕末焚城邑毀寶器率戶五千東如上邽爲赫連定所拒遂國安南十一月魏遣尚書庫結率騎五千迎慕末衛將軍吉毗固諫以爲不宜遂內徙從之庫結引還四年赫連定遣其叔北平公韋代率衆一萬攻南安城內大饑人相食侍中乞伏延祚吏部尚書乞伏跋踰城奔夏末乃衝壁出降送于上邽及宗族五百餘人悉爲赫連所誅自國仁建義元年乙酉歲至辛未四十七年

晉書曰熾磐在位七年而宋氏受禪以宋元嘉四年死子慕末嗣在位三年爲赫連定所殺始國仁以孝武太元十年僭位至慕末四世年凡四十有六載而滅

北燕馮跋

崔鴻十六國春秋北燕錄曰馮跋字文起長樂信都人其先畢萬之後也子孫食采馮鄉因以氏焉晉永嘉之亂祖父和避地上黨父安雄武有器量爲慕容永將永滅跋東徙和龍家長谷中跋夜夢天門開神光赫然燭于庭中永康末拜中衛將軍建始元年與二弟結謀襲殺慕容熙立高雲爲主正始元年以跋爲中外都督開府儀同三司錄尚書事封武邑公太平元年雲爲其幸臣離班桃仁所殺帳下督張泰李桑誅班及仁羣臣推跋爲主僭卽天王位大赦令曰義貴適時不必改作故陳氏代姜不徙齊號卽號燕國改爲太平元年追尊祖和爲元皇帝父安爲宣皇

帝子永爲太子三年七月以太子永領大單于內置四輔七年建大學以長樂劉軒營邱張熾成周翟崇爲博士簡二千石已下子弟年十五以上教之十四年宿軍地燃一旬乃滅十七年二月北部人趙壽女旣嫁化爲男娶妻而無子跋問諸羣臣曰此何祥尚書左丞傅權對曰漢世雌雞爲雄陰變爲陽君替臣僭之象卒有婦人專寵王莽篡逆今女爲男臣將無君之徵跋曰將何以禳之權曰桑穀生朝大戊修德而殷道中興熒惑守心宋景責躬延齡二紀唯修身崇善可以轉禍爲福十八年八月立子翼爲太子跋戒之曰吾聞君人以學爲本不學無以立尊敬師傅人倫之始汝其夙夜虔虔欽承明訓二十二年八月跋寢

疾召中書監申秀侍中楊哲于內寢謂之曰吾患當不濟卿等善相吾子參決萬機九月跋疾甚輦而臨軒命太子翼勒兵聽政以備非常宋夫人規立其子受惡翼聽政謂之曰上疾將瘳奈何便欲代父臨天下乎翼性仁弱遂還東宮一日三省疾宋夫人矯絕內外遣閹寺傳問而已翼及大臣皆不得見跋弟弘于是與壯士數十人衷甲入禁中宿衛皆不戰而散宋夫人命閉東閣弘家僮庫斗頭勁捷有勇力踰閣而入至于皇堂射殺御女一人跋驚懼而薨弘遣巡城告曰天降凶禍大行崩背太子不侍疾羣公不奔喪疑有逆謀圖危社稷吾備太弟之親遂攝大位以寧國家百官叩門入者進階二等太子翼率東宮兵出戰敗退兵皆奔散宏遣使賜死命宗正馮哲黃門盧昭典葬事于東宮葬跋于長谷陵偽謚文成皇帝廟號太祖

馮弘

崔鴻十六國春秋北燕錄曰馮弘字文通跋之季弟高雲篡位拜中領軍封汲郡公太平元年拜尚書右僕射改封中山公遷尚書令司徒錄尚書事跋薨僭卽天王位大興元年正月壬午朔大赦改年二月立夫人慕容氏爲皇后二年正月立少子王仁爲太子六月有鼠集城西盈數里地中西行至水前銜馬尾後者迭相銜尾而渡識者以爲民遷之象七月魏師來伐神高八月召城遼東營邱成周四郡並降魏九月魏師引還徙民四萬餘戶而西三年六

月魏永昌王來伐五年四月遣右衛孫德乞師于宋十二月又遣尚書陽伊請迎于句麗六年三月端門崩四月魏又遣侍中建興公虞弼東平公鵝青伐攻尅白狼句麗將葛居孟光率衆數萬隨陽伊來迎屯于臨川尚書令郭生因民之憚遷開門而引魏軍魏軍疑而不赴生遂勒衆攻引引句麗兵入自東門與生戰于闕下生中流矢卒句麗軍既入城取武庫甲以給其衆城內美女皆句麗軍人所掠五月乙卯引率龍城見戶東徙焚燒宮殿火一旬不絕令婦人被甲居中陽伊等勒精兵于外葛居盧孟光率騎後殿方軌而進前後八十餘里魏軍追至遼水不擊而還遣使徵宏于句麗後二年爲句麗所殺僞謚昭成皇帝

自馮跋太平元年歲在乙酉至引滅亡之歲丙子二十八載

夏赫連勃勃

崔鴻十六國春秋夏錄曰赫連勃勃朔方人匈奴右賢王去卑之後劉元海之族也會祖父劉虎前趙嘉平中以宗室封樓煩公拜北將軍丁零中郎將祖父豹後趙建武中拜平北將軍左賢王父衛辰苻堅以爲西單于督攝河西諸虜屯于代來城因秦末兵亂遂有朔方之地控弦之士三萬八千姚萇拜辰大將軍河西王大單于魏師來伐辰遣子右地代率騎二萬拒戰河東爲魏所敗遂乘勝濟河攻尅代來執辰殺之勃勃辰第三子奔秦高平公沒奕干

妻之以女姚興以勃勃爲持節安北將軍五原公配以三
交五部鮮卑及雜虜二萬餘落鎮朔方時河西鮮卑杜崙
獻馬八千匹于秦濟河至大城勃勃留之召其衆二萬襲
殺高平公沒奕干而并其衆衆至數萬自稱天王大單于
大赦改弘始十年爲龍昇元年置百官以匈奴夏后氏之
苗裔僭稱大夏以大兄右地代爲丞相封代公發嶺北民
夷十萬于朔方黑渠之南營起京城大赦改龍昇七年爲
鳳翔元年令曰朕之皇祖北遷幽朔改姓姁氏後從母爲
劉氏從母姓非禮也古之氏族無常王者繫天爲子是爲
徽赫實與天連今改姓曰赫連氏庶協皇天之意支庶非
正統者以鐵伐爲氏庶朕宗族子孫剛銳如鐵皆堪代人

二年立夫人梁氏爲后立子瓚爲太子四年九月劉裕滅
秦入于長安十二月裕留子義真鎮長安而還勃勃大悅遂
圖進取之計遣太子瓚率騎二萬南伐長安五年義真遣
龍驤將軍沈山子率衆逆戰瓚擊敗之退屯劉迴堡八月
勃勃進據咸陽劉裕大懼乃召義真東鎮洛陽勃勃入長
安正月羣臣勸勃勃稱皇帝三月築壇于霸上卽皇帝位
大赦改鳳翔六年爲昌武元年冬十月以子瓚領大將軍
雍州牧錄南臺尚書事鎮長安十一月勃勃還統萬統萬
所都之宮殿大成大赦改昌武二年爲真興元年刻石都
城名也南頌紀功德四月追尊父衛辰曰桓皇帝廟號太祖母苻
氏爲桓太后祖父豹曰宣皇帝曾祖虎曰景皇帝高祖訓

兒曰元皇帝五月兩魚于統萬二年十月起冲天臺于統萬南山欲登之以望長安六年勃勃將廢太子瓚爲秦王以酒泉公倫爲太子瓚聞將廢已率衆七萬北伐倫倫率騎三萬拒之戰于平城爲瓚所敗倫死之大原公昌率騎一萬襲殺瓚率衆八萬五千歸于統萬勃勃大悅立昌爲太子七月勃勃寢疾甚輦昇永安殿召羣臣囑以後事薨于永安殿年四十五謚武烈皇帝葬嘉平陵廟號世祖

赫連昌

崔鴻十六國春秋夏錄曰赫連昌一名折勃勃之第三子身長八尺魁岸美姿貌勃勃薨卽位于永安臺大赦改眞興七年爲承光元年七月查城劉渚川有青石大如馬頭浮在水上逆流而行人見而送之十月魏乘虛來伐三年五月戰于黑渠爲魏所敗昌與數千騎奔還魏追騎亦至昌留河內公費連烏提守高平徙諸城民七萬戶于安定以都之四年二月魏軍至安定三月城潰昌奔秦州魏東平公鴟青追擒之送于魏魏封昌秦王尚始平公主尋爲魏所殺

赫連定

崔鴻十六國秦秋夏錄曰赫連定勃勃第五子鳳翔二年封平原公雍州牧鎮長安率衆赴安定進封平原王大將軍領司徒昌爲魏所擒定遂率遣衆數萬據平原僭稱皇帝大赦改承光四年爲勝光元年進征南大將軍白蘭王

太平御覽卷一百二十七
吐谷渾慕瓚爲開府儀同三司河南王十月敗于陰磬登
苛藍山而望統萬城泣曰先帝以朕承大業者豈有今日
之事乎使天假朕年當與諸卿建王季之業俄而有羣狐百數
鳴于定傍令射之無所獲定惡之曰此大不善咄咄天道
復何言三年九月魏軍來襲十月尅安定進攻平原十一
月定遂掠民五萬戶西奔上邽四年河南王慕瓚因戎狄
之衆東面以爭天下魏遣益州刺史沒利延寧州刺史拾
虎率騎三萬來伐遂擒定送于魏勃勃初號龍昇元年歲
在丁未至是歲在辛未二十五年也

太平御覽卷一百二十七

太平御覽卷一百二十八

偏霸部十二

宋劉裕

劉義符

劉義隆

劉劭

劉駿

劉子業

劉彧

劉昱

劉準

宋劉裕

徐爰宋書曰高祖武皇帝姓劉氏諱裕彭城綏輿人夜生
有神光之異是夕甘露降于墓樹嘗遊下邳遇一沙門于
逆旅沙門言及中原故事因云江表尋當喪亂高祖曰便
遂至亂亡當有拯之者不沙門曰拯之者其在君乎其意
甚至初高祖患手瘡積年未瘳沙門曰此瘡難治先有良

藥當以相與因出懷中黃散裹留之沙門既去高祖追而望之倏忽不見以黃散治瘡一傅而愈餘散寶錄之被金瘡輒用有驗晉陵人韋叟少以占相爲事其言多驗嘗相高祖曰君當位主方伯久之又曰君相輒進稟可言唯願富貴無相忘晉末妖賊孫恩作亂前將軍劉牢之東討牢之請高祖參軍事牢之命高祖覘賊遠近將勇士數千人會遇賊至仍迎擊之賊衆數千高祖所將人多死而戰意方酣奮長刀所殺甚衆牢之子敬宣疑高祖淹久恐爲賊所殺乃輕騎赴之既而衆騎並至賊遂大奔高祖爲流矢所傷通中信宿而愈自後累重傷皆弗以爲患軍中益加敬憚恩北走海鹽高祖追而擊之築城于海鹽故治恩知

城弗可下乃進向滬瀆高祖復棄城追之恩乘風浮海奄至丹徒帥衆數萬鼓噪登于蒜山居民皆荷擔而走高祖率所領奔擊大破之投巘赴水死者甚衆恩顛沛僅得還船雖被摧破猶恃衆力遂徑向京師朝廷震懼以高祖爲建武將軍下邳太守帥舟師討恩于郁州復大破之桓元從兄修以撫軍鎮丹徒以高祖爲中兵參軍元篡帝位修入朝元高祖從至京師元宿憚高祖威名又悅高祖之風儀姿貌語司徒王謐曰昨見劉裕卿不得獨擅其清或說元曰劉裕龍行虎步瞻視不凡恐必不爲人下宜早爲其所元曰我方欲平蕩中原使裕以萬人爲前驅關隴不足定也事定之後當更議之耳高祖乃與弟道規沛郡劉毅

東海何無忌潛謀匡復桓修弟弘以征虜將軍領廣陵以道規為弘中兵參軍劉毅先為弘吏佐遭母憂還京口至是住江北與道規共集義徒高祖託以遊獵會無忌及任城魏詠之高平檀憑之及從弟藩等同謀二十七人并願從者百餘人是時大風暴起丙辰詰朝城門開義眾馳入稱有詔齊聲大呼吏士驚散即獲桓修斬而徇之與桓弘主簿平昌孟昶等率壯士六十人斬弘于廣陵城因收眾濟江元遣頓邱太守吳甫之右衛將皇甫敷北拒義軍或曰裕等眾力甚弱豈有辦成陛下何慮之甚元曰劉裕足為一世之雄劉毅家无擔石之儲樗蒲一擲百萬何无忌劉牢之甥酷似其舅共舉大事何謂无成眾推高祖為盟

主移檄京邑遇吳甫之于江乘甫之元驍將也其兵甚銳高祖躬執長刀徑入其陣眾皆披靡即斬甫之進至羅洛橋高祖望賊旗鼓誓眾馳進挺劍指麾光耀如電將士皆莫敢仰視但馮神武爭為先登殊死而戰無不一當百呼聲動天地風火並起鉦鼓之音震駭京邑桓謙等諸軍一時土崩高祖鎮石頭留臺百官羣寮宿衛各率其職于是推高祖為使持節都督揚徐兗豫青冀幽并八州諸軍事鎮軍將軍徐州刺史桓元經潯陽江州刺史郭昶之備乘輿法眼以資之收畧三千餘人挾太子奔于江陵冠軍將軍劉毅輔國將軍何無忌帥諸軍南討破元大將軍郭鈴等于桑落洲元棄眾復挾太子西走初益州刺史毛璩遣弟

子循之誘元以入蜀至于枚回州益州督都焉遷斬元首
傳于京師天子反正詔進位侍中都督中外諸軍事高祖
固讓加錄尚書封豫章公邑萬戶絹三萬疋鮮卑慕容德
僭號于青州德死從子超襲偽位公抗表北討屠廣固超
踰城走獲之戮其王公以下約口萬餘馬二千匹夷其城
隍獻超于京師斬于建康市盧循寇南康廬陵豫章諸郡
守皆委任奔走馳使徵公公至下邳留船運輜重自帥精
銳步歸孟昶諸葛長民懼寇之深也欲擁天子過江公弗
聽和窮窘無餘圖飲藥而卒羣賊大至公悉出輕利鬪艦
躬提幡鼓命軍衆齊力擊之賊衆大敗追奔逮夜乃收兵
西歸循等還潯陽公更簡練三軍將進攻討循聞大軍至

欲遁還豫章乃悉力柵斷左里丙申大軍至左里將戰公麾
以進兵幡竿折遂沉于水衆皆失色公自忻笑曰往年覆
舟之戰亦幡竿折今復然賊必破矣衆乃大悅卽攻柵並
進循兵雖死戰猶弗能禁諸軍乘勝擊之循單舸南走劉
藩孟懷玉斬徐道覆于始興傳首京師交州刺史杜慧度
斬盧循首函七首送都劉毅爲荊州刺史務功驕縱公表請討
之毅單騎出自隘道側分遣諸軍伐蜀以朱齡石爲益州
刺史公授以謀畧遂平成都斬僞蜀王譙縱荊州刺史司
馬休之潛結雍州刺史魯宗之宗之得書響應公帥衆軍
西討休不敢戰乃棄城走奔羌羌僞主姚興死子泓新立
人情騷擾公乃抗表北伐諸軍入關及姚泓戰大破之泓

肉袒出降公至長安長安豐全帑藏盈積公先收其彝器
渾儀土圭之屬獻于京師其餘珍寶珠玉悉以班諸將執
姚泓歸之有司斬于建康市公至洛陽常有紫雲見于軍
上晉帝乃命有司禪位于王改元熙二年爲永初元年三
年正月崩于西陵年六十

沈約宋書曰高祖諱裕字德輿漢楚元王交之後
也小字寄奴初高祖家貧賞負刁達社錢三萬經時無以
還逵執錄甚嚴王謐造達見之乃密以錢代還由是得釋
高祖名微位薄盛流皆不與相知唯謐交焉桓元將篡謐
手解安帝璽綬爲元佐命功臣及義旗事建衆並謂謐宜
誅唯高祖保持之上清簡寡欲嚴整有法度不視珠玉輿

馬之飾後庭無紈綺絲竹之音寧州嘗獻虎魄枕光色甚
麗時將北征以虎魄冶金瘡上大悅命擣碎分付諸將
平關中得姚興從女有盛寵以之廢事謝晦諫卽時遣出
錢帛皆付外府內無私藏宋臺旣建有司奏東西堂施局
脚牀銀塗釘上不許使用直脚牀釘用鐵孝武帝大明中
壞上所居陰室于其處起玉燭殿與羣臣觀之牀頭土鄣
壁上掛葛燈籠麻繩紉侍中袁顗盛稱上儉素之德故能
光有天下克成大業者焉

宋書曰高祖遊京口竹林寺獨卧講前堂上有五色龍章
衆僧見之驚以白帝帝獨喜曰上人無妄言也

述異記曰宋高祖微時嘗遊會稽過孔靜宅靜正晝卧有

神人衣服非常謂之曰起天子在門旣而失之靜遠出適與帝遇延入結交贈遺臨別執帝手曰卿後必當大貴願以身嗣爲託帝許之及定京邑靜自山陰令擢爲會稽內史

劉義符

徐爰宋書曰少帝諱義符高祖長子也高祖崩正月卽皇帝位廬陵王義真明雋秀令朝野屬望而司空徐羨之尚書僕射傅亮領軍謝晦等貪弄朝權忌憚乃共誣罔構成其讞是日上疏收義真徙于新安郡徐羨之王弘傅亮謝晦檀道濟等守門露仗入殿時上在華林園寢舟中兵士競進殺侍御者二人遂扶上出東閣廢爲榮陽王一依漢昌邑晉海西故事遂徙于吳郡六月徐羨之等使邢安泰殺榮陽王金昌亭年十九良言人良言沈約宋書曰羨之等將謀廢立而廬陵王義真輕動多過不任主四海乃先廢義真然後廢帝侍中程道惠勸立第五皇弟義恭羨之不許遣使殺義真于新安殺帝于吳縣帝突走出門追者以門闕擊之倒地然後加害

劉義隆

沈約宋書曰太祖文皇帝諱義隆小字車兒武帝第三子也授西中郎將荊州刺史長七尺五寸博涉經史善隸書少帝廢百官備法駕奉迎卽皇帝位改元元嘉元年三年司徒錄尚書令揚州刺史徐羨之尚書令護軍將軍傅亮

有罪伏誅遣中領軍到彥之征北將軍檀道濟討荊州刺史謝晦上親帥六師擒晦于延頭送京師伏誅京師疾疫遣使存問給醫藥死者若無家屬賜棺木十二年大水京邑乘船二十年貨貴制大錢一當兩三十年三月遇弒于含光殿年四十七

劉劭

沈約宋書曰劉劭字休遠文帝長子六歲拜爲皇太子二十七年有女巫嚴道育自言通靈能役鬼物夫爲劫坐沒入奚官劭姊東陽公主應閣婢王鸚鵡白公主云道育有異術主乃白上託云善蠶求見召入覓許育既入自言服食主及劭皆惑之始興王濬與劭並多過失慮上知使道育

祈請令過不上達遂爲蠱事泄道育叛亡變服爲尼逃東宮濬往京口又載以自隨三十年二月濬自京口入朝復載還東宮有上告云京口民張昨家有一尼服食出入征北內似是嚴道士上使掩捉得其二婢云道育隨征北還都上乃使京口送道育二婢頃至檢覈廢劭賜濬死以語濬母潘淑妃淑妃具以告濬濬馳報劭劭因是有異謀其月二十一日召前中庶子蕭斌告以逆事明且與斌同載從萬春門入張超之手行殺逆使人殺潘淑妃濬屯中堂劭卽僞位改元嘉三十年爲太初元年世祖及南譙王義宣隨王誕並舉義兵劭以軍事委王羅漢魯秀以拒義軍三月十九義軍至新林二十一日至新亭二十二日劭衆

連敗相繼降散四月四日江夏王義恭總羣帥遣魯秀薛
安都等並入殿臧質從廣莫門入同會太極殿前劔穿西
垣入武庫井中即從井中牽出縛劔于馬上防送軍門斬
于牙下濬劔及四子並梟首曝屍于市投劔濬屍于江張
超之爲亂兵所殺剖腹刳心糲食其肉焚其頭骨道育鸚
鵡並都街鞭殺于石頭四望山下焚屍揚灰于江後史曰
□□劔爲元凶

沈約宋書曰世祖孝武皇帝諱駿字休龍小字道民文帝
第三子遷南中郎將江州刺史元凶殺逆以爲征南將軍
加散騎常侍上帥衆入討荊州刺史南譙王義宣雍州刺

史臧質並舉義兵元嘉三十年四月上至于新亭即皇帝
位五月尅京城孝建元年春新祀南郊改元大赦詔凡諸
守位親民之官可申詳舊條勸盡地利力田善蓄者具以
名聞更鑄四銖錢立皇太子業爲太子賜爲父後者爵一
級大明元年正月大赦改元四月京師疾疫遣使案行賜
給醫藥死而無收斂者官爲斂埋諸王及妃主庶姓位從
公者喪事聽設凶門餘悉斷司空南州刺史竟陵王誕有
罪貶爵誕不受命據廣陵反上親御六師車駕出頓宣武
堂三年七月尅廣陵城斬誕初立馳道自闔闔至朱雀門
又自承明門至于元武湖七年于博望山立雙闕八年閏五月
帝崩于玉燭殿年三十五

沈約宋書曰世祖遊幸無度太后六宮常乘副車在後沈
懷文與王景文每諫不宜數出後同從坐松樹下風雨甚
驟景文曰卿可以言矣懷文曰獨言無係宜相與諫之江智
淵卧草側亦謂言之爲善俄而被召俱入雉場懷文曰風
雨如此非聖躬所宜冒景文又曰懷文所啓宜從智淵未
及有言上乃注弩作色曰卿欲效顏竣耶何以恒知人事
又曰竣小子恨不得鞭其面四日京師又變對策皆謂
吾國更歲劉子業字世英太子業字世英太子業字世英太子業字世英
沈約宋書曰前廢帝諱子業小字法師孝武帝長子也世
祖入伐元凶被囚于侍中不省將見害者數矣卒得無恙
世祖崩其日太子卽皇帝位罷南北二馳道孝建以來所

改制度還依元嘉是歲諸郡大旱甚者米一升數百京邑
亦至百餘永光元年春改元大赦八月帝自率宿衛兵誅
大宰江夏王義恭尚書令驃騎大將軍柳元景尚書左僕
射顏師伯廷尉劉德願改元爲景和元年以宮人謝貴嬪
爲夫人加虎賁鞍戟鸞輅龍旗出警入蹕時帝凶悖日甚
誅殺相繼內外百司不保首領先是訛言湘中出天子帝
將南巡荆湘二州以厭之先欲誅除諸叔然後發太宗與
左右阮佃夫王道隆李道兒密結帝左右壽寂之姜產之
等十一人謀共廢帝戊午夜帝于華林園竹林堂射鬼時
巫覡云此堂有鬼故帝自射之壽寂之懷刀入姜產之爲
副帝欲走寂之追而殞之年十七帝幼而狷急在東宮每

爲世祖所責世祖西巡子業啓參起居書跡不謹上詰讓
之子業啓事陳謝上答曰書不長進此是一條耳聞汝素
業都懈獨戾日甚何以頑固爾耶帝少好讀書頗識故事
自造世祖誅及雜篇章往往有辭彩

沈約宋書曰前廢帝景和末召南平王鑠妃江氏入宮使
左右于前逼迫之江氏不受命謂之曰若不從當殺汝三
子江氏猶不肯于是遣使于第殺敬猷敬淵敬宣等杖江
氏一百其夕廢帝亦殞

劉彧

沈約宋書曰太宗明皇帝諱彧字林炳小字榮期文帝第
十一子也爲雍州刺史景和末上入朝被留亭都廢帝誅

害宰輔殺戮大臣恒慮有圖之者疑畏諸父並拘之殿內
收上付廷尉二宿被原將加禍害者前後非一旣而害上
意定明旦便應就禍上先已與腹心阮佃夫李道兒壽寂
之等密共合謀殞廢帝于後堂建安王休仁便稱臣引升
西堂御坐召見諸大臣于時事起倉卒上失履跳至西堂
著烏帽坐定休仁呼主衣以白帽代之引備羽儀雖未卽
位凡衆事悉稱令書施行上卽皇帝位大赦天下改景和
元年爲太始元年鎮軍將軍江州刺史晉安王子勛舉兵
反鎮軍長史鄧琬爲其謀主雍州刺史袁顓帥衆赴之車
駕親御六師出頓中興堂司徒建安王休仁帥衆軍大破
賊斬僞尚書僕射袁顓進討江郢刺雍湘五州平定之晉

安王子勛賜死同黨皆伏誅泰豫元年四月上大漸袁粲
褚淵劉劭蔡興宗沈攸之同被顧命上崩于景福殿年四
十四帝少而和令風姿端雅早失所生養于路太后房內
大明世諸弟多被猜忌唯上見親常侍路太后醫藥好讀
書愛文義在藩時撰江左以來文章志又續衛瓘所註論
語二卷行世及卽大位四方反叛以寬仁待物諸將帥有
父兄子弟同逆者並授以禁兵委任不異故衆爲之用莫
不盡力平定天下逆黨多被全宥其才能者並見授用有
如舊臣才學之士多蒙引進參侍典籍應對左右于華林
園苑堂講周易常自臨聽末年好鬼神多忌諱近讒慝剪
落皇枝宋氏之業自此衰矣

沈約宋書曰王景文爲揚州刺史上既有疾而諸弟並已
見殺唯桂陽王休範人才本下不見疑出爲江州刺史慮
一旦晏駕皇后臨朝景文自然成宰相門族強盛籍元舅
之重歲暮不爲純臣泰豫元年春上疾篤乃遣使送藥賜
景文死手詔曰與卿周旋欲全卿門戶故有此處分

劉昱

沈約宋書曰廢帝諱昱字德融小字慧震明帝長子也太
宗諸子在孕皆以周易筮之卽以所得之卦爲小字故字
曰慧震立爲皇太子太宗崩太子卽位元徽元年正月改
元二年太尉江州刺史桂陽王休範舉兵反賊奄至攻新
亭壘齊王拒擊大破之越騎校尉張苟兒斬休範五年七

月戊子夜帝殞于仁壽殿初昱在東宮年五六歲時始就書學而惰業好嬉戲主師不能禁好緣漆帳竿去地丈餘如此者半食久乃下年漸長喜怒無節左右有失旨者輒手加撲打徒跣蹲踞以此爲常主師以白太宗上輒赦昱所生嚴加捶訓及嗣位內畏太后外憚諸臣猶未得肆忘自加元服變態轉興內外稍無以制三年秋冬間便好出遊行太妃每乘青篋車隨相檢攝昱漸自恣太后不復能禁單將左右棄部伍或十里二十里或入市里或往營署旦出日暮乃歸四年春夏此行彌數自京城尅定意志轉驕于是無日不出與左右人解僧智張五兒恒自馳逐夜出承明門夕去晨反旦出暮歸從者並執鋌矛行人男女及

犬馬牛驢值無免者民間莫懼晝日不敢開門道上行人始絕常著小袴褶未嘗服衣冠有白梃數十枚各有名號鉗鑿錐鋸之徒不離左右嘗以鐵椎椎人陰破左右人見之有斂眉者昱大怒令此人袒臂正立以矛刺臂洞過于耀靈殿上養驢數十頭所自乘馬養于御牀側先是民間訛言謂太宗不男陳太妃本李道兒妾道路之言或云昱是李道兒子也昱每出入去來常自稱劉統或自號李將軍與右衛翼輦營女子私通每從之遊持數百十錢供酒肉之費制露車一乘其上施蓬乘以出入從者不過數十人羽儀追之恒不及又各慮禍亦不敢追尋唯整部伍別在瞻望而已凡諸鄙事過目卽能鍛鍊金銀裁衣作

帽莫不精絕未嘗吹篴執管便韻天性好殺以此爲懽一日無事慘慘不樂齊王潛圖廢立與直閣將軍王敬則謀之七月七日昱乘露車從二百餘人無復鹵簿羽儀往青園尼寺晚至新安寺就曇度道人飲酒醉夕扶還仁壽殿東阿瓊幄中卧時昱出入無恒省內諸閣夜皆不閉且廂下畏相逢值無敢出者宿衛並逃避內殿無相禁攝敬則先結昱左右楊玉夫楊萬年等二十五人謀共取昱其夕王敬則出外玉夫見昱醉熟無所知乃與萬年同入瓊幄內以昱防身刀斬之提昱首依常法敕開承明門出以首與敬則馳至領軍府以首呈齊王王乃戎服率左右數十人稱行還開承明門入昱他夕每開門門者震懼不敢視至是弗之疑齊王既入曉乃奉太后令奉迎安成王

劉準

沈約宋書曰順皇帝諱準字仲謨小字智觀明皇帝第三子也封安成王廢帝殞奉迎王入居朝堂壬辰卽皇帝位昇明元年改元大赦齊王出鎮東城輔政作相三年加相國摠百揆備九錫之禮四月禪位于齊王壬辰帝遜于東郊旣而遷居丹陽宮封爲汝陰王建元元年五月殂于丹陽宮謚曰順皇帝時年十三

史臣曰聖王膺錄自非接亂承微則天歷不至也自三五以來受命之王莫不乘淪亡之極然後符樂推之運水德遷謝其來久矣豈止于區區汝陰揖讓而已哉

直閣中書舍人右軍將軍潯陽王子房反加輔國將軍帥
衆東討一日破十二壘轉冠軍將軍持節都督北討諸軍
事鎮淮陰徵還遷督徐兗二州軍事南兗州刺史明帝常
嫌太祖非人臣相民間流言云蕭道成當爲天子帝愈以
爲疑遣鎮軍將軍吳喜以三千人北使令喜留軍破釜自
將銀壺酒封賜太祖戎服出門迎卽酌飲之喜還帝意乃
悅七年徵還京師部下勸勿就徵太祖曰諸卿聞于見事
主上誅諸弟爲太子稚弱作萬歲後計何關他族唯應速
發事緩必見疑今骨肉相害自非靈長之運禍難將與方
與卿等戮力耳及還京拜散騎常侍太子右衛率時世祖
以功當別封贛縣太祖以一門二封固辭不受詔許之加

二百戶明帝崩遺詔爲右衛將軍領衛尉加兵五百人與
尚書令袁粲護軍褚淵領軍劉劭共掌機事加侍中江州
刺史桂陽王休範反出頓新亭以拒之加使持節平南將
軍給鼓吹一部治新亭城壘未畢賊前軍已至太祖方解
衣高卧以安衆心索白虎幡登西垣使寧朔將軍高道慶
羽林監陳顯達員外郎王敬則浮舸與賊水戰自新林至
赤岸大破之賊平振旅凱入百姓緣道聚觀曰全國者此
公也遷散騎常侍中領軍都督南兗徐青冀五州鎮東將
軍南兗州刺史進爵爲公增邑二千戶與袁粲褚淵劉秉
更日入直號爲四貴四年加尚書左僕射威名旣重蒼梧
王深相猜忌幾加大禍陳太妃罵之曰蕭道成有功于國

今若害之後誰復爲汝著力者乃止楊玉夫等殺蒼梧王
迎立順帝太祖移鎮東府進侍中司空錄尚書事封竟陵
郡公進太尉十六州諸軍事大明泰始以來相承奢侈百
姓成俗太祖輔政罷御省尚方諸飾玩至是又上表禁人
間華僞雜物不得以金銀爲箔馬乘具不得作金銀度不
得織成繡裙衣道路不得著錦履不得用紅色爲幡蓋衣
服不得剪綵帛爲雜花不得以綾作飾不得作鹿行錦及
局脚櫪栢牙床箱籠雜物綵帛作屏障緣薦席不得私作
器仗不得以七寶飾樂器不得以金銀爲花獸不得輒鑄
金銅爲像又進假黃鉞都督中外諸軍事太傅領揚州牧
劔履上殿入朝不趨贊拜不名署左右長史司馬從事中

郎掾屬各四人太尉錄尚書事南徐州刺史如故三月進
相國摠百揆封十郡爲齊公備九錫之禮加璽綬遠遊冠
位在諸侯王上四月進爵爲王又命晁十有二旒建天子
旌旗出警入蹕樂舞八佾辛卯宋使兼太保淵兼太尉僧
虔奉璽綬禪位建元元年四月甲午卽位於南郊柴燎告
天昇壇受禪禮畢卽建康宮大赦改昇明三年爲建元元
年封宋帝爲汝陰王薨追謚爲宋順帝四年三月庚申有
疾召司徒褚淵左僕射王儉曰吾邁疾彌留至于危篤公
等奉太子如事吾當令太子敦睦親戚委任賢才崇尚節
儉宏宣簡惠則天下之理盡矣壬戌崩于臨光殿年五十
六謚曰太祖高皇帝上少有大量博涉經史善屬文雖經

綸夷險不廢素業後宮器物欄檻以銅爲飾者改用鐵內殿施黃紗帳宮人著紫皮履欲以身率下移風變俗每曰使我治國十年當使金與土同價四月庚寅葬武進大陵

蕭贖

蕭子顯齊書曰世祖武皇帝諱贖字宣遠太祖長子也小諱龍兒生於建康清溪宅其夜陳孝后劉昭后同夢龍據屋上故以字上初爲尋陽國侍郎辟州西曹書佐出爲贛令尚書庫部桂陽王休範反上遣軍襲尋陽事平除晉熙王諮議遷司徒右長史黃門郎散騎常侍江州刺史徵拜侍中領軍將軍給鼓吹一部又加持節都督京畿諸軍事三年轉散騎尚書僕射中軍大將軍開府儀同三司進爵

爲公給班劍二十人齊國建爲世子加侍中南豫州刺史給油絡車羽葆鼓吹以石頭爲世子宮官置三率坊省服章一如東宮進爵王太子及太祖卽位爲皇太子太祖崩上卽位乙丑稱先帝遺詔以司徒褚淵錄尚書左僕射王儉爲尚書令丙申立皇太子妃王氏永明元年正月辛亥南郊大赦改元四年正月辛亥籍田禮畢甲寅幸閱武堂勞酒小會十一年正月皇太子長懋薨甲午立太孫昭業爲皇太孫七月上不豫徙居迎昌殿始登階而殿屋鳴咤甚惡之戊寅大漸詔曰始終大期聖賢不免吾行年六十亦復何恨但皇業艱難萬機事重不能無遺慮耳太孫進德日茂社稷有寄子良善相毗輔思宏治道百辟庶僚各

奉爾職謹事太孫勿有懈怠知復何言又詔曰我識滅之
後身著夏衣畫天衣純烏犀導應諸器服悉不得用寶物
及織成等常所服身刀長短二口鐵環者隨我入梓宮靈
上勿以牲牢爲祭唯設餅茶飲干飯酒脯而已喪禮每存
省約不須煩民百官停六時入臨顯陽殿玉像諸佛及供
養具如別牒可盡心禮拜供養自今公私皆不得出家爲
道及起立塔寺以宅爲精舍並嚴斷之唯年六十必有道
心者聽朝賢選序已有別詔是日崩年五十四九月丙寅
葬景安陵帝剛毅有斷爲治總大體以富國爲先頗不喜
遊宴雕綺之事言常恨之未能頓遣臨崩詔凡諸遊費宜
從休自今遠近薦獻務存節儉珠玉玩好傷工尤重嚴

加禁絕

蕭昭業

蕭子顯齊書曰鬱林王昭業字元尚小名法身文惠太子
長子也世祖卽位封南郡王文惠太子薨立爲皇太孫世
祖崩太孫卽位追尊文惠太子爲世宗文皇帝隆昌元年正
月大赦改元加大傅竟陵王子良殊禮閏月丁卯以鎮軍
大將軍西昌侯鸞卽本號開府儀同三司七月癸巳太后
令曰嗣主特鍾沴氣爰表弱齡自入纂鴻業長惡滋甚居
喪無一日之哀衰經爲祈宴之服昏酣長夜萬機斯壅社
稷危殆有過綴旒鎮軍居正體道家國是賴伊霍之舉實
寄淵謨便可依舊典以禮廢黜中軍新安王體自文惠獻

哲天秀入嗣汝業永寧四海卽以禮奉迎卽皇帝位昭業少美容止好隸書世祖敕皇孫手書不得妄出以重貴之進退音吐甚有令譽王侯五日一問訊世祖獨呼昭業至幄座別加撫問呼爲法身鍾愛甚重文惠太子崩昭業每臨哭輒號咷不自勝俄爾還內歡笑極樂在世祖喪泣竟入後宮常列故伎二部入閣迎奏爲南郡王時文惠太子禁其起居節其用度昭業謂豫章王妃庾氏曰阿婆佛法言有福德生帝王家今日見作天子便是大罪左右主師動見拘執不如作市邊屠沽富兒百倍矣及卽位極意賞賜動百數千萬每見錢曰昔時思汝一箇不得今用汝未期年之間所出諸庫儲錢數億垂盡開主衣庫與不逞羣

小又給闈人豎子各數人隨其所欲恣意輦取諸寶器以相剖擊破之以爲笑樂好鬪鷄密買鷄至數千價世祖御物甘草杖宮人寸斷用之毀世祖招婉殿以材賜闈人徐龍駒爲齋龍駒尤親幸爲後閣舍人日夜在宮房內昭業與文帝幸姬霍氏淫通龍駒勸長留宮內聲云度霍氏爲尼以餘人代之皇后亦淫亂齋閣通夜洞開內外淆雜無復分別壬辰蕭鸞使蕭謙等率兵自尚書入雲龍門戎衣服加朱衣于上帝在壽昌殿聞外有變使閉內殿諸房閣令闈人登興光樓望還報云見一人戎服從數百人在西鍾樓下須臾蕭鸞領兵先入帝走向愛姬徐氏房拔劍自刺不中以帛纏頸出殺之餘黨亦見誅卒時年二十二葬以

王禮

蕭昭文

蕭子顯齊書曰海陵恭王昭文字季尚文惠太子第二子也封臨汝公鬱林王卽位改封新安及鬱林王廢尚書令西昌侯鸞奉帝纂統延興元年七月丁酉卽位以尚書令鎮軍大將軍西昌侯鸞錄尚書事揚州刺史封宣城郡公十月進爲太傅揚州牧加殊禮進爵爲王輔政帝起居皆諮而後行思食蒸魚菜太官令以無錄公命不與辛亥皇太后令曰嗣主幼冲庶政多昧早膺疴疾弗克負荷太傅宣城公宜入承寶命式寧宗社帝可降封海陵王十一月稱王有疾數遣御師占視乃殞之時年十五謚曰恭王

蕭鸞

蕭子顯齊書曰高宗明皇帝諱鸞字景栖始安貞王道生子也少孤太祖撫育恩過諸子宋世爲安吉令有嚴能之名遷寧朔將軍淮南宣城二郡太守太祖踐祚遷侍中封西昌侯建元二年爲持節冠軍將軍郢州刺史世祖卽位轉度支尚書侍中領驍騎將軍王子侯舊乘纒帷車高宗獨乘下帷儀從如素士遷中領軍左衛將軍豫州刺史尚書左僕射右衛將軍武帝遺詔爲侍中尚書令加鎮軍中書監開府儀同三司海陵卽位爲侍中持節都督揚南徐三州諸軍事揚州刺史鎮東城給兵五千人錄尚書假黃鉞中外都督加殊禮進爵爲王太后令廢海陵王以上入纂大

太平御覽卷一百二十九
位羣臣三請乃受命建武元年十月癸亥卽皇帝位大赦
改元戊子立皇太子寶卷賜天下爲父後者爵一級二年
十月丁卯詔曰軌世去奢事殷哲后訓物以儉理鏡前王
朕屬流弊之末襲澆漓之季思所以還淳改俗反古移民
可罷東田毀興光樓并敕水衡量省御乘永泰元年四月
甲寅改元大赦五月以太子中庶子梁王爲雍州刺史已
酉崩于正福殿年四十七帝明審有吏才持法無所借大
存儉約罷世祖所起新林苑以地還百姓廢文帝所起太
子東田斥賣之承明中興輦舟乘悉剔去金銀還主衣庫
太官進食有裹蒸帝曰可四片破之餘充晚食世祖掖庭
中宮殿服御一無所改

蕭寶卷

蕭子顯齊書曰東昏侯諱寶卷字智藏高宗第二子也建
武元年立爲皇太子高宗崩太子卽位永元元年正月大
赦改元辛卯祀南郊詔三品清資官以上應食祿者有二
親或祖父母年登七十並給見錢二千貫八月甲申夜宮
內失火十二月雍州刺史梁王起兵于襄陽三年正月丙
申合朔時加寅漏上八刻事畢以宮人于闕武堂元會皇
后正位闕人行儀帝戎服臨視三月南康王寶融卽皇帝
位于江陵八月辛未以太子左率李居士總督西討諸軍
屯新亭九月義軍至南州輔國將軍申胄軍二萬人于姑
熟奔歸丙辰李居士與義軍戰于新亭敗績十月冀青二

州刺史桓和入衛屯東宮已卯以衆降光祿大夫張瓌先
守石頭棄城奔還于是閉宮城自守李居士以新亭降義
師築長圍守宮城十二月新除雍州刺史王珍國侍中張
稷等帥兵入殿廢帝帝在東宮便好弄不喜書學及卽位
性重澁少言不與朝士接唯親信閹人日夜于後堂戲馬
五更方睡至晡乃起漸出遊走屏逐居民從萬春門由東
宮以東至于郊外數十里皆空家靜室巷陌懸幔爲高障
置伏防守謂之屏除夜出晨反火光照天拜愛姬潘氏爲
貴妃仍以金蓮帖地使妃行于其上曰此步步金蓮花耶
每出妃乘卧輿帝騎馬從後著織成袴褶金箔帽執七寶
纏稍戎服急裝不變寒暑凌冒雨雪不避坑阱馳騁渴乏

輒下馬解取腰邊蠶器酌水飲之復上馬馳去選無賴小
兒善走者爲逐馬左右五百人常以自隨置射雉場二百
九十六處翳中帷帳及步障皆袷緣以紅錦金銀鏤弩牙
瑇瑁帖箭郊郭四民皆廢業樵蘇路絕吉凶失時舉疾棄
屍不得殯葬後宮遭火之後更起仙華神仙玉壽諸殿刻
畫彫彩麝香塗壁錦幔珠簾窮極綺麗又信鬼神崔慧景
事時拜蔣子文神爲假黃鉞使持節相國太宰大將軍
揚州牧鍾山王至是又尊爲皇帝迎神像及諸廟雜神皆
入後宮禱祀祈福及聞兵入趨出北戶闔人黃太平以刀
傷其膝仆地顧曰奴反耶直後張齊斬首送梁王稱宣德
皇后令依漢海昏侯故事追封東昏侯

唐秘書監虞世南字伯生論云公子白宋齊代廢主有五並驕淫狂暴前後如一或身被殺戮或傾墜宗社豈厥性頑克自貽非命將天之所棄用傾代業者乎先生曰夫木之性直匠者採以爲輪金之性剛工人理以成器人事也唯上智下愚特稟異氣中庸之才全由訓習自宋齊以來東宮師傅備員而已貴賤禮隔規獻無由且多以位昇罕由德進善乎哉賈生之言昔者成王幼在襁褓之中召公爲大保周公爲太傅太公爲太師保則保其身傅則傅以德義師則導之教訓此三公之職也又置三少曰少保少傅少師是與太子宴者也故乃孩提有識三公三少因明孝仁義禮以導習之逐去邪人不使見惡行選天下之儒士孝悌博聞有道術者以翼衛之使與太子居處故太子生乃見正事聞正言行正道左右前後皆正人也習與正人居不能無正猶生長齊地不能不齊言習與不正人居不能無不正猶生長楚地不能不楚言也秦使趙高傅胡亥教之獄訟所習者非斬剗人則夷人之三族也故胡亥今日卽位明日射人有忠諫者謂之誹謗深計者謂之妖言視殺人如刈草菅然豈胡亥之性惡哉彼其導之者非其理也故選左右裨教之最急此五君者稟凡庸之性無周召之師遠益友之箴規狎不逞之近習以斯下質生而楚言覆國亡身理數然也

蕭寶融

蕭子顯齊書曰和帝諱寶融字智昭高宗第八子也建武元年封隨郡王永元元年改封南康王出爲荆雍寧益梁南北秦七州諸軍事平西郎將荊州刺史蕭穎胄殺巴西梓潼二郡太守劉山陽奉王舉兵以雍州刺史蕭衍爲持節都督諸軍事左將軍以蕭穎胄爲右將軍督行諸軍事夏侯亶自京師至江陵稱宣德太后令南康王宜纂承國祚光臨億兆方俟青宮未卽大號可且封十郡爲宣城王加相國荊州牧假黃鉞二年正月乙巳右將軍蕭穎胄爲左長史進號鎮軍蕭衍進號征東將軍巳巳羣僚上尊號中興元年正月乙巳卽皇帝位大赦改元以相國左長史蕭穎胄爲尚書令位冠軍將軍蕭衍爲雍州刺史十二月建康平皇太后令以蕭衍爲大司馬錄尚書事驃騎大將軍揚州刺史封建安郡公依晉武陵王遵承制故事百僚致敬二年正月皇太后臨朝入居內殿以大司馬蕭衍爲都督中外諸軍事加殊禮進位相國總百揆揚州牧封十郡爲梁公備九錫之禮加遠遊冠位在諸王上二月進梁公爵爲王增封十郡建天子旌旗出警入蹕三月丙辰遜位于梁丁卯梁奉帝爲巴陵王徙姑熟戊辰薨年十五追爲和帝葬恭陵

史臣曰夏以桀亡殷因紂滅郊天改朔理無延世而皇符所集重興西楚神器甄來雖有冥數微名大號斯爲幸矣

太平御覽卷一百二十九

太平御覽卷一百三十

偏霸部十四

北齊高歡 高澄

高洋

高歡

北齊書曰高祖神武皇帝姓高氏諱歡字賀六渾渤海蓀人也六世祖隱晉元菟太守皇考樹性通率不事家業住居白道南數有赤光紫氣之異隣人以為怪勸徙居以避之皇考曰安知非吉居之自若及神武生而皇妣韓氏殂養於同產姊婿鎮獄尉景家神武既累世北邊故習其俗遂同鮮卑長而深沉有大度輕財重士為豪俠所宗目有精光長頭高顴齒白如玉少有人傑表家貧及鳩武明

皇后始有馬得給鎮爲隊主鎮將遼西段長常與神武貌
謂曰君有康濟之才終不徒然便以子孫爲託神武自隊
主轉爲函使嘗乘驛過建興雲霧晝晦雷聲隨之半日乃
絕若有神應者每行道路往來無風塵之色又嘗夢履衆
星而行覺而內喜爲函使六年每至洛陽給令史麻祥使
祥嘗以肉啗神武神武不立食坐而進之祥以爲慢已咎
神武四十及自洛陽還傾產以結客親故恠而問之答曰
吾至洛陽宿衛羽林相率焚領軍張彝宅朝廷懼其亂而
不問爲政若此事可知也財物豈可常守耶自是乃有澄
清天下之志與懷朔省事雲中司馬子如及秀容人劉貴
中山人賈顯智爲奔走之友懷朔戶曹史孫騰外兵史侯

景亦相交結孝昌元年歸尔朱榮于秀容先是劉貴事榮
盛言神武美至是始得見以憔悴故未之奇也貴乃爲神
武更衣服復求見焉因隨榮之廐有惡馬榮命翦之神武
乃不加羈絆而剪竟不蹄嚙已而起曰御惡人亦如此馬
矣榮遂坐神武于床下屏左右訪時事神武曰聞公有馬
十二谷色別爲羣將此竟何用也榮曰但言爾意神武曰
方今天子愚弱太后淫亂孽寵擅命朝政不行以明公雄
武乘時奮發討鄭儼徐紇而清帝側霸業可舉鞭而成此
賀六渾之意也榮大悅語自日中至夜半乃出自是每叅
軍謀旣而榮以神武爲親信都督于時魏明帝銜鄭儼徐
紇逼于太后未敢制私使榮舉兵內向榮以神武爲前鋒

至上黨時明帝才私詔停之及帝暴崩榮遂入洛因將篡位神武諫恐不聽請鑄像卜之鑄不成乃止孝莊帝立以定策勳封銅鞮伯榮嘗問左右曰一日無我誰可主軍皆稱余朱兆榮曰此正可統三千騎以還堪代我主衆者唯賀六渾耳因誡兆曰爾非其匹終當爲其子穿鼻乃以神武爲晉州刺史于是大聚歛因劉貴貨榮下要人盡得其意時州庫角無故自鳴神武異之無幾而孝莊誅榮及余朱兆自晉陽將舉兵赴洛召神武神武使長史孫騰辭以絳蜀汾胡欲反不可委去兆恨焉騰復命神武曰兆舉兵犯上此大賊也吾不能久事之自是始有圖兆計及兆入洛執莊帝以托神武聞之大驚又使孫騰僞賀兆因密覘

孝莊所在將劫以舉義不果乃以書喻之言不宜執天子以受惡名于海內兆不納殺帝而與余朱世隆等立長廣王曄改元建明封神武爲平陽郡公魏普泰元年二月神武自領軍次信都高乾封隆之開門以待遂據冀州是月余朱度律廢元曄而立節閔帝欲羈縻神武三月乃白節閔帝封神武爲渤海王徵使入覲神武辭四月癸巳又加授東道大行臺第一鎮大會長龐蒼鷹自太原來奔神武以爲行臺郎尋以爲安州刺史神武自向山東養士繕甲禁兵侵掠百姓歸心乃詐爲書云余朱兆將以六鎮人配契胡爲部曲衆皆愁怨爲并州符徵兵討步落稽發萬人將遣孫騰尉景爲請留如此者再神武親送之郊雪涕

執別人號慟哭聲動地神武乃喻之曰爾與我俱失鄉客
義同一家不意在上乃爾徵召直向西已當死後軍期又
當死配國人又當死奈何衆曰惟有反耳神武曰反是急
計須推一人爲主衆願奉神武神武曰爾鄉里難制不見
葛榮乎雖百萬衆無刑法終自灰滅今以吾爲主當與前
異不得欺漢兒不得犯軍令生死任吾則可不爾不能取
笑天下衆皆頓顙死生唯命神武曰若不得已明日椎牛
饗士喻以討余朱兆之意封隆之進曰千載一時普天幸
甚神武曰討賊大順也拯時大業也吾雖不武以死繼之
何敢讓焉六月庚子建義于信都乃抗表罪狀余朱氏世
隆等祕表不通八月余朱兆攻陷殷州李元忠來奔孫騰

以爲朝廷隔絕不權立天子則衆望無所係十月壬寅奉
章武王融子渤海太守朗爲皇帝年號中興是爲廢帝十
一月攻鄴相州刺史劉誕嬰城固守神武起土山爲地道
往建大柱一時焚之城陷入地永熙元年正月壬午攻鄴
城據之廢帝進神武大丞相柱國大將軍太師是時青州
建義大都督崔靈珍大都督耿翔皆遣使歸附行汾州劉
貴棄城來降閏三月余朱天光自長安兆自并州度律自
洛陽仲遠自東郡同會鄴衆號二十萬夾洹水而軍節閔
以長孫承業爲大行臺總督焉神武令封隆之守鄴自出
頓紫陌時馬不滿二千步兵不至三萬衆寡不敵乃于韓
陵爲圓陣連牛驢以塞歸道于是將士皆爲死志四面擊

之亦朱兆責神武以背已神武曰本戮力者共輔王室今
帝何在兆曰永安枉害天柱我報讐耳神武曰我昔日親
聞天柱計汝在戶前立豈得言不反耶且以君殺臣何報
之有今日義絕矣乃合戰大敗之普泰元年四月斛斯椿
執天光度律送洛陽長孫承業遣都督賈顯智張歡入洛
陽執世隆彦伯斬之兆奔并州仲遠奔梁州遂死焉時凶
蠹既除朝廷慶悅既而神武至洛陽廢節閔及中興主而
立孝武孝武既卽位授神武大丞相天柱大將軍太師世
襲定州刺史增封并前十五萬戶神武辭天柱減戶五萬
壬辰還鄴魏帝餞于乾脯山執手而別七月壬寅神武帥
師北伐亦朱兆封隆之言侍中斛斯椿賀拔勝賈顯智等

往事亦朱普皆反噬今在京師寵任必構禍隙神武深以
爲然乃歸天光度律于京師斬之遂自滏口入亦朱兆大
掠晉陽北保秀容并州神武以晉陽四塞乃建大丞相府
而定居焉亦朱兆既至秀容分兵守險出入寇抄神武揚
聲討之師出止者數四兆意怠神武揣其歲首當宴會遣
竇泰以精騎馳之一日一夜行三百里神武以大軍繼之
二年正月竇泰奄至亦朱兆庭軍人因宴休惰忽見泰軍
驚走追破之于赤洪嶺兆自縊神武親臨厚葬之慕容紹
宗以亦朱榮妻子及餘衆自保焉突城降神武以義故待
之甚厚神武之入洛也亦朱仲遠部下都督橋寧張子期
自滑臺歸命神武以其助亂且數反覆皆斬之斛斯椿由

是內不自安乃與南陵王寶炬及武衛將軍元毗魏光祿
王思政搆神武于魏帝舍人元士弼入奏神武受勅大
敬于是魏帝與神武隙矣天平元年正月魏帝下詔罪狀
神武爲北伐經營神武亦勒馬宣告曰孤遇尔朱擅權舉
大義于四海奉戴主上義貫幽明橫爲斛斯椿讒搆以誠
節爲逆首昔晉趙鞅興晉陽之甲誅君側惡人今者南邁
誅椿而已以高昂爲前鋒曰若用司空言豈有今日之舉
司馬子如答神武曰本欲立小者正爲此耳魏帝徵兵關
右召賀拔勝赴行在所遣大行臺長孫承業大都督潁川
王斌之斛斯椿共鎮武牢七月魏帝躬率大衆屯河橋神
武至河北十餘里再遣口申誠款魏帝不報神武乃引軍

渡河魏帝問計于羣臣或云南依賀拔勝或云西就關中
或云守洛口死戰未決而元斌之與斛斯椿爭權不睦斌
之棄椿徑還給帝云神武兵至卽日魏帝遜于長安己酉
神武入洛陽止于永寧寺八月神武以萬機不可曠廢乃
與百僚議以清河王亶爲大司馬居尚書下舍而承制決
事焉神武尋至弘農遂西尅潼關九月庚寅神武還至洛
陽乃遣僧道榮奉表關中又不答乃集百僚沙門耆老議
所推立以爲自孝昌衰亂國統中絕神主靡依昭穆失序
永安以孝文爲伯考永熙遷孝明于夾室業喪祚短職此
之由遂議立清河王世子善見議定自清河王王曰天子
無父苟使兒立不惜餘生乃立之是爲孝靜帝魏於是始

分爲二神武以孝武旣西恐逼陝峭洛陽復在河外接近
梁境如向晉陽形勢不能相接議遷鄴護軍祖榮贊焉詔
下三日車駕便發戶四十萬狼狽就道神武留洛陽部分
事畢還晉陽自是軍國政務皆歸相府二年正月魏帝褒
詔以神武爲相國假黃鉞劍履上殿入朝不趨神武固辭
四年十一月壬辰神武西討自蒲津濟衆二十萬周文軍
于沙苑神武以地阨少却西人鼓譟而進軍大亂棄器甲
十有八萬神武跨橐駝俟船以歸元象元年三月辛酉神
武固請解丞相魏帝許之四月庚寅神武朝于鄴壬辰還
晉陽興和元年七月丁丑魏帝進神武爲相國錄尚書事
固讓乃止十一月神武以新宮成朝于鄴魏帝與神武讌

射武定四年八月癸巳神武將西伐自鄴會兵于晉陽

九月神武圍玉壁以挑西師不敢應西魏晉州刺史韋孝
寬守玉壁頓軍五旬城不拔死者七萬人聚爲一冢有星
墜于神武營衆驢並鳴士皆驚懼神武有疾十一月庚子
輿疾班師庚戌遣大原公洋鎮鄴辛亥徵世子澄至晉陽
有惡鳥集庭樹世子使斛律光射殺之己卯神武以無功
表解都督中外諸軍事魏帝優詔許焉是時西魏言神武
中弩神武聞之乃勉坐見諸貴使斛律金作勅勤歌神武自
和之哀感流涕侯景素輕世子嘗謂司馬子如曰王在吾
不敢有異王無吾不能與鮮卑小兒共事子如掩其口至
是世子爲神武書召景景先與神武約得書書背微點及來

書至無點景不至又聞神武疾遂擁兵自固神武謂世子曰我雖疾爾面更有餘憂色何也世子未對又問曰豈非憂侯景叛耶曰然神武曰景專制河南十四年矣常有飛揚跋扈志願我能養豈爲汝駕御也今四方未定勿遽發哀庫狄干鮮卑老公斛律金勅勤老公並性純道直終不負汝可朱渾道元劉豐生遠來投我必無異心賀拔焉過兒僕實無罪過潘相樂本作道人心和厚汝兄弟當得其力韓軌少戇宜寬借之彭樂心腹難得宜防護之少堪敵侯景者唯有慕容紹宗我故不貴之留以與汝宜深加殊禮委以經畧之事五年正月朔日蝕神武曰日蝕其爲我耶死亦何恨丙午陳啓于魏帝是日崩于晉陽時年五

十五祕不發喪天保初追崇爲獻武帝廟號太祖

高澄

字子惠神武長子也母曰

北齊書曰世祖文襄皇帝諱澄字子惠神武長子也母曰婁太后生而岐嶷神武異之魏中興元年立爲渤海王世子就杜詢講學敏悟過人詢甚歎服二年加侍中開府儀同三司尚孝靜帝妹馮翊長公主時年十二神情雋爽便若成人神武試問以時事得失辯析無不中理自是軍國籌策皆預之天平元年加使持節尚書令大行臺并州刺史三年入輔朝政加領軍左右京畿大都督時人雖聞器識猶以少年期之而機畧嚴明事無疑滯于是朝野振肅武定四年十一月神武西討不豫班師文襄馳赴軍所侍

衛還晉陽五年正月丙午神武崩七月戊戌魏帝詔以文襄爲使持節大丞相都督中外諸軍錄尚書事大行臺渤海王文襄啓辭位願停王爵王寅魏帝詔太原公洋攝理軍國遣中使敦喻八月戊辰文襄啓申神武遺令請減國邑分封將督各有差幸未朝于鄴固辭丞相魏帝詔曰旣朝野攸憑安危所繫不得令遂本懷須有權奪可復前大將軍餘如故七年五月文襄帥師赴潁州六月尅之獲西魏大將王思政等八月文襄遇盜崩初梁將蘭欽子京見虜文襄以配厨欽求贖之不許京與其黨六人謀作亂時京將進食文襄却之謂人曰昨夜夢此奴殺我又曰急殺却京聞真刀于盤下冒言進食文襄怒曰我未索食何據來京揮刀曰將殺汝文襄自投傷足入床下賊黨至去床遇弒時年二十九追謚文襄皇帝

高洋

北齊書曰顯祖文宣皇帝諱洋字子進高祖第二子世宗之母弟后初孕每夜有赤光照室后私嘗怪之高祖之歸尔朱榮時經危亂家徒壁立后與親姻相對共憂寒餒帝時尚未能言欬然應曰得活太后及左右大驚而不敢言鱗身重蹠不好戲弄沉深有度晉陽曾有沙門乍愚乍智時人不測呼爲阿秃師帝曾與諸童共見之歷問祿位至帝舉手再三指天而已口無所言見者異之高祖嘗試觀諸子意識各使治亂絲帝獨抽刀斷之曰亂者須斬高

祖是之又各配兵四出而使甲騎僞攻之世宗等怖撓帝
乃勒衆與彭樂敵樂免胄言情猶擒之以獻後從世宗行
過遼陽山獨見天門開餘人無見者內雖明敏貌若不可
世宗每嗤之云此人亦得富貴相法亦何由可解唯高祖
異之天平二年授驃騎大將軍儀同三司武定元年加侍
中五年授尚書令中書監京畿大都督七年八月世宗遇
害事出倉卒內外震駭帝神色不變指麾部分自若嚮斬
羣賊而漆其頭徐宣言曰奴反大將軍被傷無大苦也當
時內外莫不驚異焉赴晉陽親總庶政務寬厚事有不便
者咸蠲省焉八年正月戊辰魏詔進帝位使持節丞相都
督中外諸軍錄尚書事大行臺齊郡王食邑一萬戶三月

辛酉又進封齊王邑十萬戶自居晉陽寢室夜有光如晝
旣爲王夢人以筆點已額旦以告館客王曇哲曰吾其退
乎曇哲再拜賀曰王上加點成主字乃當進也夏五月辛
亥帝如鄴甲寅進位相國總百揆加九錫殊禮齊王如故
魏帝遣兼太尉彭城王韶奉皇帝璽綬禪位于帝戊午乃
卽皇帝位于南郊升壇柴燎告天事畢還宮御太極殿詔
大赦天下改武定八年爲天保元年辛酉尊王太后爲皇
太后辛未遣大使于四方觀察風俗問民疾苦嚴勒長吏
勵以廉平興利除害務存安靜六月詔吉凶車服制度各
爲等差具立條式使儉而獲中又詔冀州之渤海長樂二
郡先帝始封之國義旗初起之地并州之太原青州之齊

郡霸業所在王命是基君子有作貴不忘本思申恩洽編
復田租丁亥詔立皇子殷爲皇太子王后李氏爲皇后八
月詔有能直言正諫不避罪辜蹇蹇若朱雲諤諤若周舍
開朕意沃朕心弼予一人利兼百姓者必寵以榮祿待以
不次又諸牧民之官仰專意農桑勤心勸課廣收天地之
利以備水旱之災庚寅詔曰朕以虛寡嗣弘王業思所以
贊揚盛績播之萬古雖史臣執筆有聞無墜猶恐緒言遺
美時或未書在位王公文武大小降及民庶爰至僧徒或
親奉音旨或承傳旁說凡可載之文籍悉宜條錄封上冬
十月己卯備法駕御金輅入晉陽宮朝皇太后于內殿十
一月周文帝率衆至陝城分騎北渡至建州丙寅帝親戎

出次城東周文帝聞帝軍嚴盛歎曰高歡不死矣遂退四
年征契丹帝親踰山嶺爲士卒先露頭袒身晝夜兼行
千餘里唯食肉飲水壯氣彌厲竟大破契丹虜獲千金雜畜
數十萬頭嘗于東山遊宴關隴未平投盃震怒將事西伐
西人爲之震恐帝素沉敏有遠量初文襄崩祕不發喪其
後漸露魏帝竊謂左右曰大將軍此殂似是天意威權當
歸王室矣及帝將幸晉陽親入辭謁于昭陽殿從者千人
居前持劍者十餘輩帝在殿下數十步立而衛士昇階已
二百許皆攘袂扣刃若對嚴敵帝令主者傳奏須詣晉陽
言訖再拜而出魏帝失色目送帝曰此人似不能見容吾
不知死在何日洎受禪之後留心政術御下肅清六七年

後以天下無事便流連飲宴通日竟夜躬自鼓舞袒露形體傅粉塗黛乘馳牛驢不施鞍勒親戚貴臣雜錯侍從徵集淫媼分付從官觀看無禮以爲戲樂貴妃薛氏甚被愛寵忽憶其嘗與清河王岳私通命支解之弄其髀以爲琵琶歎曰佳人難再得後又以刀子劃楊愔腹崔季舒託俳優言曰老小公子惡戲因掣刀子而去之又置愔于棺中載以輜車幾下釘者數焉發丁匠三十萬人營三臺于鄴構木高二十七丈兩棟相去二百餘步工匠危怯皆繫繩自防帝登脊疾走無怖畏時復雅舞折旋中節傍人見者莫不寒心帝沉湎日甚婁太后舉杖擊之曰如此父生如此兒帝曰天子母豈不如共婿眠時卽當嫁老母與胡太

后大怒自此不復開顏帝免冠辭謝乃設席于地脫背就罰苦請答脚五十因此戒酒一旬還復如初又令黃元顯與諸國白金鳳臺各乘紙鴟以飛黃顯至紫陽乃墮于地凡所殺害或支解或火燒或投蓋以萬數又誅元氏或父母爲主或身常貴盛皆斬于東市凡七百餘人悉投屍漳水剖魚者多獲瓜甲都下爲之久不食魚七年秋自河西總秦戍築長城東至於海前後所築東西凡二千餘里率十里一戍其要害置州鎮凡二十五所八年春帝在城東馬射勅京城婦人悉赴觀不赴者罪以軍法七日乃止於是城內築重城自庫洛投東而至塢紇戍凡四百餘里先是發丁匠三十餘萬營三臺于鄴下因其舊基高博之大起宮室及遊豫園至是三臺成改銅爵曰金

鳳金武曰聖應氷井曰崇光十一月甲午帝登三臺御乾象殿朝讌羣臣並命賦詩以新宮成故也十年春正月甲寅帝如遼陽甘露寺二月丙戌帝于甘露寺禪居深觀唯軍國大政奏聞三月丙辰帝至自遼陽十月甲午帝暴崩于晉陽宮還京師葬武靈陵謚曰文宣皇帝廟號高祖武平初又廟號顯祖先是帝問泰山道士曰吾得幾年爲天子答曰得三十年帝曰十年十月十日得非三十也吾甚畏之過此是無慮人生有死又何足惜但憐正道尚幼人將奪之耳及崩年三十一

太平御覽卷一百三十

太平御覽卷一百三十一

偏霸部十五

北齊高殷

高演

高湛

高緯

北齊高殷

北齊書曰廢帝殷字正道文宣帝之長子也母曰李皇后天保元年立爲皇太子時年六歲性教慧初學反語于跡字下注云自反時侍者未達其故太子曰跡字足傍亦爲跡豈非自反耶文宣每言太子得漢家性質不似我欲廢之立太原王初詔國子博士李寶鼎傳之鼎卒復詔國子博士邢峙侍講太子雖富於春秋而溫裕開朗有人君之度貫綜經業省覽時政甚有美名七年冬文宣召朝臣文武

學士及禮學官于東宮宴會令以經義相質親自臨聽太子手筆措問在坐莫不歎美九年文宣在晉陽太子監國十年十月文宣崩癸卯太子卽位于晉陽宣德殿大赦庚戌尊皇太后爲太皇太后皇后爲皇太后乾興元年庚辰春正月癸丑朔改元己未詔寬徭賦癸亥高陽王湜薨車駕至自晉陽戊申以常山王演爲大丞相都督中外諸軍錄尙書事三月甲寅詔軍國事皆申晉陽稟大丞相常山王規竿秋八月太皇太后令廢帝爲濟南王以大丞相常山王演入纂大統是日王居別宮皇建二年九月殂于晉陽時年卅七謚閔悼王

太平御覽高演百三十一

北齊書曰孝昭皇帝演字延安神武皇帝第六子文宣皇帝之母弟也幼而英峙早有大成之量爲武明皇太后所愛重魏元象元年封常山郡公天保初進爵爲王五年除并省尙書令帝善斷剖長于文理省内畏服七年從文宣還鄴以尙書奏事有異同令帝與朝臣先論定得失然後敷奏帝剖斷咸盡其理文宣歎重之八年轉司空錄尙書事九年除大司馬仍錄尙書文宣崩帝居禁中護喪事幼主卽位乃卽朝班除太傅錄尙書事朝政皆決于帝月餘乃居藩邸自是詔敕多不關帝客或言于帝曰鷲鳥捨巢必有探卵之患今日之地何宜屢出乾明元年從廢帝赴鄴居于領軍府時楊愔燕子獻可朱渾天和宋欽道鄭子

大平御覽 卷一百三十一
默等以帝威望既重內懼逼請以帝爲太師同州牧錄尚書事長廣王湛爲大司馬錄并省尚書事解京畿大都督帝旣以尊親而見猜斥乃與長廣王期獵謀之于野三月甲戌帝初上省旦發領軍府大風暴起壞所御車幔甚惡之及至省朝士咸集坐定酒數行于坐執尚書令楊愔右僕射燕子獻領軍可朱渾天和侍中宋欽道等于坐帝戎服與平原王段韶平秦王高歸彥領軍劉洪徽入自雲龍門于中書省前遇散騎常侍鄭子默又執之同斬于御府之內帝至東閣門都督成休寧抽刃呵帝帝令高歸彥喻之寧厲聲大呼不從歸彥旣爲領軍素爲兵士所服悉皆弭伏寧方歎息而罷帝入至昭陽殿幼主太皇太后皇太

后並出臨御座帝奏愔等罪求伏專擅之辜時庭中及兩廊下衛士二千餘人皆被甲待詔武衛姚永樂武力絕倫又被文宣重遇撫刃思劾廢帝性吃訥兼倉卒不知所言太皇太后又爲皇太后誓言帝無異志惟云逼而已歸彥敕勞衛士解嚴永樂乃納刀而泣帝乃令歸彥引宿衛之士向華林園以京畿軍入守門閤斬姚永樂于園詔以帝爲丞相都督中外諸軍錄尚書事相府佐長史進位一等帝尋如晉陽有詔軍國大政咸咨決焉帝旣嘗大位知無不爲擇其令典考綜名實廢帝恭己以聽政太皇太后尋下令廢少主命帝統大業皇建元年八月壬午皇帝卽位于晉陽宣德殿大赦改乾明元年爲皇建壬辰詔

分遣大使巡省四方觀察風俗問人疾苦考求得失搜訪
賢良二年十一月甲辰詔曰朕嬰此暴疾奄忽無遠今嗣
子冲耻未聞政術社稷業重理歸上德右丞相長廣王湛
研機測化體道居宗人雄之望海內瞻仰同胞其氣家國
所憑可遣尚書左僕射趙郡王叡喻旨徵王統茲大寶先
是帝不豫而無闕聽覽是日崩于晉陽宮時年二十七大
寧元年閏十二月癸卯梓宮還鄴上謚曰孝昭皇帝葬于
文靖陵帝聰敏有識度深沈能斷不可窺測身長八尺腰
帶十圍儀望丰采迥然獨秀自居臺省留心政術閑明簿
領吏所不逮及正位宸極彌加尅勵輕徭薄賦勤恤民隱
內無私寵外收人物雖后父位亦特進無別日昃臨朝務

知人之善惡每訪問左右冀獲直言曾問舍人裴澤在外
議論得失澤率爾對曰陛下聰明至公自可遠侔古昔而
有識之士咸言傷細帝王之度頗爲未宏帝笑曰誠如卿
言朕初臨萬機慮不周悉故致爾耳此事度可久行恐後
又嫌踈漏澤因被寵遇其樂聞過也如此趙郡王叡與庫
狄顯安侍坐帝曰須拔我同堂弟顯安我親姑子今序家
人禮除君臣之敬可言我之不逮顯安曰陛下多妄言
曰若何對曰陛下昔見文宣以馬鞭撻人常以爲非而今
行之非妄言耶帝握其手謝之又使直言對曰陛下太細
天子乃更似吏帝曰朕甚知之然無法來久將整之以至
無爲耳又問王晞晞答曰顯安言是也皆從容受納

高湛

北齊書曰世祖武成皇帝諱湛神武皇帝第九子孝昭皇帝之母弟儀表魁傑神武尤所鍾愛神武方招懷荒遠乃為帝娉蠕蠕而蠢太子菴烏含羅辰女號隣和公主帝時年八歲冠服端嚴神情閑遠華戎歎異象中封長廣郡公天保初進爵為王拜尚書令尋兼司徒遷太尉乾明初楊愔等密相妬忌以帝為大司馬領并州刺史帝既與孝昭謀誅執政遷太傅錄尚書事領京畿大都督皇建初進位右丞相孝昭幸晉陽帝以懿親居守鄴政事成見委託二年孝昭崩遣詔徵帝入統大位及晉陽宮發喪于崇德殿皇太后令所司宣遺詔左丞相斛律金率百寮郭敦等勸進三奏

乃許之大寧元年冬十一月癸丑皇帝卽位于南宮大赦改皇建二年為大寧庚申詔遣大使巡行天下考政善惡問人疾苦擢進賢良是歲周武帝保定元年也河清元年春正月乙亥車駕至自晉陽辛巳祀南郊壬午享太廟丙戌立妃胡氏為皇后子緯為皇太子大赦四月乙巳青州刺史上言今月庚寅河濟清改大寧二年為河清二年癸未春正月乙卯帝詔臨朝堂策試秀才以太子少傅魏收為兼尚書左僕射十二月大雨雪連月南北千餘里平地數尺霜晝下雨血于太原四年三月慧星見有物隕于殿庭如赤漆鼓帶小鈴殿上石自起兩兩相對又有神見于後園萬壽堂前山穴中其體壯大不辨其面兩齒絕白長出

于脣帝直宿嬪御已下七百人咸見焉帝又夢之夏四月
戊午大將軍東安王婁叡坐事免乙亥陳人來聘太史奏
天文有變其占當有易王景子乃使太宰段韶兼太尉持
節奉皇帝璽綬傳位于皇太子大赦改元爲天統元年百
官進級降罪各有差又詔皇太子妃斛律氏爲皇后于是
羣公上尊號爲太上皇帝軍國大事咸以奏聞始將傳政
使內叅乘子尙乘驛送詔書於鄴子尙出晉陽城見人騎
馬隨後忽失之尙未至鄴其言已布矣天統四年十二月
辛未太上皇帝崩于鄴宮乾壽堂時年三十二謚曰武成
皇帝廟號世祖葬永平陵

後主高緯

北齊書曰後主諱緯字仁綱武成皇帝之長子也母曰胡
皇后夢于海上坐玉盆日入裙下遂有娠天保七年五月
五日生帝于并州邸帝少美容儀武成特所寵愛拜王世
子及武成入纂大業立爲皇太子河清四年武成禪位于
帝天統元年乙酉夏四月丙子皇帝卽位于晉陽宮大赦
改河清四年爲天統三年二月壬寅朔帝加元服大赦四
年秋周人來通和太上皇帝詔侍中斛斯文略報聘于周
十二月辛未太上皇帝崩武平三年二月以侍中祖珽爲
左僕射是月敕撰元洲一作淵苑御覽後改名聖壽堂御覽
三月辛酉詔文武官五品以上各舉一人秋七月戊辰誅
左丞相咸陽王斛律光及其弟幽州行臺荆山公豐樂八

月庚寅廢皇后斛律氏爲庶人是月聖壽堂御覽成敕付
史閣後改爲修文殿御覽六年八月周師入洛川屯芒山
攻逼洛城縱火船焚浮橋河橋絕閏月己丑遣右丞相高
阿那肱自晉陽禦之師次河陽周師夜遁七年冬十月帝
大狩于祁連池周師攻晉州癸亥帝還晉陽甲子出兵大
集晉祠庚午帝發晉陽列陣而行上雞栖原與周齊王憲
相對至夜不戰周師斂陣而退十一月周武帝退還長安
留偏師守晉州高阿那肱等圍晉州城戊寅帝至圍所十
二月戊申周武帝來救晉州庚戌戰于城南齊軍大敗帝
棄軍先還癸丑入晉陽憂不知所之甲寅大赦帝謂朝臣
曰周師甚盛若何羣臣咸曰天命未改一得一失自古皆

畧羣臣各異議帝莫知所從又引高元海宋士素盧思道
李德林等欲議禪位皇太子先是望氣者言當有革易于
是依天統故事傳位幼主帝自稱太上皇幼主名恒帝之
長子也母曰穆皇后武平元年六月生于鄴其年十月立
爲皇太子隆化二年正月乙亥卽皇帝位時年八歲改元
爲承光元年大赦于是黃門侍郎顏之推中書侍郎薛道
衡侍中陳德信等勸太上皇往河外募兵更爲經畧若不
濟南投陳國從之丁丑太皇太后太上皇自鄴先趨濟州
周師漸逼癸未幼主又自出鄴東走己丑周師至紫陌橋
癸巳燒城西門太上皇將百餘騎東走己亥渡河入濟州
其日幼主禪位于大丞相任城王湝令侍中斛律孝卿送

禪文及璽紱于瀛州孝卿仍以之歸周又爲任城王詔尊
太上皇爲無上皇幼主爲守國天王留太后于濟州遣
阿那肱留守太上皇并皇后攜幼主走青州韓長鸞鄧顯
等數十人從太上皇既至青州卽爲入陳之計而高阿那
肱召周軍約生致齊主而屢使人告言賊軍在遠已令人
燒斷橋路太上皇所以停緩周軍奄至青州太上皇窘急
將遜於陳置金囊於鞍後與長鸞淑妃等十數騎至青州
南鄧村爲周將尉遲剛所獲送鄴周武帝與抗賓主禮并
太后幼主諸王俱送長安封帝溫國公在位凡一十三年
帝業昏亂加之暴虐崔季舒斛律光等皆以直見殺帝好
自彈琵琶而唱無愁曲每處深宮羞見朝士三日一臨小
殿啟事者走如飄風頭著于胷不得平視凡諸犬馬皆有
儀同郡君之號又於宮中立貧窮村舍帝自敝衣爲乞兒
每好不急之求一夜索蝎及曉得三斗置之浴斛使人裸
臥斛中觀其號叫宛轉而爲笑樂又賣官爵各分州郡下
至鄉官皆降中旨於是州縣官人多出富商大賈競爲貪
縱人不聊生以至于敗也初武成夢大蝟攻破鄴城乃悉
索境內蝟膏以絕之議者以帝之名聲與蝟相協亡齊之
徵也

太平御覽卷一百三十一

太平御覽卷一百三十一

偏霸部十六

蕭衍

蕭綱

蕭繹

侯景

附

蕭衍

梁書曰高祖武皇帝諱衍字叔達小字練兒南蘭陵中都里人漢相國何之後也皇考諱順之齊高帝族弟也叅預佐命封臨湘縣侯高祖以宋大明八年生於秣陵同夏里三橋宅生而有奇異兩髀駢骨頂上隆起有文在右手曰武帝及長博學多誦好籌畧有文武才幹時流名輩咸推重焉所居室常若雲氣人或遇者體輒肅然起家巴陵王南中郎法曹遷衛將軍王儉東閣祭酒儉一見深相器異

謂廬江何憲曰此蕭郎三十內當作侍中出此則貴不可
言竟陵王子良開西邸招文學高祖與沈約謝朓王融並
遊焉隆昌初明帝輔政起高祖爲寧朔將軍鎮壽春服闋
除大子庶子給事黃門侍郎入直殿省預蕭湛民在等定
策勲封建陽縣男邑三百戶建武二年魏遣將劉昶王肅
帥衆寇司州高祖爲冠軍將軍帥所領自外進戰魏
軍表裏受敵乃棄圍退走軍罷以高祖爲右軍晉安王司
馬淮陵太守還爲太子中庶子領軍羽林監頃之出鎮石
頭四年魏帝自率大衆寇雍州明帝令高祖赴援又遣崔
惠景督諸軍高祖等並受節度明年三月惠景與高祖進
行鄧城魏主率十萬餘騎奄至惠景軍死傷畧盡唯高祖

全師而歸俄以高祖行雍州府事明帝崩東昏卽位始安
王遙光徐孝嗣江祐更直內省分日帖敕高祖聞之謂從
舅張弘策曰政出多門亂其階矣時高祖長兄懿罷益州
還仍行郢州事乃使弘策詣郢陳計於懿曰若隙開釁起
必中外土崩今得守外藩幸爲身計郢州控帶荆湘西注
漢沔雍州士馬呼吸數萬虎視其間以觀天下此蓋萬全
之策如不早圖之悔無及也懿聞色變心不之許弘策還
是歲至襄陽於是潛造器械多伐竹木沈於檀溪密爲舟
裝之備二年冬懿被害信至高祖密召長史王茂中兵呂
僧珍等謀之以十一月召僚佐集於廳事謂之曰昔武王
會盟津皆曰紂可伐今昏主惡稔窮虐極暴誅戮朝賢罕

有遺育生人塗炭天命殛之卿等同心疾惡共興義舉公
侯將相良在茲日各盡勲効我不食言是日建牙於是收
集得甲士萬餘人馬千餘匹船三百艘音駁出檀溪竹木裝
艦先是東昏以劉山陽爲巴西太守配精兵三千使過荆
州就行事蕭穎胄以襲襄陽穎胄伏兵斬之送首於高祖
仍以南康王尊號之議來告且曰時月未利當須來年二
月遽便進兵恐非廟算高祖答曰所藉義心一時驍銳事
事相接猶恐疑怠天時人事有何不利處分已定安可中
息三年二月南康王爲相國以高祖爲征東將軍高祖發
襄陽移檄京邑高祖至竟陵長史王茂與太守曹景宗爲
前軍輕兵濟江逼郢城張冲出軍迎戰茂等邀擊大破之

三月南康王卽帝位於江陵改永元三年爲中興元年遙
廢東昏爲涪陵王以高祖爲尙書左僕射加征東將軍都
督征討諸軍事假黃鉞五月東昏遣寧朔將軍吳子陽等
救郢州六月子陽進兵據加湖去郢三十里傍山帶水
築壘以自固七月高祖命王茂潛師襲加湖俄而大潰子
陽竄走衆盡溺于江王茂虜其餘而旋郢城主程茂以城
降高祖又遣軍主唐脩期攻隨郡並剋之司州刺史
王僧景遣子入質司部悉平八月天子遣黃門勞軍九月
詔高祖平定東夏許以便宜從事是月豫州刺史申胄棄
姑熟走大軍進據之遣曹景宗蕭穎達領馬步進頓江寧
東昏遣李居士率步軍迎戰景宗擊走之大軍次新林命

王茂進據越城曹景宗據皂莢橋十月東昏又遣征虜將軍王珍國等列陣於航南大路 精手利器尚十餘萬人

闔人王儀

褚羊切

子持白虎幡督率諸軍王茂曹景宗等

騎

居綺切

角奔之鼓噪振天地珍國之衆一時土崩諸軍望

之皆潰茂軍追至宣陽門李居士以新亭壘徐元瑜以東府城降石頭白下諸軍並宵潰高祖鎮石頭命衆軍圍六門東昏悉焚燒門內驅逼營署官府並入城有衆二十萬

青州刺史桓和給

徒亥切

東昏出戰因以衆來降高祖令諸

軍築長圍十二月衛尉張稷北徐州刺史王珍國斬東昏送首茂師高祖命呂僧珍勒兵封府庫及圖籍收嬖妾潘淑妃及凶黨王咺

沈晚切

之以下四十八人屬吏以宣德皇

后令追廢涪陵王爲東昏侯依漢 海 昏 侯故事授高

祖中書監都督揚徐二州諸軍事大司錄尚書驍騎大將軍揚州刺史封建安郡 公食邑萬戶給班劍四十人黃鉞侍

中征討諸軍事並如故高祖入屯閱武堂下令大赦二年

天子遣慰勞京邑追贈高祖祖散騎常侍左光祿大夫考侍

中丞相宣德皇后臨朝入居內殿詔進高祖都督中外諸

軍事劍履上殿入朝不趨讚拜不名加前後部羽葆鼓吹

置左右長史司馬從事中郎掾屬各四人又詔進位相國

總百揆揚州刺史封十郡爲梁公備九錫之禮高祖固辭

二月進梁公爵爲王以豫州之南譙廬江永嘉等十郡益

梁國并前二十郡三月命王冕十有二旒建天子旌旗出

警入蹕庚辰齊帝禪位于梁高祖謙讓不受太史令蔣道
秀陳天文符讖六十四條事並明著羣臣固請乃從之夏
四月丙寅高祖卽皇帝位于南郊設壇柴燎告類于天大
赦改齊中興二年爲天監元年封齊帝爲巴陵王八月詔
中書監王瑩等八人叅定律令十一月立皇子統爲
皇太子四年正月詔九流常選年未三十不通一經不得
解褐若有才同甘顏勿限年次是歲大稔米斛三十五年
三月癸未魏宣武帝從弟翼率其諸弟來降陳伯之自壽
陽率衆歸降八年正月輿駕親祠南郊赦天下九年
三月幸國子學親臨講肄詔皇太子及王侯之子年在從
師者可令入學十年親祠南郊大赦三月盜殺東莞瑯琊

二郡守鄧晰音熱切以昫山引魏軍遣振遠將軍馬仙理

書幼名仙婢及長以婢名不典遂去女從婢補鼎切字書又音駢討之十月馬仙理大破

魏軍斬馘古獲切十餘萬尅復昫山城十八年親祠南郊普

通元年正月改元大赦五年六月龍鬪于曲阿王陂

因西行至建陵城所經處樹木倒折七年赦死罪以下大

通元年三月幸同泰寺捨身甲戌還宮赦天下改元二年

十月以魏北海王元顥爲魏主遣東宮直閣將軍陳慶之

衛送還北魏豫州刺史鄧獻以地內屬中大通元年九月

癸巳幸同泰寺捨身公卿以下以錢一億萬奉贖十月已

酉輿駕還宮大赦改元三年十月已酉幸同泰寺昇法座

爲四部衆說大般若涅槃經義迄于乙卯六年春親耕籍

田四月熒惑在南斗大同元年正月改元大赦二年三月
詔文武在位舉爾所知公侯將相隨才擢用十年三月幸
蘭陵謁建寧陵十一年四月魏遣使來聘中大同元年四
月於同泰寺講說法會大赦改元十月以前東揚州刺史
岳陽王^察晉^音為雍州刺史太清元年二月魏司徒侯景以
豫章廣潁洛陽等十三州內屬以景為大將軍封河南王
大行臺承詔如鄧禹故事四月大赦改元八月以大將軍
侯景錄行臺尙書事二年八月侯景舉兵反十月景自橫
江濟于采石至京師臨賀王正德率衆附賊十一月賊攻
陷東府城三年三月戊午前司州刺史羊雅仁等進軍東府
北與賊戰大敗己未賊攻陷宮城縱兵大掠侯景自為都

督中外諸軍事大丞相錄尙書四月高祖以所求不供憂
憤寢疾五月丙辰崩于淨居殿時年八十六十一月追尊
為武皇帝廟號高祖葬于修陵梁書曰高祖生知淳孝少
而篤學洞達儒元雖萬機多務猶卷不輟手後宮職司嬪
妃已下皆衣不曳地傍無錦綺不飲酒不聽音樂歷觀古
昔帝王人君恭儉莊敬藝能博學罕或有焉

海鵬案宋本
梁書曰下另起

蕭綱

梁書曰太宗簡文皇帝諱綱字世纘小字大通高祖第三
子天監五年封晉安王中大通三年四月昭明太子薨五
月立為皇太子太清三年五月高祖崩即皇帝位大寶元
年正月大赦改元西魏寇安陸執同州刺史柳仲禮盡沒

漢東之地二月邵陵王綸自尋陽至於夏口郢州刺史南平王恪以州讓綸侯景逼帝幸西州夏大饑人相食京師尤甚前司州刺史羊雅仁自尙書省出奔西州八月湘東王繹遣領軍將軍王僧辯率衆逼郢州侯景自進位相國封二十郡爲漢王邵陵王綸棄郢州走十月侯景自加宇宙大將軍都督六合諸軍事二年三月侯景自率衆西寇自石頭至新林舳艫相接四月至西陽景分遣僞將朱子仙任約襲郢州閏月景進寇巴陵王僧辯連戰不能剋五月湘東王遣遊擊將軍胡僧祐信州刺史陸法和援巴陵景遣任約率衆拒援軍六月僧祐等擊破任約擒之景解圍宵遁王僧辯督衆軍追景攻魯山城剋之七月景還至

京師王僧辨軍次湓城八月侯景遣衛尉卿彭儁率兵入殿廢帝爲晉安王幽于永福省害皇太子大器潯陽王大心西陽王大鈞武寧王大球義安王大昕及潯陽王諸子二十人矯詔禪於豫章王棟大赦改元十月帝崩于永福省時年四十九賊僞謚曰明皇帝廟號高宗明年三月王僧辯率百官奉梓宮升朝堂世祖追崇爲簡文皇帝廟曰太宗葬莊陵梁書曰太宗見幽繫題壁自序云有梁正士蘭陵蕭世纘立身行道終始如一風雨如晦雞鳴不已弗欺暗室豈況三光數至於此命也如何又爲連珠二首文甚悽愴

海鵬案宋本梁書曰另行起

蕭繹

梁書曰世祖孝元皇帝諱繹字世誠小字七符高祖第七子也天監十三年封湘東郡王大同六年使持節出爲都督江州諸軍事江州刺史太清元年徙爲都督荆雍湘司郢寧梁南北秦九州諸軍事鎮西將軍荆州刺史三年三月侯景寇沒京師太子舍人蕭歆至江陵宣密詔以世祖爲侍中假黃鉞大都督中外諸軍事司徒承制餘如故是月世祖徵兵於湘州湘州刺史河東王譽拒而不遣七月遣世子方等帥衆討譽戰敗又遣將軍鮑泉代討譽九月雍州刺史岳陽王譽舉兵反來寇江陵世祖嬰城拒守營將杜勣七力切及楊混各率其衆來降營遁走鮑泉攻湘州不剋又遣左衛將軍王僧辨代將六寶元年五月王

僧辨剋湘州斬河東王譽湘州平二年二月魏遣使來聘三月侯景悉兵西上會任約軍王僧辯帥衆屯巴陵景進寇巴陵世祖遣將軍胡僧祐陸法和帥衆下援巴陵任約敗景遂遁走僧辯帥軍追景所至皆捷八月僧辯下次溢城十月王僧辯等表稱侯景弑逆皇帝賊害太子宗室在寇庭者並罹酷禍世祖奉諱大臨三日百官縞素司空南平王恪率宗室將軍胡僧祐率羣僚並奉牋勸進世祖固讓三年二月王僧辯衆軍發自潯陽世祖馳檄告四方有能縛侯景及送首者封萬戶開國公三月王僧辯等平侯景傳其首於江陵戊子以賊平告明堂太社四月益州刺史新除假黃鉞太尉武陵王紀竊位於蜀改號天正元年世

祖遣司空蕭太拜謁瑩陵修復社廟五月以尚書令征東將軍江州刺史王僧辯爲司徒斬賊左僕射王偉尚書呂季畧一作駱於江陵市是月魏遣太師潘洛辛等寇秦郡王僧辯遣杜弼帥衆拒之以陳霸先爲征北大將軍南徐州刺史是月魏遣使賀平侯景八月蕭紀率巴蜀大衆東下遣護軍陸法和屯巴峽以拒之是月四方征鎮王公卿士復勸世祖卽尊號表三上乃從之承聖元年十一月丙子卽皇帝位於江陵立太子方矩爲皇太子追尊所生妣阮修容爲文宣太后二年西魏遣大將尉遲迥襲陷益州三年三月以郢州刺史陸法和爲司徒四月以征北大將軍陳霸先爲司空九月魏遣其柱國萬紐于謹率大衆來寇

冬十月魏軍至於襄陽蕭督率衆會之內外戒嚴車駕出行都柵徵王僧辯等軍十一月魏軍至柵下徵廣州刺史王琳入援辛卯魏軍大攻世祖出枇杷門親臨陣督戰六軍敗績反者斬西門以納魏師城陷於西魏世祖見執十二月西魏害世祖遂崩焉時年四十七太子元良始安王方略皆見害明年四月追尊爲孝元皇帝廟號曰世祖梁書曰世祖聰明俊朗天才英發年五六歲高祖問汝讀何書對曰能誦曲禮高祖曰汝試言之卽誦上篇左右莫不驚歎旣長好學博覽羣書下筆成章出言爲論才辯敏速冠絕一時也

侯景

附

侯景河朔人也少不羈及長驍勇有膂力高歡以爲將軍
雄勇冠時征伐數有大功常謂歡曰若假三萬人當橫行
天下要須縛取蕭衍老翁爲太平寺主後高歡死景乃以
河南降于梁高澄使慕容紹宗軍圍于長社景謂紹宗曰
欲送客耶將定雄雌耶紹宗曰吾將決戰景乃令將士皆
被甲持短刀但低視斫人脛足遂敗紹宗軍裨將斛律光
尤之紹宗曰吾戰多矣未見此賊之難破相持連月景食
盡其將暴顯等降紹宗景衆乃潰景與腹心數騎濟淮
稍收散卒得馬步八百人晝夜兼行追軍不敢逼使謂紹
宗曰景若就擒公復何用紹宗乃縱之遂攻壽陽下之而
據其城梁武以爲河南王招集戰士乃請錦萬匹爲軍人

作袍帝不與以青布給之欲請娶於王謝武帝曰王謝門
高非其可偶朱張已下訪之景恚曰會將吳兒女以配奴
景旣爲朝廷所疑武帝使謂景曰譬如貧家畜十客尙能
得志朕惟有一客致有忿言是朕之失也明日遂將兵於
歷陽濟江聞邵陵王綸督衆軍至景乃謀於王偉王偉曰
莫若直掩京都臨賀反於內大王攻於外天下不足定也
兵法曰遲巧不如拙速今便須進路不然邵陵及矣景遂
晨夜兼行至都百道攻城縱火焚諸城門城中倉卒未有
備乃鑿門樓下水沃火久之方滅景又於城南城西各起
土山以臨城內城內亦作兩土山以應之簡文以下皆親
執畚音鋪楚合景又募人先爲奴者賞以不次朱异家黥

奴踰城投賊景以爲儀同使至關下以誘城內乘馬披錦袍詬曰朱异五十年仕宦方得中領軍我始事侯王已爲儀同於是奴僮競出盡皆得志景決石關前水百道攻城晝夜不息城陷景自爲丞相以甲士五百人自衛帶劍昇殿帝謂景曰卿久在戎得無勞乎景不對帝又曰卿是何州人而至此又默然左右任約代對及出景謂約曰吾常據鞍對敵矢石交下而意無怖今見蕭公使人自愕豈非天威難犯吾不可以再見之矣先是城中積屍不暇埋瘞或已死未殮或將死未絕景悉命聚而焚之尙書郎鮑正疾篤賊曳而焚之宛轉火中久而方絕武帝崩立簡文又立豫章王景皆殺之遂篡位國號漢年稱太始王偉請立

七廟并請七代諱敕太常具祭祀之禮景曰前代吾不復憶惟記得阿爺名大標且在朔州伊那得來噉衆聞咸笑景頻爲王僧辯所破將走王偉按劍諫曰自古豈有走天子今宮中衛士尙可一戰寧可便走景曰我在北時打賀拔勝破葛榮揚名河朔與高王一種人今來南直渡大江取臺城如反掌打邵陵王於北山摧柳仲禮於南岸皆爾所親見也今日之事恐是天亡爾好守城吾當決一戰乃與百騎東走至松江與腹心數千人乘舸入海至湖夏州前太子舍人羊鯤殺景景左足上有肉瘤狀似龜戰應剋捷則肉隱起分明如不勝則低是日瘤陷肉中遂傳首於江陵

太平御覽卷一百三十二

偏霸部十七

梁蕭方智

蕭巋

陳陳霸先

蕭方智

太平御覽卷一百三十三

偏霸部十七

後梁蕭譽

蕭琮

梁書曰敬帝諱方智字慧相小字法真世祖第九子也太
清三年封興梁侯承聖元年封晉安郡王二年出為平南
將軍江州刺史三年十一月江陵陷太尉揚州刺史王僧
辯司空南徐州刺史陳霸先定議以帝為太宰承制奉迎
還京師四年二月至自潯陽入居朝堂以太尉王僧辯為

中書監錄尚書驃騎將軍都督中外諸軍事加司空陳霸
先班劍二十一人三月齊遣其上黨王高渙送貞陽侯蕭
淵明來主梁嗣至東關遣吳興太守裴之橫與戰敗績
橫死王僧辯率衆出屯姑熟七月王僧辯納貞陽侯蕭淵
明自采石濟江入于京師以帝爲皇太子九月司空陳霸
先舉義襲殺王僧辯黜蕭淵明丙午帝卽皇帝位十月詔
改承聖四年爲紹泰元年大赦以貞陽侯淵明爲司徒封
建安郡公以司空陳霸先爲尚書令尊所生夏貴妃爲皇
太后立妃王氏爲皇后太平元年正月大赦四月齊軍水
步入丹陽縣至秣陵故治六月齊潛軍至蔣山北至元武
湖司空陳霸先授衆軍節度大破之七月陳霸先進位司

徒九月改元大赦除司徒陳霸先爲丞相錄尚書事二年
四月齊遣使請和八月加丞相黃鉞領太傅劍履上殿九
月爲相國總百揆封十郡爲陳公備九錫之禮禪位于陳
奉帝爲江陰王薨于外邸時年十六追謚敬皇帝史臣曰
梁季橫潰喪亂屢臻當此之時天歷去梁敬皇高讓將同
釋負焉

後梁蕭啓

後梁宣帝諱啓昭明太子第三子也封岳陽王授雍州刺
史孝元被西魏所害啓遂爲魏附庸稱大定元年以蔡大
寶爲相時人比劉備遇孔明啓性不好酒尤惡見婦人酷
信佛法謂尙書宋如周曰卿何謗經如周踧踏下子六切音迹

自陳懼而出以告大寶寶曰卿當不謗餘經不信法華耳如周乃悟經云隨喜面不狹長如周面狹且長上故戲之耳嘗見邑居殘毀干戈日用在位八年憤惋而歿年四十七子歸立

蕭歸

明帝諱歸宣帝第三子也聰明有器識大定元年爲太子宣帝崩太子卽位號天保元年十五年周武帝平北齊得傳國璽歸入周賀武帝大會羣臣及諸蕃客周武自彈琵琶令故齊主高緯起舞達摩支故安德王延宗悲不自勝緯舞訖勸歸歸乃起舞周武曰梁主乃能爲朕舞乎歸曰陛下旣彈五弦臣何敢不同百獸周武大悅周武指齊氏

故臣吒列長又謂歸曰是登陣罵朕者歸曰長又未能抱樂翻敢吠堯周武大笑初雖禮接歸未深知至是歸承間乃陳其父荷太祖拯救之恩并敘二國艱虞唇齒掎角之事辭理辯暢因涕泗交流周武爲之欷歔自是禮遇日深賜雜繒百段馬五匹并賜齊宮伎女遣歸國執歸手曰待破突厥必送梁王歸江東歸經途古蹟莫不駐馬賦詩以敘其懷至於江陵凡三十首女爲隋晉王廣妃在位十四年而歿

蕭琮

琮明帝太子也旣立赦其封內改元寬運琮性寬仁有大度博學有文義兼善弓馬明年隋文徵琮入朝琮率其臣

二百餘人朝于長安羣臣辭于送客堂中琮下馬執別莫不隕泣既至隋文帝留之使崔宏度將兵攻江陵江陵不守於是國廢

陳陳霸先

陳書曰高祖武皇帝諱霸先字興國小字法生吳興長城下若里人漢太邱長陳寔之後也世居潁川寔元孫準晉太尉準生匡匡生達永嘉南遷爲丞相掾歷太子洗馬出爲長城令悅其山水遂家焉嘗謂所親曰此地山川秀麗當有王者興二百年後我子孫必鍾斯運高祖以梁天監二年癸未歲生少儻有大志不治生產旣長讀兵書多武藝明達果斷爲當時所推服常遊義興館於許氏夜夢

天開數丈有四人朱衣捧日而至令高祖開口納焉及覺腹中猶熱高祖心獨負之大同初新喻侯蕭暎爲吳興太守甚重高祖謂僚佐曰此人方將遠大及暎爲廣州刺史高祖爲中直兵參軍隨之鎮暎令高祖招集士馬衆至千人仍命高祖監宋隆郡所部安化二縣元不軍高祖討平之尋監江西督護高要郡守先是武林侯蕭諮爲交州刺史以哀刻失衆心士人李賁連結數州豪傑同時反臺遣高州刺史孫罔新州刺史盧子雄將兵擊之罔等不時而進皆於廣州伏誅子雄弟子略與罔子致及其主帥杜天合杜僧明共舉兵執江南督護沈覲進寇廣州晝夜苦攻州中震恐高祖率精兵三千卷甲兼行以救之

頻戰屢捷天合中流矢死賊衆大潰僧明遂降梁武帝深
歎異焉授直閣將軍封新安子邑三百戶仍遣畫工圖高
祖貌而觀之高祖送喪還都至大庾嶺會有詔高祖爲交
州司馬領武平太守與刺史楊暕匹妙切南討十一年六月
軍至交州賁衆數萬於蘇歷江口立城柵以拒官軍暕推
高祖爲先鋒所向摧陷賁走典澈湖於屈獠界立砦音大
造船艦充塞湖中衆軍憚之頓湖口不敢進夜江水暴起
七丈注湖中奔流迅激高祖勒所部兵乘流先進衆軍鼓
譟俱前賊衆大潰賁竄入屈獠洞中屈獠斬賁傳首京師
是歲太清元年也除振遠將軍西江都護高要太守督七
郡諸軍事二年冬侯景寇京師高祖將率兵赴援廣州刺

史元景仲陰有異志將圖高祖高祖知其計與成州刺史
王懷明行臺選郎殷外臣等密議戒嚴二年七月集義兵
於南海馳檄以討景仲景仲窮蹙溢于閣下高祖迎蕭勃
鎮廣州十一月高祖遣杜僧明胡頹將二千人頓于嶺上
并厚結始興豪傑同謀義舉侯安都張偲音情等率千餘人
來附蕭勃聞之遣鍾休悅說高祖曰侯景驍勇天下無敵
前者援軍十萬士馬精強然而莫敢當鋒遂令羯賊得志
以君踈外詎可闇投未若且住始興遙張聲勢保此泰山
自求多福高祖泣謂休悅曰僕本庸虛蒙國成成迨往聞侯
景渡江卽欲赴援今京都覆沒主上蒙塵辱臣死誰敢
愛命君侯體則皇枝任崇方岳已不能摧鋒萬里雪此寃

痛見遣一軍猶賢乎已乃降後旨使人慨然僕行計已決
憑爲披述乃遣使間道往江陵稟承軍期節度湘東王承
制授高祖員外散騎常侍持節明威將軍交州刺史改封
南野縣伯六月高祖修嶂頭古城徙居焉高州刺史李遷
仕據大臯遣主帥杜平虜率千人入贛音紺石魚梁擄掠高
祖命周文育將兵擊走之遷仕奔寧都承制授高祖通直
散騎常侍使持節信威將軍豫州刺史領豫章內史改封
長城縣侯尋授散騎常侍使持節都督六郡諸軍事軍帥
將軍南江州刺史餘如故時寧都人劉藹等資遷仕舟艦
兵仗將襲南康高祖遣杜僧明等率二萬人據白口築城
以禦之遷仕亦立城以相對二年三月僧明攻拔其城生

擒遷仕送南康高祖斬之承制命高祖進兵定江州仍授
江州刺史餘如故六月高祖發自南康觀者數萬人是時
承制遣左都將軍王僧辯督衆軍討侯景八月僧辯軍次
湓州高祖率杜僧明等衆軍及南川豪帥合三萬人將會
焉時西軍乏食高祖先貯軍糧五十萬石至是分三十萬
以資之仍頓巴邱會侯景廢簡文帝立豫章嗣王棟高祖
遣兼長史沈袞奉表於江陵勸進十一月承制授高祖使
持節都督會稽東陽新安臨海永嘉五郡諸軍事平東將
軍揚州刺史領會稽太守豫章內史餘並如故三年正月
高祖率甲士三萬人強弩五千張舟艦二千乘發自豫
章二月次桑落洲遣中記室參軍江元禮奉表江陵承制

加高祖鼓吹一部是時僧辯已發湓城會高祖于白茅灣
乃登岸結壇刑牲盟約進軍次蕪湖侯景城主張黑棄城
走三月高祖與諸軍進尅姑熟仍次蔡州侯景登石頭城
觀望形勢意甚不悅謂左右曰此軍上有紫氣不易可當
以船艦貯石沈塞淮口緣淮作城自石頭迄青溪十餘里
中樓雉相接諸將未有所決僧辯遣杜勣問計於高祖高
祖曰前柳仲禮數十萬兵隔水而坐韋粲之在青溪竟不
渡岸賊乃登高望之表裏俱盡肆其凶虐覆我王師今圍
石頭須渡北岸諸將若不能當鋒請先往立柵高祖
卽於石頭西橫隴築柵衆軍次連入城直出東北賊恐西
州路斷亦於東北果林作五城以遏大路景率衆萬餘人

鐵騎八百餘匹結陣而進乃命諸將分處置兵賊直衝王
僧志僧志小縮高祖遣徐度領弩手二千橫截其後
賊乃却高祖與王琳杜龕等以鐵騎悉力乘之賊退據其
柵景儀同盧輝略開石頭北門來降盪主戴晃曹宣等攻
拔果林一城衆軍又尅其四城賊復還殊死戰又盡奪其
所得城柵高祖大怒親率攻之士卒騰柵而入賊復散走
景與百騎棄稍執刃左右衝陣陣不動景衆大潰遂北至
西明門景至闕下不敢入臺遣腹心取其二子而遁高祖
率衆出廣陵應接會景將郭元建奔齊高祖納其部曲三
千人而還僧辯啟高祖鎮京口五月齊遣辛術圍嚴超達
于秦郡高祖命徐度領兵助其固守齊衆七萬填塹起土

山穿地道攻之甚急高祖乃自率萬人解其圍縱兵四面擊齊軍弓弩亂發齊平秦王中流矢死斬首數百級齊人收兵而退高祖振旅南歸遣記室參軍劉本仁獻捷於江陵承制授高祖使持節散騎常侍都督南徐州諸軍事征北大將軍開府儀同三司南徐州刺史餘並如故及王僧辯率衆征陸納於湘州承制命高祖代鎮揚州十一月湘東王卽位于江陵改元承聖元年明年湘州平高祖還鎮京口三年三月進高祖司空餘如故十一月西魏攻陷江陵高祖與王僧辯等進啟江州請晉安王以太宰承制又遣長史謝哲奉牋勸進十二月晉安王至自潯陽入居朝堂給高祖班劍二十人四年五月齊送貞陽侯淵明還主社稷

王僧辯納之卽位改元曰天成以晉安王爲皇太子初齊之請納貞陽侯也高祖以爲不可遣使詣僧辯苦爭之往返數四僧辯竟不從高祖居常憤恨密謂所親曰武皇雖磐石之宗遠布四海至于尅雪仇耻寧濟艱難唯孝元而已功業懋盛前代未聞我與王公俱受重寄語未絕音聲猶在耳豈期一旦便有異圖嗣主高祖之孫元皇之子海內屬目天下宅心竟有何辜坐致廢黜遠求夷狄假立非次觀其此情亦可知矣乃密具袍數千領及錦綵金銀以爲賞賜之具九月壬寅高祖召徐度侯安都周文育等謀之仍部列將士分賞金帛水陸俱進是夜發南徐州討王僧辯甲辰高祖步軍至石頭前進遣勇士自城北踰入時

僧辯方視事外白有兵俄而兵自內出僧辯遽走與其弟三子願相遇俱出閣左右尚數十人苦戰高祖大兵尋至僧辯衆寡不敵走登城南門樓高祖因風縱火僧辯窮迫乃就擒是夜縊僧辯及願丙午貞陽侯遜位百僚奉晉安王上表勸進十月己酉晉安王卽位改承聖四年爲紹泰元年壬子詔授高祖侍中大都督中外諸軍事車騎將軍揚南徐二州刺史持節司空班劍鼓吹並如故仍詔高祖甲仗百人出入殿省震州刺史杜龕據吳興與義興太守韋載同舉兵反高祖命周文育率衆攻載於義興龕遣其從弟北叟將兵拒戰北叟敗歸義興二年正月癸未誅杜龕於吳興龕從弟北叟司馬沈孝敦並賜死二月庚申高祖遣侯安

都周鐵武率舸艦備江州仍頓梁山起柵三月戊戌齊遣水軍儀同蕭軌庫狄伏連堯難宗東方老侍中裴英起東廣州刺史獨孤辟惡洛州刺史李暕光并任約徐嗣徽等率衆十萬出柵口占梁山帳內盪主黃叢逆擊敗之燒其前軍船艦齊頓軍保蕪湖高祖遣定州刺史沈泰吳郡太守裴忌就侯安都共據梁山以禦之四月丁巳高祖詣梁山軍巡撫五月甲申齊兵發自蕪湖丙申至秣陵故治高祖遣周文育屯方山徐度頓馬牧杜稜頓大航南己亥高祖率宗室王侯及朝臣將帥於大司馬門外白獸闕下刑牲告天以齊人倍約發言慷慨涕泣交流同盟皆莫能仰視士卒觀者益奮辛丑齊軍於秣陵故縣跨淮立橋柵引渡

兵馬其夜至方山侯安都周文育徐度等各引兵還京師
癸未齊兵自方山進及倪塘遊騎至臺周文育侯安都頓
白土崗旗鼓相望都邑震駭高祖潛撤精兵三千配沈秦
渡江襲齊行臺趙彥深於瓜步獲舟艦百餘艘陳粟萬斛
六月壬辰齊兵潛至鍾山龍尾丁未進至幕府山高祖命
衆軍秣馬蓐食遲明攻之乙卯高祖自率帳內麾下出幕
府山南吳明微沈泰等衆軍首尾齊舉縱兵大戰侯
安都自白下自引兵橫出其後齊師大潰斬獲數千
人相蹂藉而死者不可勝計生執徐嗣宗斬之以徇追奔
至于臨沂其江乘攝山鍾山等諸軍相次尅捷七月丙子
詔授高祖中書監司徒揚州刺史進爵爲公增邑并前五

千戶并給油幢皂輪車是月侯瑱

他旬切

以江州人附遣侯

安都鎮上流定南中諸郡八月癸卯太府卿何敞

五未切

新

州刺史華志各上玉璽一高祖表以送臺詔歸之高祖是

日詔高祖食安吉武康二縣合五千戶九月進高祖位丞

相錄尚書事鎮衛大將軍改刺史爲牧進封義興郡公丁

未中散大夫王彭賤稱今月五日平旦於御路見龍迹自

大社至象闕亘三四里庚申詔追贈高祖考侍中光祿大

夫加金章紫綬封義興郡公謚曰恭十月甲戌敕丞相自

今入問訊可施別榻以近宸坐二年正月壬寅天子朝萬

國于大極東堂詔加高祖班劍十人八月甲午進高祖位

太傅加黃鉞劍履上殿入朝不趨贊拜不名并給葆羽鼓

吹一部丙申加高祖前後部鼓吹羽葆是時湘州刺史王琳擁兵不應命高祖遣周文育侯安都率衆討之九月詔進位柱國總百揆封十郡爲陳公備九錫之禮十月進高祖爵爲王又命冕十有二旒建天子旌旗辛未梁帝禪位永定元年冬十月乙亥高祖卽皇帝位于南郊柴燎告天大赦天下改梁太平二年爲永定元年封梁帝爲江陰王賜文爵二級武位二等鰥寡孤獨不能自存者人穀五斛丙子輿駕幸鍾山祠蔣帝廟戊寅輿駕幸華林園親覽詞訟臨赦囚徒己卯分遣大使宣勞四方辛巳追尊皇考曰景皇帝廟號太祖皇妣董太夫人曰安皇后追謚前夫人錢氏號爲昭皇后立夫人章氏爲皇后癸未尊景帝陵曰

瑞陵昭皇后陵曰嘉陵依梁初園陵故事立剛定卽治定律令戊子遷景皇帝神主附於太廟二年夏四月甲子輿駕親祠太廟乙丑江陰王薨遣太宰弔祭司空監護喪事凶禮所須隨宜備辦以梁武林侯蕭諮息季卿嗣爲江陰王初侯景之平也火焚太極殿承聖中議欲營之獨缺一柱至是有樟木大十八圍長四丈五尺流泊陶家後瀆監軍鄒子度以聞詔中書令沈衆兼起部尙書少府卿蔡儔兼將作大匠起太極殿甲寅太極殿成匠各給復十二月庚申侍中安東將軍臨川王禧率百僚朝前殿拜上賜牛酒甲子輿駕幸大莊嚴寺設無碍大會捨乘輿法物羣臣備法駕奉迎卽日輿駕還宮丙寅高祖于太極東堂晏羣臣

設金石之樂以路寢告成也三年春正月己丑青龍見于東方丁酉夜大雪及明太極殿前有龍迹見甲午廣州刺史歐陽頎表稱白龍見于州江南岸長數十丈僊人見于羅浮山寺小石樓長三丈所通身潔白衣服楚麗北江州刺史熊曇朗殺都督周文育于軍舉兵反王琳遣其將常衆愛曹慶率兵援視遮切孝厲六月戊子儀同侯安都敗衆愛等於左里獲琳從弟襲主師羊暕音簡等三十餘人衆愛遁走庚寅廬山民斬之傳首京師甲午衆師凱歸丁酉高祖不豫遣兼太宰尙書左僕射王通以疾告太廟兼太宰中書令謝哲告太社南北郊辛丑高祖疾小瘳故司空周文育之柩至自建昌壬寅高祖素服哭于東堂哀甚癸卯

高祖臨訊獄省訟是夜熒惑在天高祖疾又甚丙午崩于璿璣殿時年五十七遺詔追臨川王蒨入纘大業甲寅遷殯于太極殿西階謚曰武皇帝廟號高祖葬萬安陵

太平御覽卷一百三十三

太平御覽卷一百三十四
偏霸部十八

陳陳蒨

陳伯宗

陳頊

陳叔寶

陳蒨

陳書曰世祖文皇帝諱蒨字子華始興昭烈王長子也少沈敏有識量美容儀留意經史舉動方雅造次必遵禮法高祖甚愛之常稱此兒吾宗之英秀也梁太清初帝夢兩日鬪一大一小大者光滅墜地色正黃其大如斗世祖因三分取一而懷之侯景之亂鄉人多依山湖寇抄世祖獨保家無所犯時亂日甚乃避地臨安及高祖舉義兵侯景

遣收世祖及衡陽獻王世祖乃密裏小刀冀因入見而害
 景至便屬吏故其事不行高祖大軍圍石頭景欲加害
 者數矣會敗世祖乃出得赴高祖營起家為吳興太守高
 祖受禪為臨川郡王食邑二千戶拜侍中安東將軍及周
 文育侯安都敗於屯口高祖召世祖入衛軍儲戎備皆以
 委焉尋命率兵城南皖戶板切永定三年六月丙午高祖崩
 遺詔徵世祖入繼皇統甲寅至自南皖入居中書省其日
 即皇帝位於太極前殿詔曰上天降禍奄集邦家大行皇
 帝背離萬國率土崩心若喪考妣龍圖寶歷眇屬朕躬運
 鍾擾攘事切機務南面須主西讓禮輕今便式膺景命光宅四
 海可大赦天下改永定四年為天嘉元年鰥寡孤獨不能

自存立者賜穀人五斛孝弟力田殊行異等加爵一級甲
 寅分遣使者宣勞四方辛酉輿駕親祀南郊二年春正月
 庚戌大赦天下十一月立始興國廟於京師用王者之禮
 太子中庶子虞荔御史中丞孔奐以國用不足奏立煮
 海鹽及權酤之稅詔並施行二年春正月庚戌設帷宮於
 南郊幣告胡公以配天辛亥輿駕親祀南郊二月甲子改
 鑄五銖錢三月丙子安成王頊至自周詔授侍中中書監
 中衛將軍置佐史是歲周所立梁王蕭詧死子歸立軌代切
 立天康元年春二月丙子詔曰朕以寡德繼承洪緒日昃
 劬勞思弘景業而政道多昧黎庶未康兼疾患淹時亢陽
 累月百姓何咎實由朕躬念茲在茲痛如疾首可大赦天

下改天嘉七年爲天康元年三月己卯以驃騎將軍開府儀同三司揚州刺史司空安成王頊爲尙書令夏四月乙卯皇孫至澤生在位文武賜絹帛各有差爲父後者賜爵一級癸酉世祖疾甚是日崩于有覺殿遺詔曰朕疾苦彌留遂至不救修短有命夫復何言但王業艱難頻歲軍旅生民多弊無忘愧惕今方隅乃定俗教未弘便及大漸以爲遺恨社稷任重太子可卽君臨王侯將相善相輔弼內外協和勿違朕意山陵務在儉速大殮竟羣臣三日三臨公除之制率依舊典六月甲子羣臣上謚曰文皇帝廟號世祖葬永寧陵

陳伯宗

陳書曰廢帝諱伯宗字奉業小字藥王世祖嫡長子也永定二年拜臨川王世子世祖嗣位立爲皇太子天康元年四月世祖崩卽皇帝位二年春詔大赦天下改光大元年孝弟力田賜爵一級輿駕祀南郊二年十一月慈訓太后集羣臣於朝堂令降爲臨海王送還藩邸是日出居別第太建二年薨時年十九

陳頊

陳書曰高宗孝宣皇帝諱頊字紹世小字師利始興昭烈王弟二子梁大通二年生有赤光滿室少寬大多知畧及長美容儀身長八尺三寸手垂過膝有勇力善騎射高祖平侯景鎮京口梁元帝徵高祖子姪入侍高祖遣高宗赴

江陵累官為直閣將軍中書侍郎時有馬軍主李總與高宗有舊每同遊處高宗夜被酒張燈而寐總適出尋返乃見高宗身是大龍總便驚走時在關右永定元年遙襲封始興郡王食邑二千戶三年世祖嗣位改封安成王天嘉三年自周還授侍中中書監中衛將軍置佐史尋授使持節都督揚南徐東陽南豫北江五州諸軍事揚州刺史進號驃騎將軍餘如故四年加開府儀同三司六年遷司空天康元年授尚書令廢帝即位拜司徒進號驃騎大將軍錄尚書都督中外諸軍事給班劍三十人光大二年正月進位太傅領司徒加殊禮劍履上殿增邑并前三千戶餘如故十一月甲寅慈訓太后令廢帝為臨海王以高宗入

續是歲春正月甲午即皇帝位于太極前殿詔改光大三年為太建元年大赦天下在位文武詔賜一階孝悌力田及為父後者賜爵一級異等殊才並加策序鰥寡孤獨不能自存者人賜穀五斛復太皇太后尊號曰皇太后立妃柳氏為皇后世子叔寶為皇太子冬十月新除左衛將軍歐陽紇據廣州舉兵反辛未遣車騎將軍開府儀同三司章昭達率眾討之壬午與駕祀太廟二年春正月乙酉以征西大將軍開府儀同三司郢州刺史黃法氈其於為中護大將軍丙午與駕親祀太廟二月癸未儀同章昭達擒歐陽紇送都斬于建康市廣州平三月丙申皇太后崩丙午曲赦廣衡二州丁未大赦天下三年春正月癸丑以尚

書右僕射領大著作徐陵爲尙書僕射辛酉輿駕親祀南郊辛未親祀北郊二月丁酉親耕籍田三月丁丑大赦天下自天康元年訖太建元年逋餘軍糧祿秩夏調未入者悉原之五年三月詔大都督吳明徹統衆十萬發自白下夏四月癸卯前巴州刺史魯廣達尅齊大峴城辛亥吳明徹尅秦州水柵庚申齊遣兵十萬援歷陽儀同黃法氈破之辛酉齊軍救秦州吳明徹又破之癸亥詔北伐衆軍所殺齊兵並令埋掩甲子南譙太守徐穰尅石梁城六年春正月壬戌朔詔曰王者以四海爲家百姓爲子一物垂方夕惕猶勵六合未混肝食彌憂朕嗣纘洪基思弘經畧上符景宿下協人謀命將興師大拯淪溺仄瑄未周凱捷相

繼拓地數千連城將百蠶彼餘黎毒茲異境江淮年少猶有漂剝鄉閭無賴擿出陰私將帥軍人罔顧刑典今使苛法蠲除仁聲載路且肇元告慶邊服來荒始覩皇風宜覃曲澤可赦江右淮南北司霍光歷陽臨江等郡士民罪無輕重悉皆原宥七年春正月辛未輿駕親祀南郊四月乙未陳桃根表上織成羅文錦被表各二首詔於雲龍門外焚之八月周遣使來聘是月甘露頻降樂遊苑辛未輿駕幸樂遊苑採甘露宴羣臣詔於苑龍舟山立甘露亭十一年春正月丁酉龍見於南兗州永寧樓側池中二月癸亥輿駕親耕籍田三月丁未詔淮北義人率戶口歸國者建其本屬舊名立郡縣卽隸近州賦給田宅秋七月辛卯初

用大貨六銖錢八月甲子青州義主朱顯宗等率所領七
百戶入附丁卯輿駕幸大社觀閱武十一月詔建子令月
微陽初動應此嘉辰宜播寬澤可大赦天下甲午周遣柱
國梁士彥率衆至淝口戊戌周軍進圍壽陽以新除中衛
大將軍揚州刺史始興王叔陽爲大都督總督水步衆軍
十二月乙丑南北克晉三州及盱眙山陽陽平馬頭秦歷
陽沛北譙南梁等九州並自拔還京師譙北徐州又陷自
是淮南之地盡沒於周矣十四年春正月乙酉高宗弗豫
甲寅崩于宣福殿時年五十三上謚孝宣皇帝廟號高宗
葬顯寧陵

陳叔寶

陳書曰後主諱叔寶字元秀小字黃奴高宗嫡長子也梁
承聖二年生于江陵江陵陷高宗遷關右留後主于穰城
天嘉三年歸京師立爲安城王世子太建十四年正月高
宗崩卽皇帝位于太極前殿詔大赦尊皇后爲皇太后宮
曰宏範立妃沈氏爲皇后七月辛未大赦是月江水赤色
如血自京師至于荊州九月設無碍五滸大會於太極殿
捨身及乘輿服御至德元年正月詔大赦改太建十五年
爲至德元年二年十二月夜天開自西北至東南其內有
青黃雜色隱隱若雷聲後主在東宮好學有文藝及卽位
耽於酒色常在後庭不恤政事又於光昭殿前起臨春結
綺望僊三閣閣高數丈并數十間窗櫺欄檻之類悉以沈

檀香木爲之飾以金玉間以珠翠微風暫至香聞數里瑰
寶奇麗近古未有其下積石爲山引水爲池植以奇樹雜
以花藥後主自居臨春閣孔貴人居望僊閣張貴人居結
綺閣並複道往來婦人麗質巧態以從者常千餘人使張
貴妃孔貴人等八人侍坐尚書令江總孔範等十人侍宴
號曰狎客上令八婦人製五言詩十客一時繼和遲則罰
酒君臣酣飲從夕達曙所司皆因闈人奏事者由此擅作威
福軍旅警備等皆不修任用沈客卿施文慶等以苛刻爲
忠於是文武離心莫肯用命隋文帝謂高熲曰我爲百姓
父母豈可限一衣帶水不拯之乎命大作戰船人請密之
隋文帝曰吾將天討何密之有使投梯於江彼若能改吾

又何求乃遣晉王廣爲元帥以討之及聞隋軍臨江孔範
曰必無渡理但恣妓樂縱酒作詩不輟明日隋軍至江陵
文武百僚皆散出唯尚書僕射袁憲侍側憲勸端坐殿上
正色以待之後主曰鋒刃之下未可當之吾自有計乃逃
於井既入軍人窺井呼之後主不應欲下石乃叫以繩引
之驚其太重及出與張貴妃孔貴人三人同東而上賀若
弼呼後主視之惶懼汗流股慄再拜弼謂之曰大國之卿
當小國之君拜禮也入朝不失作歸命侯亦無勞恐懼三
月後主與王公百司發白建鄴至長安後主已下大小在
路五百餘里累累不絕隋文宣詔讓後主後主伏地不能
對乃宥之給賜甚厚每侍宴恐傷其心爲不奏吳音後監

守者言叔寶願得官號隋文曰叔寶絕無心肝監守又言叔寶日飲一石少有醒時隋文曰不爾何以過日及從東巡狩登邙山賦詩曰日月光天德山河壯帝居太平無以報願上封禪書拜上表請封禪隋文謙讓不許後從至仁壽宮常侍宴及出隋文目之曰此敗豈不由作詩飲酒將此功夫何如思安邊計策初賀若弼渡京口彼人密啟告急叔寶爲飲酒遂不省高熲至猶見啟在牀下未開封豈天亡也後主以隋仁壽四年十一月終于洛陽在位七年年五十二歲

史臣曰後主生深宮之中長婦人之手既屬邦國殄瘁不知稼穡艱難初懼阽危屢有哀矜之詔後稍安集復扇淫

侈之風賓禮諸公唯寄情於文酒昵近羣小皆委之以衡軸謀謨所及遂無骨鯁之臣權要所在莫匪侵漁之吏政刑日紊尸素盈朝耽荒爲長夜之飲嬖寵同艷妻之孽危亡弗恤上下相蒙衆叛親離臨機不悟自投於井冀以苟生視其以此求全亦民斯下矣遐觀列辟纂武嗣與其始也皆欲齊明日月合德天地高視五帝俯協三王然而靡不有初鮮克有終其故何哉良以中庸之材懷可移之性口存於仁義心怵於嗜慾仁義利物而道遠嗜慾遂性而便身便身不可久違道遠難以固志佞諂之倫承顏候色因其所好以悅導之若下坂走丸順流決壅非夫感靈辰像降生明德孰能遺其所樂而以百姓爲心哉此所以成

康文景千載而罕遇也

淵樂而人百世之心也

因其世以謝之公孫可與也

野紅對以不百人戲後豈難

可也

可也

可也

可也

可也

可也

可也

太平御覽卷一百三十四

